

# *KUVUKANA YINA*

## *KE MONIKAKA VE YA*

### *KENTO YA MAKWELA YA KLISTO*

 Mu zengaka nzietelo ya kuzomba, na yina mu salaka yawu mutindu kisalu ya Mfumu. Na yina ya kele . . . Beto kele na kiese na kuvwanda awa. Mu banza, mbala ya nsuka awa, mu me tuba na beno: ntangu nyonso beto ke kwiza, ya kele na muntu mosi ke kondwa. Mpe kana beto vutuka na mvula ke kwisa, mpe ti Mfumu me wumela, ya ke vwanda na muntu mosi ke kondwa.

<sup>2</sup> Ya kele na mosi, yina vwandaka kieleka, kieleka pene-pene ya munu na kati ya ntima, na mpeve; ya vwandaka Mpangi Lyle. Ntangu nionso ba ke yambaka munu mbote, ntangu mu vwandaka kwisa, mu vwandaka kuna mpe mu vwandaka kuwa, na bureau ya Mpangi Jack, bankunga ya ntama ya yiya vwandaka bula. Ba ke na kuyimba na Nkembo, na nkokila yayi. Mbote, kele na mosi ya bandinga yina kele yimeni na lweka yina Kuna, yina ke na kuvingila tatu yankaka. Mu banza ti mu ke kuwa dyaka yawu ve awa na zulu ya ntoto. Kasi kieleka mu ke na kuvingila na kuwa dyaka yawu, Mpangi-bakala, Mpangi-kento Moore awa, na Yinsi yina kisika bawu ke . . . kuna ya ke kufwa dyaka ve.

<sup>3</sup> Mpangi Palmer vwandaka kisadi ya nene ya Klisto. Mu lenda bambuka moyo na Mpangi Jack vwandaka tuba na munu samu na luzingu ya yandi—ya yandi yina me pesama na Nzambi. Ba vwandaka bisadi-mabaya, kintwadi. Mpe yandi tubaka ti yandi ke kudia madia ya yandi—ya yandi, yandi vwandaka na sandwich ya yandi na diboko ya yandi, yandi vwandaka kudia sandwich mpe vwandaka tanga Biblia ya yandi. Beno me mona? Yandi salaka mwa bima ya ngolo ya nene, Mpangi Palmer salaka. Yandi kele kisadi-mabaya ya mbote, tata ya mbote samu na bana ya yandi, dibuta ya kitoko. Yandi sansaka bawu nionso samu na kusadila Mfumu. Landila yina mu zaba, bawu nyonso me kuzwa mpulusu mpe kele ya kufuluka na Mpeve-Santu. Mpe yina kele diambu ya nene samu na muntu nionso na bilumbu yayi, bana-babakala mpe bana-bakento. Kasi, beno me mona, nyonso yina yandi salaka ke vwanda na mfunu ata fioti ve ti kusadila Nzambi, yandi me sadila Nzambi. Mpe na nkokila yayi, yina yandi salaka awa na zulu ya ntoto, bisalu ya yandi ya mbote, yandi me kwenda na musendo ya yandi, samu na kuvwanda na bawu. Nzambi kupemisa moyo ya mpangi ya beto ya bakala.

<sup>4</sup> Mu zaba, ntangu nyonso yayi kele tabernacle awa, mpe mu—mu zaba ti yandi ke . . . ndinga ya yandi ke vwanda dyaka awa. Beno lenda kuwa yawu. Mpangi-kento Anna Jeanne mpe—mpe mpangi ya yandi ya kento, vwandaka bula orgue mpe piano, mutindu ba vwandaka vingila ve. Mpangi Palmer me telama kaka awa mpe yandi me baka kaka nkunga, me landila mutindu yina. Bawu ke simba yawu. Mpe mu ata mbala mosi ve . . . Mu talaka na ntwala samu na kuwa yandi kutwadisa nkunga.

<sup>5</sup> Samu na bana ya yandi; samu na kento ya yandi; mpe samu na Mpangi Jack, samu na bankundi ya yandi ya ntima, bawu vwandaka bankundi na bamvula nionso yayi; mpe Mpangi Brown, Mpangi-kento Brown, mpe beno nionso na tabernacle: Nzambi sakumuna beno. Mu ke kondwa yandi, mpe. Nzambi kupemisa moyo ya yandi ya kikesa, tii beto ke kutana na yandi na ngemba.

Beto kulumusa bayintu ya beto.

<sup>6</sup> Tata ya Mazulu ya kufuluka na lemvo, mu ke na kuzonzila kaka kisadi yayi ya nene, mu me kondwa yandi, na nkokila yayi, yandi vwandaka pesa munu mbote, mpe mwa kuseka yina ya fioti ya mayele yandi vwandaka ntangu nionso na yawu ntangu yandi vwandaka tuba, “Nzambi sakumuna nge, Mpangi Branham,” ntangu beto vwandaka kota na kielo. Mu zaba ti yandi me kwiza na Yinzo ya Nge, na nkokila yayi. Na yawu mu ke sambila, Nzambi ya luzolo, ti Nge ke bika bambuma, bisalu ya yandi yina ke landa yandi, ke vwanda nene, ke landila na bana ya yandi, kento ya yandi. Beto ke sambila ti Nge sakumuna yandi, Mfumu. Nge tubaka ti Nge ke vwanda bakala ya “mifwidi ya bakento yina kele mifwidi ya bakento ya kieleka.” Mu ke sambila samu na Mpangi ya beto ya kento Palmer mpe samu na bana nyonso. Mu zaba wapi mutindu mu ke kabula kyadi ya bawu zole, na kuzimbisaka nkundi mpe dyaka na kuzimbisaka papa ya munu.

<sup>7</sup> Na yawu, Tata, na yina beto kele awa, na nkokila yayi, beto ke sambila ti Nge ke yidika bantima ya beto, mpe, samu na ngunga yina. Beto zaba ve. Ya lendaka kwisa na kintulumukina mutindu ya me salama na yandi. Beto zaba ve ntangu ya ke kwiza, kasi beto zaba ti ya fwana kwiza. Na yawu beto ke sambila, Nzambi, ti Nge ke tala konso ntima yina kele awa, na nkokila yayi. Nzambi, kubika ve ya munu na ngaanda. Tala ntima ya munu, mpe, mpe meka munu. Mfumu, kana ya kele na mpeve ya yimbi na katì ya beto, basisa yawu. Beto zola sadila Nge. Yawu yina lukanu ya beto ya muvimba, kele kusadila Nge.

<sup>8</sup> Mwangisa Mpeve ya Nge na zulu ya beto, na nkokila yayi, mpe sabala yayi nionso. Sakumuna tabernacle yayi na nkumbu ya Life Tabernacle. Bika ti yawu kuzwa balusakumunu ya kufuluka na nkumbu yina mpe kuvwanda ya kufuluka na Luzingu ya Nzambi, na sabala yayi, samu na kuvulusa moyo

nyonso ya kuzimbana, samu na kufulusa konso mukwikidi na Mpeve-Santu, mpe kuvutula ya malu-malu kivuvu yina kele na kati ya beto, Mfumu, dyaka. Beto ke sambila ti Nge belusa diaka bambevo nionso mpe bantu ya mpasi yina ke kwisa na kati ya beto. Bika ti Mpeve-Santu ya Nge ya nene kuvwanda awa, Mfumu, mpe kubelula . . . mpe kupakula mosi na mosi na kukwikila. Pesa bima yayi, Tata.

<sup>9</sup> Nzambi, sadisa munu ntangu yayi. Kana ya kele kisalu ya munu ntangu yayi, samu na kunata Nsangu. Mu ke sambila, Nzambi, ti Nge ke bika kaka kitini ya muntu kutelama na lweka mosi. Bika ti Mpeve-Santu kukota mpe kutwadisa beto, Mfumu. Bika ti Mpeve-Santu kubaka lukutakanu, Mfumu. Beto zaba ti beto kele ya kulunga ve. Beto lenda ve kusala yawu, ata mosi ve na kati ya beto. Beto ke tubaka ve ti beto kele na kiyeka ya kusala yawu. Kasi, Mfumu, beto zaba ti Nge kele Mosi. Na yina beto ke tala na Nge, Mfumu. Sala, Mpeve ya Nzambi, mpe kulumuka dyaka na zulu ya beto. Beto ke lomba yawu na Nkumbu ya Yesu. Amen.

<sup>10</sup> Ntangu yayi mu zola kupesa mbote na nsinga ya alo-alو, na mabuundu ntangu yayi yina kele ya kukangama na beto na nzila ya nsinga. Beto kele na nsinga ya alo-alو, yina kele mwa sysiteme mosi ya mbote yina beto me kuzwa, na nzila ya Mpangi ya beto ya bakala Pearry Green ya Beaumont, na Texas. Mpe mabuundu, ya muvimba, yina ke na kulanda Nsangu, bisika nyonso na Etats-Unis, kele ya kukangama na nsinga ya alo-alو, na nkokila yayi. Beto ke fidisa mbote, kuna na Côte Ouest, bisika nyonso kubanda na Vancouver tii na Tijuana, na Mexique, tii na San Jose, na Los Angeles. Bimvuka nionso yina kele kuna, beto ke pesa beno mbote katuka Shreveport. Mpe, tii na Prescott, na Arizona, na kimvuka yina kele kuna yina ke na kuvingga na Mfumu, beto ke fidisa mbote na beno, mpe na Tucson, dyaka na Sierra Vista. Bisika nyonso na New York, na node mpe na sude, bisika nyonso na yinsi, Mfumu sakumuna beno, mosi na mosi. Mu zolaka ti beno vwanda awa, na nkokila yayi, na mbanza yayi ya kitoko ya Louisiane, kisika ya ke monana mutindu yinzo ya zole, samu na munu. Mu . . .

<sup>11</sup> Beno zaba, beno bantu kuna na New York, beno zaba, mu ke sekisaka beno fioti, mutindu beno ke zonzaka. Mu kele kaka na yinzo na nkokila yayi. Yinga. Muntu nyonso na yisi awa, beno zaba, bawu tubaka, "Hé, mbote, Mpangi Branham. Nge ke nata Mpangi-kento Branham mpe bana nyonso ya fioti mpe beno ke kwiza tala beto." Oh, la la! Ya ke sala munu kaka mbote. Ya kele Kingelesi ya kieleka, samu na munu. Ve samu na kukondwa kuzitisa beno bantu ya esete mpe na node, mpe bisika yankaka. Kasi, beno zaba, mu banza ti mu butukaka Muntu ya ntama ya sude mpe mu fwana bikana mutindu yina. Mu—mu ke zolaka yawu, munu mosi. Ya kele Kingelesi ya kieleka.

<sup>12</sup> Mu vwandaka na madia ya suka ya Bantu ya Mumbongo,

awa ntama mingi ve, mpe bawu tubaka, "Beto ke telama ntangu yayi mpe ke yimba nkunga ya yinsi." Mpe mu telamaka, mu tubaka, "Samu na yinzo ya munu ya ntama ya Kentucky, ntama mingi ve." Mbote, samu na munu, yina nkunga ya yinsi. Yawu yina kaka mu me zaba samu na yawu. Na yina, beto ke tinda beno mbote. Mpe ntangu yayi na . . .

<sup>13</sup> Mu banza ti ba ke meka na kusamuna madia ya suka, diaka, madia ya suka ya Bantu ya Mumbongo, na Kilumbu ya sambanu na suka. Mpangi Green ke tuba na beno, na yina yandi kele na microphone kuna ntangu yayi. Na yawu yandi ke tuba na beno wapi ntangu madya ya suka ke banda, mpe wapi ntangu, konso nkokila, beno lendaka kuwa. Beto ke tonda beno mingi. Beno sambila samu na beto.

<sup>14</sup> Ntangu yayi, samu na kimvuka ya fioti awa, mpe tabernacle ya Mpangi Jack, mu ke lomba beno kaka bweso mosi, na nkokila yayi. Na yina mu zolaka pesa Nsangu ya munu ya kuvutula matondo na yinsi ya muvimba, na nkokila yayi, samu na mabuundu ya beto mosi yina ke na kulanda Nsangu. Na yayi, mu—mu lendaka vwanda mwa yinda mingi. Mpe kuna, dyaka, mu lendaka longa mwa Malongi. Na yawu, kana mutindu yina, mpe ti beno ke wisana ve na Yawu . . .

<sup>15</sup> Kaka mutindu mu ke tubaka ntangu nyonso samu na kudya tarte ya cerises: "Ntangu mu ke kutana na nkuna, mu ke losa ve tarte na ngaanda, mu ke losa mbuma na ngaanda, mu ke landila kaka na kudya tarte."

<sup>16</sup> Na yawu kana mu baka kima mosi na nkokila yayi, mu . . . mbote mu . . . ya kele samu na yina mu bakaka lubokilu yayi, na nkokila yayi, samu na kuvwanda awa, samu na kunata Nsangu ya munu ya kuvutula matondo na bimvuka na yinsi ya muvimba, ya vwandaka samu ti Mpangi Jack ntangu nyonso ke zibulaka kielo ya yandi pwelele mpe ke tuba, "Longa yina kele na zulu ya ntima ya nge." Na yawu mu kele kieleka na kiese.

<sup>17</sup> Na yawu ya lendaka vwanda ti na kati awa, na kimvuka ya fioti awa ya Mpangi Jack, ya lendaka vwanda na balongi mpe bantu yankaka yina ke wisana ve na Malongi. Bambala mingi mu ke vwandaka na lutondo samu na kutubila ve malongi na chaire ya muntu mosi, yina me bokila munu na kukwisa kutuba samu na yandi. Na yawu, na manima ya nkokila yayi, mu banza ti mu ke sambila kaka samu na bambevo mpe kusala lukutakanu ya mumesanu. Kasi mu banzaka ti mu ke bika beno zaba na ntwala, ti kana mu ke tuba kima yina beno ke wisana ve na yawu, na yina, beno tula kaka yawu na lweka ya kukondwa kuzaba ya munu, mu banza, mpe kukondwa kuzaba ya munu. Mpe beno sambila samu na munu.

<sup>18</sup> Na yawu ntangu yayi beto baka kapu mosi, na kati ya Ndinga. Mu zola talisa bisika mingi na nkokila yayi, samu ti mu

kele na Masonuku mingi mpe mwa banoti mingi ya kusonika awa na kalepe.

<sup>19</sup> Mu ke bambuka moyo na mbala ya ntete mu mataka na estrade na Life Tabernacle, bamvula makumi zole me luta. Mu—mu zolaka sonika ve Masonuku ya munu mpe banoti. Mu vwandaka kaka ntwenya ya bamvula makumi zole na ntangu yina. Kasi ntangu yayi mu me luta bamvula makumi zole na tanu, na yawu mu...mbala ya zole. Na yawu mu me...mu lenda ve kubambuka moyo na yawu mutindu mu vwanda salaka. Mu fwana sonika Masonuku ya munu, mpe ntangu yankaka kusonika mwa bisika yina mu ke tanga.

<sup>20</sup> Mpe ntangu yayi Mfumu sakumuna mutindu beto ke tanga na Ndinga ya Nzambi, mpe Buku ya ba-Romain, kapu 7. Ntangu yayi, mu zola kulonga yayi mutindu leso ya lukolo ya Lumingu.

<sup>21</sup> Mu zaba ti ya kele na bantu yina kele ya kutelama. Mpe na tabernacle, bambala mingi, na Jeffersonville, beto zola kupesa beno nionso mbote, na nkokila yayi, mpe, beto zaba ti beno kele na nsinga ya alo-aloo kuna na tabernacle. Mpe ya ke monana mutindu kuvwanda na tabernacle, na nkokila yayi, kana beno vwandaka awa, beno zolaka mona bantu pene-pene ya bibaka, mpe ya kukangama. Ntangu yayi, mu banza ti beno kele mutindu yina, mpe, bantu nyonso yina kele na bizunga ya nziunga ya yinsi, bayina me vukana kuna samu na Nsangu.

<sup>22</sup> Ntangu yayi beto ke sadila yayi mutindu leso ya lukolo ya Lumingu. Mpe ya me tala kima mosi ve, muntu mosi ve, to kima mosi ve; kaka samu na Dibuundu, Nzutu ya Klisto yina beto ke na kumeka na kutwadisa mabanza mingi mpe balukanu ya kulutila zulu, na kukwikilaka ti Nkwizulu ya Mfumu Yesu me kuma pene-pene. Beto ke kwikila yawu. Kulutila mingi, ya kele bamvula makumi zole pene-pene mingi kulutila ya vwandaka mbala ya ntete mu kwizaka na Shreveport. Oh, ya me salamaka mingi kubanda ntangu yina! Ntangu yayi beto ke na kuvingila Nkwizulu ya Mfumu, na nsungi ya beto. Mu ke na kuvingila ve reveal na nsungi ya beto. Mu ke na kuvingila Nkwizulu ya Mfumu, na nsungi ya beto.

<sup>23</sup> Ntangu yayi na Romans 7, mu ke tula kivuvu ti beno me zibula ba-Biblia ya beno, bisika nionso ntangu yayi, na yinsi ya muvimba, beto zola kutanga na bukebi. Ntangu yayi, yayi, ya...Nsangu yayi awa, ya ke monana mutindu ti ya kele samu na makwela mpe kufwa makwela, kasi kieleka ya kele ve. Samu na munu, ya kele profesi samu na Dibuundu na bilumbu ya nsuka. Beto tanga:

*Beno zaba ve, bampangi, (samu ti mu ke zonzaka na bawu yina zaba musiku,) wapi mutindu ti musiku ke yalaka na zulu ya muntu ntangu nyonso yina yandi ke zinga?*

*Samu ti kento yina kele na bakala kele ya kukangama na musiku na bakala ya yandi ntangu nyonso yandi ke zinga; kasi kana bakala yango kufwa, yandi kele na kimpwanza na ntwala ya musiku ya bakala ya yandi.*

*Na yawu kuna kana, na ntangu bakala ya yandi kele moyo, yandi me kwelana na bakala yankaka, ba ke bokila yandi kento ya kindumba: kasi kana bakala ya yandi kufwa, yandi kele na kimpwanza na musiku yina; na yina yandi kele ve kento ya kindumba, na yina yandi me kwelana na bakala yankaka.*

*Na yina mutindu mosi, bampangi ya munu, beno mpe me kuma ya kufwa na musiku na nzila ya nzutu ya Klisto; ti beno ke vukana, to, beno ke kwelana na muntu yankaka, ata mpe na yandi yina me vumbuka na lufwa, ti beto fwana basisa bambuma samu na Nzambi.*

*Samu ti ntangu beto vvandaka na kati ya nsuni, . . . bisalu ya disumu, yina vvandaka na nzila ya musiku, salaka na bamambele ya beto samu na kubuta bambuma samu na lufwa.*

*Kasi ntangu yayi beto me vuluka na musiku, na kuvwandaka ya kufwa na musiku beto vvandaka ya kukangama; ti beto fwana sala na mpeve ya malu-malu, mpe ve landila mukanda yina ya ntama.*

<sup>24</sup> Mpe ntangu yayi beto sambila.

<sup>25</sup> Nzambi ya luzolo, beto me tanga kaka yina beto ke kwikila kele Ndinga ya santu ya Nzambi. Mpe ya kele yina beto ke na kukwikila, ti ata kima mosi ve to mwa kisono ke luta ve na Yayi tii nyonso ke lungisama. Mpe beto ke kwikila ti Mfumu ya beto me tuba na beto, na Apocalypse kapu ya 22, ti, “Muntu nyonso yina ke katula Ndinga mosi na Yawu to ke bwela ndinga mosi na Yawu, mutindu mosi, ndambu ya yandi, ba ke katula yawu na Buku ya Luzingu.”

<sup>26</sup> Mpe beto ke mona ti, na nzila ya kutalisama ya yimbi ya Ndinga yayi, mutindu Satana talisaka Yawu na Eve, nataka yandi na kusala ntembe na Ndinga mosi, yandi losaka bantu nyonso na kubwa na poto-poto. Kaka Ndinga mosi!

<sup>27</sup> Na yina beto ke mona na kati-kati ya Buku, kwisaka Mfumu ya beto mpe Mvulusi ya beto, mpe Yandi pesaka beto masonuku yayi samu na Yawu: “Muntu ke zinga kaka na dimpa ve, kasi na konso Ndinga yina ke basika na yinwa ya Nzambi.”

<sup>28</sup> Na yina dikebi ya nene na Buku ya nsuka, ya Luzayikisu ya Yesu Klisto, “Muntu nyonso yina ke bwela ndinga mosi to ke katula Ndinga, ba ke katula ndambu ya yandi na Buku ya Luzingu.”

<sup>29</sup> O Nzambi, na kuzabaka, na kumonaka mutindu beto kele ya kulemba, na kuzabaka ti beto ke na kutambula na bansinga

ya kusimbama ya luzingu, ya luzingu yayi yina ke kufwa (na kuzabaka ve yinki ntangu yina ba ke bokila beto na kupesa mvutu na Mazulu), beto, O Mfumu, beto ke katula nyonso yina kele na kati ya ntima ya beto, nyonso na kati ya dibanza ya beto, mpe kutala mbala mosi na Ndinga ya Nge, na nkokila yayi, mpe samu na Nge na kwiza mpe kutendula Yawu na bimangu ya moyo. Pesa yawu.

<sup>30</sup> Bika ti Mpeve ya Nge kubwa na zulu ya beto mpe kupakula Ndinga na ntima ya beto, ti beto katuka awa, na nkokila yayi, bantu ya kulutila mbote na yina beto kele ntangu yayi, ti beto fwana zaba mingi na zulu ya Yesu Klisto. Pesa yawu, Mfumu, ti beto lenda bakula kilumbu yina beto ke na kuzinga, mpe kukubama ya Nzambi samu na bantu ya Yandi na ngunga yayi, ntangu yayi ya nene, ya mpasi, ya mudidi yina beto ke na kuzinga ntangu yayi. Nzambi, pakula beto, nzonzi ve kaka, kasi ke bantu yina ke kuwa. Mpe, kintwadi, beto ke sala ti bantima ya beto kutekita na ntwala ya Ndinga ya Nge. “Samu ti boma ya Nzambi kele mbandukulu ya ndwenga.” Pesa bima yayi, Tata, samu ti beto me lomba yawu na Nkumbu ya Yesu. Amen.

<sup>31</sup> Mu ke zola kubokila mwa mazabusu yayi yina mu ke sala awa, mpe mwa Masonuku yina mu ke zola kulanda na bukebi nionso, kana Mfumu zola, samu na Nsangu ya kuvutula matondo, na yina ke monanaka ve, ya, *Kuvukana Yina Ke Monikaka Ve Ya Kento Ya Makwela Ya Klisto. Kuvukana Yina Ke Monikaka Ve Ya Kento Ya Makwela Ya Klisto*. Ya ke wakana ve mutindu Nsangu ya kuvutula matondo. Na yina, beto ke vutula matondo samu na nyonso ya Yawu, samu na Masonuku nyonso.

<sup>32</sup> Mu ke vutula matondo na Nzambi samu na kuzinga na ntangu yayi ya mambu ya nsuka ya disolo ya yinza yayi. Mu zaba ve. Kana mu zolaka vwanda na kima ya kutuba na ntwala ya mbandukulu ya yinza, mpe kana Nzambi lendaka talisa na munu dinaka nionso, mpe tubaka na munu, “Mu—mu zola ti nge longa. Mpe ntangu yayi wapi nsungi nge zola, kukwenda na ntoto samu na kulonga?” Mu zolaka soola nsungi yayi, samu ti mu banza ti yayi kele nsungi ya wolo.

<sup>33</sup> Ya kieleka mu zolaka vwanda awa na ntangu ya kutala ya Yandi na ntoto. Kasi, dyaka, mu banza ti yayi kele ntangu ya kulutila nene, samu ti ya kele ntangu yina Yandi ke kwiza baka bantu yina Yandi me vulusa, pene-pene ya mvumbukulu ntangu bantu yina nionso ba me vulusa ke monana. Wapi bweso ya nkembo kele na beto, na kuzonza na bantu yina ke kufwa, ntangu ya nene! Beto kele na kyese samu na yawu.

<sup>34</sup> Mpe beto zaba ti disolo yango ke na kukuma na nsuka. Disolo ya yinza ke suka ntama mingi ve, na yina beto ke kota na kilumbu ya malu-malu, na Millenium ya nene. Ti, mutindu mukwikidi, mu ke kwikilaka na...na Millénium, luyalu ya Millenium na Klisto, funda ya bamvula na zulu ya ntoto; kuvutuka ya nzutu

ya Mfumu Yesu, samu na kubaka bantu ya nzutu, ya nkembo, na nzila ya Menga ya Yandi yina ke vedisa.

<sup>35</sup> Paul awa ke na kupesa kifwanukusu, na kati ya Masonuku ya beto, samu na musiku mpe lemvo, mpe na kufwanikisaka yawu mutindu makwela mpe kufwa makwela. Ba ke sadilaka mingi ve masonuku yayi, samu ya kele, na mutindu mosi to yankaka, ya ke monana ti, ya ke zonzilaka, makwela mpe kufwa makwela. Kasi ya ke zonzilaka mpe kitini ya kulutila nene ya makwela mpe kufwa makwela, ya mutindu ti yandi ke na kumekaka na kuvwanda na ndonga awa ti beto, mutindu—mutindu Dibuundu, lenda vwanda dyaka ve ya kukwelana na yinza mpe na Klisto, na ntangu mosi, mpe—mpe kuvwanda na nsi ya musiku mpe ya kulunga samu na yawu, ti ya lendaka vwanda samu na kento na kuzinga na bakala mosi na yina yandi kele na bakala ya moyo. Mpe mu kele na mabanza ya munu mosi samu na yawu, mpe mu ke kwikila ti yina Biblia me tuba kele Kieleka.

<sup>36</sup> Ntangu yayi, kasi mu ke kwikila, mpe, mu me ndima yawu, ti ya ke zibula mosi ya mansweki ya nene ya profesi. Mpe mu banza ti Mfumu ke sadisa beto, na nkokila yayi, na yina beto ke longa yayi na bantu ya beto yina ke vingila na yinsi ya muvimba.

<sup>37</sup> Ba tubaka, kilumbu mosi (Mu vwandaka tanga, ntangu mu vwandaka sonika noti samu na yayi, Mu—mu lendaka ve kieleka kubambuka moyo na buku yina ya vwandaka, kasi mu—mu ke kwikila ti yayi kele kieleka), ti (mosi ya babuku mu tangaka samu na yina me tala Tata Moody, Dwight Moody, na Chicago; beto kele na dibuundu ya nene yina ke na kuwa na Chicago, mpe, na nkokila yayi), ti, Tata Moody, na manima ya kutanga Romain 7, kwendaka mbangu na bala-bala, mpe muntu ya ntete yandi kutanaka, yandi tubaka na yandi, “Nge zaba lemvo?”

Mpe muntu yango vutulaka, “Lemvo nani?”

Tata Moody tubaka, “Lemvo ya Nzambi.”

<sup>38</sup> Na yina, ya me yangisa yandi mingi ntangu yandi monaka yina, mutindu lemvo me kabula beto na musiku, mpe wapi mutindu, ti wapi mutindu ya kisalu lemvo salaka. Mbote, ntangu yayi, nyonso yina mu zola kusala, kele ntangu... Mu ke tubaka na bantu ntangu nionso, ntangu mu ke zabuka ndilulu, na lweka yina yankaka, mu ke zola kutelema mpe kuyimba:

Lemvo ya ngitukulu! Muningu ya lembami,  
Yina vulusaka muntu ya mawa mutindu munu!

Lemvo, lemvo ya ntalu!  
Kuzaba kulutila lemvo!

<sup>39</sup> “Samu ti ya kele na nzila ya lemvo beto me kuzwa mpulusu; ve na nzila ya yina beto lenda sala.” Yina beto lenda, nyonso yina beto ke sala, kele ve na mfunu samu na beto. Lemvo kele yina ke vulusaka beto. “Na nzila ya lemvo beno me kuzwa mpulusu, na nzila ya lukwikilu.”

<sup>40</sup> Bika ti mu bwela na Kento yayi, Lemvo, ti mu tula Yandi na kati ya Biblia, mpe, mutindu ba ke bokilaka Mama yina me soolamaka, Mademoiselle Lemvo yayi mu ke zonzila. Beno zaba, Biblia ke zonza, ke tuba, “Na Mama yina me soolamaka.” Ti, kana beno tala, “musolami” me basika na mpova “Mama yina me soolamaka.” Mama mosi, na kati ya bamama nionso yankaka, yina soolamaka.

<sup>41</sup> Mutindu, mwense zolaka basisa nzutu ya Nzambi, na zulu ya ntoto. Yandi vwandaka kento yina soolamaka. Nzambi soolaka Marie.

<sup>42</sup> Mpe, mpe, Nzambi me sola Mama ya kusoola, yina kele Kento ya Yandi ya makwela. Yandi kele ya kusoolama. Mu banza ti beto kele bamambele ya yawu, na nkokila yayi, na yinza ya muvimbba, na yinsi ya muvimbba, mu zola tuba.

<sup>43</sup> Kifwanukusu awa, na kulakisaka kubundana ya Kento ya makwela na Klisto, Mama yina ba soolaka: mpe mutindu ba zolaka nata Yandi na kunata Yandi; kisika Yandi zolaka katuka; mpe mutindu ti ba zolaka nata Yandi na kunata Yandi. Dibuundu awa, na kifwanukusu yina beto ke mona, kele kifwanukusu ya kento. Na yina, kento kele ntangu nyonso kifwanukusu ya Dibuundu, samu ti ba ke talaka Dibuundu Kento ya makwela. Kento ya makwela, Yandi kele Kento ya makwela ya Mfumu Yesu, Mwana ya Nzambi.

<sup>44</sup> Ntangu nyonso, kana beno tala mbote, beno tala mbote nkadulu mpe luzingu ya bakento, mpe beno ke mona kisika dibuundi kele.

<sup>45</sup> Ntangu yayi, yayi, ndambu ya mazabusu yayi lendaka monana ya ngitukulu samu na bayankaka ya beno, kasi ya kele kusikisa samu na Nsangu yina mu me kuzwa na Mfumu, ti mu ke na kumeka na kunata na bantu. Beno me mona? Beno tala mbote nyonso na kimuntu, mutindu ya ke na kusalamaka, yinza, mpe beno tala yawu mbote. Ya ke tambulaka kieleka na kimpeve, mpe.

<sup>46</sup> Ntangu yayi, kana beno mona luzingu ya bakento na yinza bubu yayi, beno tala mbote luzingu ya dibuundu ya yinza bubu yayi. Beno tala kaka mbote. Ya kieleka, ntangu yayi, ya kele mpe luzingu ya Kento ya makwela ya kimpeve, Dibuundu. Beno me mona? Beno tala Yawu mbote, mpe. [Kisika ya mpamba na bande—Mu.] Samu ti, bantu ya yinza mutindu mosi ke bokilaka, ke tubaka ti ba kele Kento ya makwela.

<sup>47</sup> Ntangu yayi, lemvo beno bika mu tuba diaka na kimvuka yina kele awa. Beno tala yimbi ve ntangu yayi. Mu ke—mu ke na kutuba na bisika nyonso na yinsi, na, yina mu banza, Mama yina ba soolaka. Na yawu kana ya kele na balongi na kati awa, yina ke wisana ve, mbote, beno vwanda kaka swi mwa ntangu fyoti. Beno me mona? Beno tala. Beno kuwa kaka.

<sup>48</sup> Beno tala kikalulu yayi. Ntangu beno ke mona bakento ke na kudasuka, ke na kusala kaka nyonso yina bawu zola kusala, beno tala mbote, dibuundu ke na kusalaka kima mutindu mosi. Beno tala.

<sup>49</sup> Kasi beno tala mbote, ntangu Kento ya makwela ya kimpeve, ntangu Yandi ke banda na kuzwa réveil, ntangu Yandi ke banda na kuvutuka mpe ke sungama Yandi mosi na Ndinga ya Nzambi. Beno tala dyaka mbote, beno me mona, mutindu ti Masonuku, na ntangu yina, ya ke vwanda na Nsangu yina ke panzana samu na kusimba Kento yango ya makwela, ke simba Kento yina, Musolami.

<sup>50</sup> Samu, mutindu yinza, Satana, muntu ya luvunu yina vunaka kento ya makwela ya ntete, samu na kusumuka na ntwala ya Nzambi, na kukwikilaka ve Ndinga ya Yandi . . .

<sup>51</sup> Mpe ntangu yayi, bubu yayi, mutindu beto ke mona dibuundu ya yinza, na nsangu ya mbote ya beno ya mayele, ke kwenda ntama mpe ntama na Ndinga, na nsangu ya mbote ya bantu; beto ke mona ti bakento ya yinza, na babala-bala, bamambele ya mutindu yina, ke na kunatama bawu mosi na atimosifere ya mutindu mosi. Beno lenda tuba na bawu ve. Ba me zimbisa sense nionso ya bumuntu, bantu kele mutindu yina. Beno me mona? Mpe ya kele mutindu dibuundu kele na yawu. Mpe beno lenda mona ti ya ke kwenda mbala mosi na conseil oecuménique, kaka mutindu ya mbala zole ke pesa yiya, mpe mbala mosi na Rome na ngolo nionso, beno me mona, samu ba pesaka yawu na profesi. Mpe yandi yayi. Ya kele nkadulu ya yandi.

<sup>52</sup> Kasi na manima beno tala dyaka mbote na Dibuundu ya kimpeve, wapi mutindu kimvuka ya bantu yina, yina ba bokilaka na kubasika, Basolami, na nzila ya reveil nyonso. Na Martin Luther, ya salamaka mutindu mosi na Kusungika. Ya salamaka kima mutindu mosi na ntangu ya John Wesley. Ya salamaka kima mutindu mosi ntangu Pentecotiste bandaka ntete. Ya ke nata bakento yayi na kusungama na Ndinga, mpe na manima ba ke banda na kutengama. Kuna yandi ke vutuka mbala mosi na foto-poto. Kasi na yina na ntangu yina bantu me kubama na kusungama, ya kele na Nsangu ke basika, mpe bawu ke sungama na Yawu.

<sup>53</sup> Luther vwandaka munati-nsangu ya kilumbu, ya kunungisama, mpe Dibuundu vwandaka ya kusungama na yawu, ndambu na kati ya bawu. Bayankaka ya bawu landilaka. Wesley kwizaka na kusantisama, Dibuundu sungamaka na yawu. Pantekote me kwiza na kuvutula ya makabu, Dibuundu sungamaka na yawu, Musolami ya kilumbu yina; mpe na manima me zimbana, me vutuka mbala mosi na malongi ya denomination mpe me kwenda mbala mosi na bayankaka ya bawu, ya me salamaka mutindu yina ntangu nionso.

<sup>54</sup> Ntangu yayi, kasi beno tala, ntangu bantu bandaka na kusungama na Ndinga, kuna me kwiza Nsangu ya malu-malu ya Ndinga ya Nzambi, mbala mosi na bantu. Mpe bawu ke simba Nsangu yina mpe ke mata, konso ntangu. Ya kele kaka na ya Nzambi...Beto kele na yawu.

<sup>55</sup> Beto ke na mabuta. Konso dibuta na kati awa kele na mumesanu ya yawu. Bantangu yankaka mambu nionso ke tambula mbote samu na beno, kubanda bamvula mingi. Na yina, na mbala mosi, beno ke kuma na kisika mosi, beto ke tubaka yawu bambala mingi na Sude awa, “Ntangu mvula ke nokaka, ya ke nokaka mingi,” mpe bima nionso ke tambula mbote ve. Beno ke luta na kati-kati ya mpimpa. Na manima tongo ke tana, na manima ya ke vwanda mpimpa. Nyonso ke tambulaka na kulandilaka.

<sup>56</sup> Profete, Paul, awa ke na kutuba ti kento lenda ve kukwelana dyaka tii bakala ya yandi ya ntete ke kufwa. Yandi lenda ve kukwelana dyaka mutindu bakala ya yandi ya ntete ke na kuzinga; yandi, na mutindu mosi ve, ata fyoti ve. Yandi fwana vwanda yandi mosi ntangu nyonso yina bakala ya yandi ya ntete ke na kuzinga. Mpe kana yandi lendaka sala disumu ya mutindu yina, “ba ke bokila yandi kento ya kindumba.” Mu ke na kuzonzila yina ya kimuntu ntangu yayi, samu na kufwanikisa yawu na kimpeve. Kana kento yayi lendaka sala disumu ya mutindu yayi, na yina ba me tula yandi kidimbu mutindu, “kento ya kindumba,” kana yandi kele na babakala zole yina ke na kuzinga na ntangu mosi. Na yawu, yandi me zimbisa, na kusalaka yayi, bamuswa ya yandi na ntwala ya Nzambi mpe Mazulu, na kusalaka mutindu yina. Ya kieleka ya ke mutindu yina. Ba ke basisa yandi na ngaanda ya ekonomi ya Nzambi, landila Masonuku yina mu me tanga.

<sup>57</sup> Mutindu mosi dibuundu, ntangu yandi ke meka na kuvukisa credo mpe denomination na Ndinga ya Nzambi. Yandi lenda ve kukwela na denomination, mpe kuvwanda Kento ya makwela ya Kliso, na ntangu mosi. Yandi fwana kufwa na mosi to yankaka. Musiku me tuba mutindu yina, awa. Ya kele na misiku mingi na kati ya Ndinga ya Nzambi. Mpe ya kele musiku ya Yandi, Paul ke na kuzonzaka kima mutindu mosi awa. Yandi lenda ve kukwelana na dibuundu ya credo ya yinza, mpe kuvwanda Kento ya makwela ya Kliso, samu ti yandi...mosi kele ya kuswaswana na yankaka. Ntangu yayi, beno bambuka moyo.

Beno ke tuba, “Mbote, beto ke kwikilaka *yayi*, kasi beto ke kwikilaka *Yina* ve.”

<sup>58</sup> Kana beno me kwelana na Kliso, Kliso kele Ndinga ya Nzambi. Na Santu Jean, kapu ya Ntete, me tuba, “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe mutindu mosi kumaka nsuni mpe zingaka na kati-kati ya beto.” Kliso

vwandaka Ndinga ya moyo. Yandi vwandaka ntangu nionso Ndinga. Yandi kele kaka Ndinga. Yandi ke vwanda ntangu nionso Ndinga. Yandi vwandaka kaka kumonisama ya binama ya Nzambi, samu ti Yandi vwandaka Mwana ya Nzambi.

<sup>59</sup> Mpe mwana nionso kele kinama ya tata ya yandi, mpe kaka mutindu beno vwandaka na menga ya tata ya beno, na nzutu ya tata ya beno ntangu yandi vwandaka ntwenia ya bakala, beno vwandaka na kati ya yandi. Kasi, yandi lendaka ve kuvwanda na kubundana na beno, samu yandi zabaka beno ve. Kasi na manima, na nzila ya kivumu ya mama, ba nataka beno na ntoto mpe kumaka na kifwani ya tata ya beno, na yina yandi zolaka kubundana na beno.

<sup>60</sup> Mpe mutindu mosi beno vwandaka, bana ya babakala ya Nzambi mpe bana ya bakento ya Nzambi, ntete ya vwanda na ngonda, bambwetete, to molécule. Beno vwandaka bana ya babakala mpe bana ya bakento ya Nzambi, samu ti beno kele kaka kumonisama ya binama yina vwandaka na kati ya Nzambi na mbandukulu. Samu ti, ya kele kaka na mutindu mosi ya Luzingu ya Kukonda nsuka, mpe ya vwandaka beno, ntete. Beno zaba kima ve na zulu ya yawu. To dyaka beno zabaka ntangu beno vwandaka na tata ya beno ya ntoto, kasi beno me monisama na...na kifwani ya yandi. Na kifwani ya Nzambi ba me sala beno, mpe ba me monisa beno samu na nkembo mpe kubundana ya Nzambi.

<sup>61</sup> Mpe, na yina, ya kieleka mutindu menga ya beno zolaka vwanda na kati ya tata ya beno, na ntwala ya mbutukulu ya beno ya kimuntu, menga ya beno ya kimpeve zolaka vwanda na kati ya Nzambi, samu ti beno kele nzonzolo ya binama ya mabanza ya Yandi, na ntwala ya mbandukulu ya yinza. Kieleka. Ya kele ve na mutindu ya kuluta na lweka ya yawu. Ya kele kieleka. Ntangu yayi, ntangu yayi beto ke tala, kuna, Luzingu yina kele na kati ya beno, Luzingu ya Nzambi na kuvwandaka na kati ya beno, kubanda mbandukulu ya yinza.

<sup>62</sup> Ntangu yayi, ntangu yayi, beno lenda ve kuvukisa credo ya denomination na Ndinga, samu ti bawu kele ya kuswaswana mungi, mosi na yankaka.

<sup>63</sup> Ya kele kieleka yina Satanamekaka na kusala na dibanza ya yandi ya mayela na Eve. Yandi tubaka...yandi ndimaka ti Nzambi tubaka yawu, kasi yandi tubaka, "Ya kieleka, nge ke kufwa ve." Beno me mona? Mpe bawu ke kwikilaka yawu.

<sup>64</sup> Mpe yawu yina credo me sala, na nkokila yayi. Denomination me kabula bantu na Ndinga ya Nzambi. Yesu tubaka ve, ntangu Yandi kwisaka, "Beno, na nzila ya binkulu ya beno, me sala ti Misiku ya Nzambi kusala ve kisalu na bantu"? Mpe na nzila ya credo ya beto, beto me kabwana na kubundana ya Mpeve-Santu samu na kupakula Ndinga ya Nzambi yina me kubama

samu na nsungi yayi. Beto me kabula bantu mingi, na nzila ya denomination, ti bawu lenda ve kuzwa siansi ya kumona Yawu.

<sup>65</sup> Ntangu yayi, Nzambi, Yandi, na konso nsungi, Yandi ke bwela kitini ya malu-malu ya Buku ya Yandi. Yawu nyonso ke vukana kintwadi.

<sup>66</sup> Mutindu nzutu ya munu me tungama. Ba me tuba na munu ti ya bandaka na kati ya colonne vertebrale, kasi nionso vwandaka ve colonne vertebrale. Na yina basikaka bampanzi, mpe na... ba-poumon, mpe na manima maboko, mpe maboko, mpe makulu, mpe nyonso yina, mpe ya basikaka samu na kuvwanda muntu yina mu kele.

<sup>67</sup> Mpe mutindu mosi Nzambi monisamaka na mbandukulu. Mpe na nsuka Yandi monanaka mutindu Yehowa, Nzambi Tata. Na manima Yandi monanaka mutindu Nzambi Mwana, na kati ya Yesu Klisto. Ntangu yayi Yandi me monana mutindu Nzambi Mpeve-Santu. Nzambi mosi, ntangu nyonso, bakumonisama tatu ya Nzambi mosi—mosi.

<sup>68</sup> Ntangu yayi, beto ke mona na yayi, ti, konso nsungi, Nzambi me kabula Ndinga ya Yandi kubanda mbandukulu.

<sup>69</sup> Kaka mutindu nsobolo kwisaka. Kaka mutindu kima ya ntete Nzambi vangaka, na kutala, ya vwandaka... Beto tuba ti Yandi vangaka luzingu ya bayinti, ntete. Na manima Yandi vangaka luzingu ya kibulu, yina vwandaka landa. Na manima Yandi vangaka luzingu ya muntu, na manima. Mutindu ya nsobolo, na kuvumbukaka na zulu mingi.

<sup>70</sup> Mutindu mosi ya vwandaka na Nzambi mpe Dibuundu ya Yandi. Kunungisama na yisi ya Luther. Kusantisa-... Ya kele kukatula Kento ya Yandi ya makwela, ntangu yayi. Yandi ke na kuvangaka Kento ya Yandi ya makwela. Kunungisama na yisi ya Luther; kusantisama na yisi ya Wesley; mpe nyonso yina, beno me mona. Yandi, nsobolo ya Mpeve yina pesamaka ya kulutila mpe ya kulutila, samu ti Nzutu kele yinzo, yina ke na kwiza na Yintu, yina kele Klisto, Nzutu ya Klisto.

<sup>71</sup> Ntangu yayi, Yandi, mutindu kento, kana Yandi me kwelana na Klisto Ndinga, Yandi lenda ve kukwelana na dibuundu mosi na ntangu mosi, samu ti Yandi kele ya kukangama na yawu. Yandi ke... lenda zinga ve na babakala zole na ntangu mosi. Ba kele ya kuswaswana, mosi na yankaka. Mosi kele yina Nzambi fidisaka, yankaka yina kele muntu me sala, na yawu bawu kele ya kuswaswana. Yandi tubaka, "Bika ti konso ndinga ya muntu kuvwanda luvunu; ya Munu kuvwanda Kieleka." Nzambi tubaka yawu.

<sup>72</sup> Kaka ya kuswaswana na mosi na yankaka, mutindu musiku vwandaka na lemvo, mutindu Paul vwandaka zonzila awa. Mosi fwana vwanda kufwa, samu na kuzwa yankaka. "Mpe kana yandi meka na kuvukisa bawu, ba ke bokila yandi kento ya kindumba." Oh! Beno banza na yawu. Na New York, na

Arizona, bisika nyonso na yinsi, beno banza na yawu. Nzambi tubaka, "Kana yandi meka na kukwelana na babakala zole na ntangu mosi, ba ke bokila yandi kento ya kindumba." Kento ya kindumba lendaka kota na Mazulu? Nzambi lendaka kwelana na kento ya kindumba? Ya kieleka ve. Yandi lombaka beto na kusala yawu ve. "Ba ke bokila yandi kento ya kindumba."

<sup>73</sup> Na yina, bana ya yandi, kana yandi kele kento ya kindumba, bana ya yandi kele bana ya makangu. Bana ya makangu! Ya makangu na yinki? Na dibuundu ve, kasi na Ndinga. Yandi kele ya makangu. Wapi kizizi ya Apocalypse 3 yayi awa, ya nsungi ya dibuundu ya nsuka ya Laodicée! Wapi mutindu ya kimvuka ya makangu! Wapi mutindu ya kuvukana ya denomination! Tiya ve madidi ve, ke na kulandila mpe kukibokila bawu mosi Baklisto, mpe ke manga Ndinga ya Nzambi, "Ke lakisa mutindu ya kinzambi, kasi ke manga ngolo ya yawu," mutindu profete tubaka ti bawu ke vwanda.

<sup>74</sup> Makwela kele musiku ya kulutila ntama na yinza. Makwela salamaka na mbala ya ntete, mpe ya bakaka lufulu, na kati ya disamba ya Eden.

<sup>75</sup> Ba me pesaka na kento mwa bankadulu ya kuswaswana yina yandi fwana ve kubebisa. Yawu yina ba me pesaka na kento. Ya kele ve na kivangu mosi na zulu ya ntoto mutindu kento. Ya kele ve na yimbwa ya kento, ya kele ve na kibulu ya kento ya mutindu mosi, yina ba pesaka nkadulu yina mutindu kento.

<sup>76</sup> Kento vwandaka ve na mbandukulu ya luvangulu, samu ti Nzambi zabaka ti yandi ke kubwa. Bibulu ya bakento nyonso yankaka lendaka sala ve pité. Kento kele kaka yandi yina lenda sala pité. Kana ba salaka yandi na mutindu ya kisina, yina zolaka vwanda ya kuswaswana na ndwenga ya nene ya Nzambi. Beno me mona? Ba salaka yandi kinama ya fioti ya bakala.

<sup>77</sup> Kasi samu ba tulaka yandi na lweka, Nzambi pesaka yandi kisalu ya santu, samu na mpulusu. Yandi kele na bankadulu yina yandi lendaka bebisa ve.

<sup>78</sup> Kana yandi me bebisa yawu, yandi ke vwanda na mvindu luzingu ya yandi nyonso. Ata ti yandi me zimbana kasi ba ke nungisa yandi fioti ve. Mu ke simba yawu na mwa ntangu fyoti. Mu kele na Masonuku na zulu ya yawu, na baminuti fyoti. Ba lenda lemvokila yandi samu na mvindu ya yandi, kasi yandi lenda ve kunungisama na luzingu yayi. Ya kele ntangu nyonso dyambu ya yandi. Beno tala ntangu yayi. Ba me pesa yandi yayi. Ba lendaka lemvokila yandi, kasi ba ke nungisa yandi ve.

<sup>79</sup> Nzutu ya yandi me pesama na yandi, ya kele kibumbulu ya santu ba pesaka yandi na Nzambi. Yimbwa ya kento ve, ndeke ve, kibulu yankaka ve, kivangu yankaka ve mutindu yina. Ve. Yandi kele yandi mosi kaka. Na yawu, yandi kele... Ya kele samu na yina ya kele ya santu mingi, yandi fwana kunata luzingu na

ntoto. Nzutu ya yandi kele kivumu ya luzingu, na yina ya kele samu na yina ba me pesa yandi kibumbulu yayi ya santu.

<sup>80</sup> Ntangu yayi awa kele kisika beno lenda wisana ve, mingi, beno ba-théologien. Ya kele yina bebisaka bantu nyonso, ya kele pité na mbandukulu. Kivumu ya yandi kumaka ya mvindu. Yandi butaka mapasa yina, Caïn mpe Abel. Kisalu mosi, bana zole. Beno longuka Masonuku. Uh-huh.

<sup>81</sup> Beno tala ntangu yayi. Beto ke mona ti nzutu ya yandi kele kivumu, mpe na yina ya kele kibumbulu ya santu, ve samu na kutula yawu mvindu. Ntangu yayi, mu ke na kuzonzila ntangu yayi, na kunataka yayi na kifwanukusu, samu na kulakisa beno kisika Dibuundu kele. Mu ke na kuzonzila beno ve bakento. Nyonso yina beno kele, ya kele na kati-kati ya beno na Nzambi, to beno babakala. Kasi mu ke na kuzonzila Dibuundu mpe Klisto.

<sup>82</sup> Ntangu yayi, yayi me pesama na yandi, samu na kubasisa luzingu yina kaka Nzambi Yandi mosi lenda pesa. Bakala ya yandi lendaka vwanda na nkuna na kati ya yandi, kasi ya kele Nzambi yina fwana basisa luzingu. Ya kieleka. Ya fwana kwisa, luzingu nyonso fwana katuka na Nzambi. Luzingu nyonso fwana katuka na Nzambi. Ya kele ya kubeba, mpe ya kele yina ke salaka yawu disumu, kasi luzingu fwana katuka na Nzambi. Yandi kele Yinto ya luzingu. Ntangu yayi yandi kele na sa-... mosi....

<sup>83</sup> Mu zola zonzila bima tatu awa yina yandi fwana bika ve. Ntangu yayi, mu ke na kuzonza, beno bumba dibuundu na dibanza na yina mu ke na kuzonzaka yayi na kento ya yinza, mutindu Paul me tuba awa, na kapu ya 7 ya ba-Romain.

<sup>84</sup> Yandi kele na kibumbulu ya santu ya ngolo yina Mfumu me pesa yandi, ngolo mosi. Kima yankaka ve ke simba yawu kasi kento. Kieleka. Yina pesamaka na yandi na Nzambi. Yandi fwana ve kubebisa ngolo yina.

<sup>85</sup> Kana yandi me sala kima ya yimbi, yandi fwana funguna yawu na bakala ya yandi ntete bakala kubaka yandi, mpe yandi fwana sungika yawu. Mutindu mosi dibuundu yina kwelanaka na musiku, fwana kwiza mpe na ntwala ya Klisto, na ntwala ya makwela ya zole. Yandi fwana funguna yawu. Kana yandi sala yawu ve, mpe yandi ke zinga na bakala ya yandi bamvula kumi mpe na manima yandi ke funguna yawu, yandi kele na muswa ya kukatula yandi mpe kukwela kento yankaka. Ya kele Masonuku. Kindumba kele luzingu ya mvindu.

<sup>86</sup> “Joseph, kuvwanda na boma ve, samu na kubaka na nge Marie kento ya nge, samu ti kivumu yina kele na yandi kele ya Mpeve-Santu.” Yandi vwandaka yindula na kufwa makwela na yandi na kingenga, beno me mona, na manima yandi vwandaka dezia fiancée na yandi. Ntangu beno kele fiancé na yandi, landila mutindu Nzambi kele na dyambu, beno me kwelana na yandi.

<sup>87</sup> Beno tala ntangu yayi. Yandi kele na kibumbulu ya santu ya ngolo yina ba pesaka yandi, yina ba yandi na Mfumu. Nzambi pesaka yandi ngolo yina. Kaka mutindu ya vwandaka na disamba ya Eden, yandi lenda tuba “yinga” to “ve.” Yandi kele na kibumbulu ya santu ya bukento yina ba pesaka yandi, ti yandi fwana kubuka ve. Bukento mu ke na kuzonzila awa kele ndiatulu ya yandi, nkadulu ya yandi na ntwala ya babakala. Na kubikaka ve bakala nyonso . . .

<sup>88</sup> Beno tala na ba-écran yayi mpe beno ke mona ba-vedette ya cinema ke na kuyambaka bakento yayi, mpe ke na kuplesaka bawu ba-bize, mpe nyonso, na bawu. Kento yina ke sala yawu, kele na nkadulu ya yimbi. Yandi fwana vwanda ya kuvedila, na ngaanda ya yina. Kasi, beno me mona, na kati ya ntima ya yandi . . . Ntangu, ba-glande yayi, ba-glande ya sexe, ke vwandaka na bikoba. Bakala yina ke yambana na kento, kieleka yandi kele, na kutala, yandi me sala pité. Ba-glande ya sexe kele na bikoba ya kento mpe na bikoba ya bakala. Yandi lendaka pesa yandi bezé na diboko, ya lendaka vukana ve na ba-glande ya bawu. Kasi ba-glande ya sexe kele na bikoba. Mpe beno tala buzoba nyonso yayi na Hollywood bubu yayi, ya bima nyonso yayi ya mvindu mpe ya zola bisika nyonso na bakento, mpe nionso yina, mpe bana-bakento ya fioti vwandaka tala yawu nionso. Kuyituka ve ti bumuntu ya beto me pola mpe me beba, mpe ya me kuma mvindu, beno me mona, samu ba me tula yawu na ntwala ya bana. Ya kele kieleka. Ya fwana vwanda mutindu yina samu na kilumbu ya nsuka.

<sup>89</sup> Ntangu yayi beno bumba dibuundu na dibanza. Yandi ke na kuyambanaka mpe ke pesana bize, mpe ke vukana na nyonso yankaka kasi na Ndzinga, yandi ke bika diabulu, ndongosolo mpe bakusosa-sosa ya bantu, mpe nyonso yina.

<sup>90</sup> Ntangu, science, ndongosolo, nyonso, kele kieleka ya kuswaswana na Nzambi. Sysiteme nyonso ya civilisation yina kele na beto ntangu yayi kele kieleka mbeni ya Klisto. Sysiteme ya ndongosolo kele mbeni ya Klisto. Civilisation kele mbeni ya Klisto. Ya ke telemina Nzambi. Beno ke tuba, “Ya ke telemina civilisation?” Nzambi ke kuzwa civilisation, mosi ya bilumbu yayi, yina ke kuzwa ata lufwa ve na kati ya yawu. Civilisation yayi ya bilumbu yayi ke kwisa na nzila ya Satana. Mu ke talisa yawu na beno, kana Mfumu zola, na nkokila yayi, na ngaanda ya Biblia. Bima nyonso yayi kele ya Satana. Civilisation ya beto ya malu-malu ke kuzwa ata mosi ve ya yayi na kati ya yawu.

Yandi kele na bukento yayi ya santu.

<sup>91</sup> Kukondwa ntembe ti babakala ke salaka na bakento mutindu bawu ke salaka, ya kele samu ti bakento ke salaka na babakala mutindu bawu ke salaka. Yandi ke talana na bima yayi na bakupe, mpe bilele ya kiyungulu, mpe bilele ya babakala mpe nyonso yina, kuna na bala-bala, yandi ke na kudenda. Ata

nyonso yina yandi ke tuba, yandi lendaka vwanda mutindu ngolo samu na bakala ya yandi na yina yandi lendaka vwanda, kasi, na ntwala ya Nzambi, "Yandi kele kento ya kindumba." "Muntu nyonso yina ke tala kento samu na kulula yandi me sala yimeni pité na yandi na kati ya ntima ya yandi." Mpe yandi monikisaka ti yandi kele mutindu yina.

Mpe ya kele kieleka yina dibuundu me sala na yinza.

<sup>92</sup> Beno tala. Yina me pesama na yandi: ngolo ya santu, bukento ya santu, mpe na manima bumama ya santu, samu na kupesa lukumu na bakala ya yandi.

<sup>93</sup> Beno tala kaka bubu yayi. Na bambanza yankaka, na bambanza mingi, bawu kele mpe na bafeti ya nene na kati ya yina ba ke bokila société, bamambele ya dibuundu, mpe. Ba ke tula bayimpu ya bawu na ntoto, mpe bawu nyonso vwandaka me kola malafu mpe vwandaka losa bafungula ya bawu na kati ya yawu. Konso kento ke kwenda mpe ke baka fungula na yimpu, samu na kuzaba bakala yina yandi ke zinga na yandi na nsuka ya sabala. Bafeti ya mutindu na mutindu! Na yina, mu kele na mingi ya kutuba awa, kana Mfumu zola, Mu kele ve na ntangu ya kukota na yawu. Mvindu ya mutindu yayi!

<sup>94</sup> Mpe dibuundu kele kaka yimbi, kieleka, yandi ke na kusalaka kindumba na nyonso, mpe yandi fwana ve kuvukana na bima yayi. Yandi zolaka bikana na Ndinga.

<sup>95</sup> Bayinzo kele mbote mingi. Balupitalu kele mbote mingi. Bima nyonso yankaka yayi kele mbote mingi. Manaka ya ndongosolo, ya kele mbote mingi. Beto fwana kuzinga awa, beto fwana kutanga, kusonika. Ya kele mosi ya ekonomi.

<sup>96</sup> Mutindu, beto zolaka lwata bilele ve, na mbandukulu. Mu ke longa na zulu ya yawu, na manima ya sabala yayi, kana Mfumu zola. Kasi beto fwana lwata bilele samu Nzambi pesaka beto bilele. Kasi, na mbandukulu, beto vwandaka ve na nsatu ya yawu. Beto vwandaka ya kufika na vwale.

<sup>97</sup> Ntangu yayi yandi kele ya kufika na disumu ya yandi. Yandi zaba mpe ve ti yandi ke na kusumuka, beno me mona, mutindu yandi vwandaka kuna. Na . . . Ntangu yayi yandi kele ya kufika na dyabulu; kuna yandi vwandaka ya kufika na Nzambi. Luswaswanu ya yawu.

<sup>98</sup> Ntangu yayi beto ke mona ti ba pesaka yandi kibumbulu yayi ya santu ti yandi fwana kubuka yawu ve: ya bukento, kusala, kuzwa nkadulu ya yandi, kusansa bana ya yandi, kuvwanda ya buzitu na ntwala ya bakala ya yandi.

<sup>99</sup> Ntangu yayi, ba ke sala keba mingi na yawu kulutila kima ve na yinza. Beno fwana vwanda na bureau ya munu kilumbu mosi mpe kumona babakala ke nata bakento ya bawu, kisika bawu ke meka na kuvwanda ya kusungama na Nzambi mpe kufunguna babakala nyonso yina bawu zingaka na bawu, mpe

nyonso yankaka, kubanda bawu me kwelanaka. “Oh,” beno ke tuba, “ya kele...” Ve. Ya kele bantu ya Pantekote. Uh-huh. Bayankaka ke kwiza ve. Na yawu ya kele...

<sup>100</sup> Mu ke tubila wapi mutindu ya lendaka kwenda, na ntangu beno ke vukana na yinza, dibuundu, mpe bamvwatu nionso mpe bima yina beto ke na yawu. Beto kele diaka ve mutindu na Pentecote ya kisina vwandaka mutindu kilumbu me swaswana na mpimpa. Beto me kwenda kisika mosi kuna, na kati ya potopoto ya mpimpa kisika mosi kuna, mpe beto me zimbana.

<sup>101</sup> Wapi kibumbulu ya santu! Wapi kiyeka samu na kento! Ntangu yayi beno me mona samu na yinki yandi kele kifwanikusu ya Dibuundu, yina kele na kizitu mosi. Mutindu kento kele na kiyeka ya santu samu na bumama ya yandi, samu na bangolo ya yandi, samu na bakala ya yandi, Dibuundu kele na kiyeka ya santu na ntwala ya kisambu mpe na ntwala ya Ndinga, mpe ntwala ya Klisto, kaka mutindu kento kele na yawu.

<sup>102</sup> Mpe mutindu kento ke basika na bakala yankaka; ntangu dibuundu ke kwenda na manaka ya bandongosolo yayi, mpe manaka ya lutungu mpe balukolo, mpe nionso yina. Mu ke telemina bawu ve. Bawu kele mbote mingi. Bawu ke sadilaka lukanu ya bawu. Kasi bawu kele ve...

<sup>103</sup> Yesu tubaka ata fioti ve, “Beno kwenda, beno sala balukolo.” Yandi tubaka, “Beno longa Ndinga.”

<sup>104</sup> Ya kele kisika yina ba bikaka Yawu. Ve kusala balukolo, balupitalu, mpe nionso yina. Ya kele mbote mingi, kasi yina kele ve kisalu ya Dibuundu. Kisalu ya bawu kele kulonga Nsangu ya mbote, kasi beto me sala nyonso yankaka na kisika ya yina. Mpe beto me kota kuna, kaka mutindu Satana salaka, mpe me vukisa yawu na Nsangu ya mbote mosi, kima yankaka, mpe kima yankaka, tii ya ke vwanda na kimvuka ya kima mosi ve. Kubeba, ata mpe nionso, yinza ya muvimba! Beno tala kubendama ya yinza.

<sup>105</sup> Mu vwandaka tanga *Reader's Digest*, awa ntama mingi ve, ti bana ya bakento ya ntwenya ke na kulutaka na menopause, mpe babakala, nsobolo ya luzingu, kati-kati ya bamvula makumi zole mpe makumi zole na tanu. Ba ke luta na bamvula ya bawu ya kati-kati. Kubeba (Samu na yinki?) samu na kusosa-sosa ya bantu ya mayele mpe bima yina me beba, kubanda na bima ya kimuntu beto lendaka tula na kati ya nzutu ya beto. Beto kele kima mosi ve kasi nkonga ya kubeba yina ke na kufwa.

<sup>106</sup> Ntangu yayi, ya kele yina dibuundu kele, mpe. Ya kele mutindu mosi.

<sup>107</sup> Yandi kele kifwanikusu. Yandi kele na bangolo ya mutindu mosi ya ntalu na nzila ya Mpeve, yina ba pesaka na Yandi, samu na kukeba Mpeve mpe Ndinga, mpe salaka ata mbala mosi ve pité na kima ya yinza to kima mosi. Beno vwanda mwense samu na Ndinga, mutindu kento fwana vwanda ya kuvedila samu na

bakala ya yandi. Ya kele kibumbulu ya santu, samu na kupesa lukumu na Ndinga ya Mfumu ya Yandi na zulu ya credo nionso yina bantu me sala, ndwenga, mutindu denomination yina me salama na bantu. Dibuundu me kuzwa kibumbulu yina.

<sup>108</sup> Kana bawu tuba, “Mbote, dibuundu ya munu...” Mu ke kipe ve yina dibuundu ya beno ke kwikilaka. Kana ya kele ya kuswaswana na Ndinga ya Nzambi, beno vwanda ntama na yawu.

<sup>109</sup> Biblia ke tuba, “Yesu Klisto kele mutindu mosi mazono, bubu yayi, mpe kukonda nsuka.” Marc 16 me tuba, “Bidimbu yayi ke landa bayina ke kwikila.” Kana dibuundu longa mutindu yankaka na Yawu, beno sala yawu ve. Beno ke kufwa na kima yina. Beno ke butuka mbala zole, na kati ya Ndinga ya Nzambi. “Beno kwenda na yinza ya muvimba mpe beno longa Nsangu ya mbote na bantu nyonso.” Ya kele mutindu ntama Yawu zolaka kwenda. “Bidimbu yayi ke landa bayina ke kwikila, na yinza ya muvimba, mpe konso kivangu yina ke kwikila.” Beno me mona mutindu beto me katukila Yawu? Kieleka. Kasi Yandi kele na kizitu ya Yawu.

<sup>110</sup> Kasi ntangu yayi beno tala yina, Hollywood, me baka bima ya ngolo na bakento ya beto.

<sup>111</sup> Mu kele ya kuvwanda awa na kutalaka kiboba ya kento ya luzolo, Mpangi-kento Schrader, mingi ya bakento awa, mpe na manima, mpe Mpangi-kento Moore awa, bakento ya kukula yina ke bambuka moyo na mwa bamvula me luta. Kana mama ya bawu, to bawu, zolaka tambula na babala-bala, mutindu bakento yankaka ke tambula bubu yayi, bamambele ya dibuundu, ba zolaka kanga kento yayi samu yandi kuma kilawu. “Yandi zimbanaka na kutula robe ya yandi.” Mbote, kana ya vwandaka kilawu na yina, ya kele bulawu ntangu yayi.

<sup>112</sup> Mbote, beno tala, yinza ya muvimba ke siamisa ti ya kele bulawu. Beno tala bakufwa bantu mpe bima yina ke salama ntangu yayi na yinza. Beno me mona? Bulawu!

<sup>113</sup> Nionso ke na kukwisa samu na kulungisa Apocalypse. Beto lenda mona yawu, sabala yayi. Na yina, bima yayi ya boma, ya kele ve ya kimuntu. Ya kele bima ya kimpeve, yina ke salaka ti bantu kubokila matadi mpe myongo, mpe nyonso yankaka, na kubwa na zulu ya bawu.

<sup>114</sup> Yinza ya muvimba, nionso yayi ke kota na bulawu, na nswalu nionso, ya kele kaka kuna ntangu yayi. Na yina, beno ke mona bidimbu yina ke tekila yawu. Yawu yina. Ya—ya ke na kutambula kuna na bala-bala, tii na kiti ya yinzo-Nzambi, bulamu ya muvimba, ba ke na kusalaka bima yina muntu lendaka banza ve na kusala mpe kuvwanda ya ntomoso.

<sup>115</sup> Beno tala yina Hollywood me sala na kento. Beno tala mutindu ya kele. Ya yibaka bangolo ya santu ya kento. Beto

lendaka landila mpe kulandila, beto lendaka kwenda ntama. Beno me mona?

<sup>116</sup> Yandi me zimbisa nyonso yayi. Wapi mutindu yandi salaka yawu? Samu ti ya vwandaka na kisadilu ya nene yina ba vwandaka bokila dibuundi, mutindu ya vwandaka na disamba ya Eden. Muntu ya mayele ya yimbi, dyabulu, kotaka na dibuundi kaka mutindu yandi salaka na disamba ya Eden, mpe vunaka yandi na kati ya yawu. Yandi me vunama. Kento ke banza...yandi zola ve kuvwanda na foti.

<sup>117</sup> Eve zolaka ve kusala yimbi. Ya vwandaka ve luzolo ya yandi mosi. Kasi yandi...Biblia me tuba, na Timothée ya Zole, Timothée ya Ntete kapu ya 3, "Yandi vunamaka." Mpe *vunamaka* kele ve ntangu beno ke zola kusala yawu beno mosi. Ya kele ntangu beno me vunama na kusala yawu.

<sup>118</sup> Mpe ya kele kaka kieleka yina me salama bubu yayi. Ba me vuna yandi, na television, na magazine, na bantu yayi, yayi, bima nyonso ya mbote yayi yina bawu ke na kusalaka, kuna na bala-bala. Bana-bakento ya bilumbu yayi, bawu ke tala bamagazine mpe bawu ke tala bafoto. Ba ke tala na bala-bala. Ba ke mona bilele na babutiki. Mutindu Satana, kisadilu yina ya nene ya—ya difelo, me kulumuka na kati-kati ya bantu mpe me vuna bawu na bima yayi! Mpe kento yango ke banza ti yandi kele mbote mingi. Mpe yandi kele ya kufwa mpe zaba yawu ve. Yandi kele ntama mingi na Nzambi. Beno me mona mutindu yandi zimbisaka nyonso yayi, mpe mutindu mayela ya yimbi ya vwandaka?

<sup>119</sup> Bubu yayi, mu zola beno kutala. Yesu zonzilaka yawu. Mpe, kana beno zola kutanga yawu, Yesu tubaka ti kima yayi ke salama (Beno zaba yawu?) na bangunga ya Yandi ya nsuka, kaka na ntwala ya kukomama na kulunsi ya Yandi. Beto tanga kaka yawu, Santu Luc, kapu 23, mpe kaka samu na mwa ntangu fytot, mutindu leso ya lukolo ya Lumingu. Kubanda na nzila ya 27, mu banza ti mu me sonika yawu awa. Yesu ke na kwenda na Calvaire. Beno kuwa na yina mu ke tanga yawu. Mbote mingi. Santu Luc 23:27, mu banza, ya kele kisika beto me kuzwa yawu. Noti ya munu kele na yawu mutindu yina. Yinga. Yawu yayi.

*Mpe kuna landaka yandi kimvuka ya nene ya bantu, mpe...bakento, yina mpe vwandaka bula ntulu mpe vwanda nyonga samu na yandi.*

*Kasi Yesu balukaka na bawu mpe tubaka, Bana ya bakento ya Jérusalem, beno dila ve samu na munu, kasi beno dila samu na beno mosi, mpe samu na bana ya beno.*

*Samu ti, beno tala, kilumbu—bilumbu ke na kwiza,... ti bawu ke tuba, Kiese na bakento ya mikobo, mpe kivumu yina me butaka ve, mpe mabele yina me nwisaka ve.*

<sup>120</sup> Beno banza, bubu yayi, ya kele nsoni samu na yandi na kuzwa mwana. Beno me mona?

*Na manima bawu ke banda na kutuba na myongo,  
Kwisa kubwa na zulu ya beto; mpe myo- . . . mpe  
myongo, Fika beto.*

*Samu ti kana bawu sala bima yayi na yinti ya mubisu,  
yinki bawu ke sala na yinti ya kuyuma?*

<sup>121</sup> Na kuzonzilaka kilumbu yina ntangu bakento ke zola dyaka ve bana. Ba ke zola yimbwa to niawu mosi, to kima mosi ya mutindu yina, kasi yandi ke zolaka diaka ve bana. Samu na yinki? Yandi kele “Mama ya Kiboba Hubbard” kana yandi kele na mwana. Beno me mona? Yandi zola ve. Ya kele—ya kele bisalu ya Hollywood. Ya ke zola ve ti kento ya yandi kuwwanda “Mama ya Kiboba Hubbard.” Na yina yandi ke, bakala ba ke sala yandi mwa lipaso to na kento, mosi, yina ke pekisa bawu na kubuta bana. Bawu zola ve bana.

<sup>122</sup> Yesu zonzilaka yawu. Mpe yinki Yandi tubaka? “Na ntangu yina bawu ke banda na kudila matadi mpe myongo samu na ‘Kwisa kubwa na zulu ya beto.’”

<sup>123</sup> Yandi ke sadila controle ya mbutukulu, na yina yandi lendaka kwenda na bafeti. Yandi zola ve ba yangisa yandi na kunwisa bébé. “Ya ke bebisa yandi. Ntangu yandi me kuzwa kivumu, ya ke vwanda, ya ke bebisa yandi. Yandi ke monana ve mutindu yandi vwandaka.” Mpe bakala ya yandi, yina me zaba kima ve samu na kubika yandi kukwenda mutindu yina. Yandi ke pesa yandi mwana ve.

<sup>124</sup> Yesu zonzilaka yawu. Mpe Yandi tubaka, ti—ti, ntangu bawu vwandaka sala yayi, na ntangu yina ba ke boka samu matadi kubwa na zulu ya bawu. Ya kele Nkwizulu ya Mfumu.

<sup>125</sup> Ba ke futaka kinkuku ya nene ya mbongo samu na kuzwa baniawu, bayimbwa, samu na kubondila. Ya kele kieleka. Yandi fwana bondila kima mosi, samu ti ya kele nkadulu yina Nzambi pesaka na yandi.

<sup>126</sup> Mu talaka. Mu ke zombaka bibulu ya nene. Ulusu ya kento ya ntama na automne, ntangu ba vukisaka yandi na ulusu ya bakala, na ntangu yina yandi kele na bana ya ulusu na kati ya yandi. Bana ya ulusu yina kele na ntela ya kitoko, mu banza ba ke na bakilo makumi yiya na tanu to kulutila. Yandi ke sala ti bawu kwenda mpe bawu mosi kwenda bumbama madidi ya hiver, samu ti yandi ke buta dyaka bana ya ulusu. Ba ke butukaka na Ngonda ya zole. Ulusu me zaba kima mosi ve samu na yawu.

<sup>127</sup> Ba ke butukaka na kati ya mwa basaki. Nzambi ke nataka bawu na kuzibula mwa basaki yina ya fioti, bawu mosi, mwa . . . mutindu mwa basaki ya cellophane. Bawu ke kuzwa nzila ya bawu. Mama ya bawu ke lala mpongi ya ngolo. Yandi me kudya ve kima mosi kubanda Ngonda ya kumi, mpe tii na Ngonda ya zole. Bawu ke kwisa vwanda pene-pene ya yandi mpe bawu ke kunwa mabele ya yandi tii na kati-kati ya Ngonda ya tanu.

<sup>128</sup> Na yina ntangu yandi ke mona bana ya yandi, bawu kele bana ya ulusu ya ntela ya kitoko, mu banza bakilo sambwadi, tanu to sambwadi. Ba me kunwa dibele ya yandi. Wapi mutindu yandi ke salaka miliki, yina kele kisalu ya Nzambi. Yandi ke zinga, yandi mosi, mpe ke basisa miliki samu na bana ya ulusu.

<sup>129</sup> Mpe na manima kana kuvukana na kibulu ya bakala me pesa kima mosi ve, yandi ke kuzwa ata mwana ya ulusu ve, yandi ke kwenda sosa bana ya ulusu ya mvula . . . ya mvula yina me luta, mpe ke bondila bawu na été ya muvimba, samu ti ya kele dibanza yina Nzambi pesaka. Yandi fwana bondila kima mosi.

<sup>130</sup> Mpe kana kento ke kuzwa ve bébé samu na bakala ya yandi, yandi ke baka yimbwa to niawu, to kima mosi. Yandi fwana bondila kima mosi. Ya kele nkadulu ya yandi. Kasi samu na kubuta mwana samu na bakala ya yandi, mpe kusansa yandi samu na kisalu ya Nzambi, yina kele nyonso na ngaanda ya nzila ya yandi. Yandi zolaka . . . Oh, kana yandi—oh, yandi ke vwanda na nsoni, kana yandi sala yawu, na kati ya kimvuka yayi ke zolaka disumu ya mutindu ya bakento yayi ya 1965.

<sup>131</sup> Kizizi ya kieleka ya dibuundu ya bilumbu yayi! To dyaka ve dibuundu ya bilumbu yayi zola ve mosi ya bima yayi pene-pene ya yandi, bana yina ke bokaka, yina ke salaka makelele, yina ke tubaka na bandinga, yina ke basisaka Actes 2:38. Yinga. Yinga. Beno me mona? Yinga. Yandi zola ve bayina ke salaka makelele, ke bokaka, mpe ke dilaka, “Amen! Alleluia!” Na yina, na mwana ya mutindu yina ba ke basisa yandi na mbala mosi na denomination ya yandi. Kana ba vwandaka na mosi mutindu yina na mosi ya mabuundu yayi, na yina, ba zolaka losa yandi na ngaanda na nswalu nionso.

“Samu na yinki beno ke bika bima ya mutindu yayi kusalama?”

<sup>132</sup> Na yawu, beno me mona, yandi kele na kivumu ya kima mosi, samu ti yandi ke na butaka bamambele ntangu nyonso. Kasi yandi zola ve mosi ya bantu yayi ke bokaka, ke salaka makelele, ke niungutaka mambu nionso, Actes 2:38, bivangu ya mawa yina yandi ke banza ti bawu kele. Ya kieleka yawu ke vwalangisa yandi. Ya ke bebisya kizizi ya yandi mpe société ya yandi ya bantu ya science, ya kulonguka, mpe ya dibuundu yina kele. Ba ke losa yandi na ngaanda, na lukutakanu yina ke landa. Yandi lenda ve kuzwa yawu. Na yawu yandi zola ve kuzwa kivumu ya Ndinga, samu ti ya kele kaka mutindu yina ti Ndinga lenda basika.

<sup>133</sup> Ya kubutama na Mpeve ya Nzambi, ya kele na Mpeve ya Nzambi na kati ya yawu. Ya kele ve kukota na dibuundu na nzila ya ndongosolo mpe kutambula na ba-credo, bansuki ya kuzenga, kizizi ya kupakula; ya kele ve na kima ya mutindu yina na kati ya Yawu nionso. Beno ke mona yawu ve na kati ya Ndinga ya Nzambi. Beno ke mona mwana ya mutindu ya ntama, ya kusantisama, ya kufuluka na Mpeve-Santu, yina me butuka

na Mpeve ya Nzambi, ke boka, ke niunguta, ke sala makelele, ke kumisa Nzambi.

<sup>134</sup> Ya ke lutila yandi nyonso. Yandi zola Yawu ve. Oh, ve, tata! Ve, kieleka. Na yina yinki yandi ke sala? Na yina yandi ke buta zole, kizizi ya kupakula, ke lwata bakupe, ya société yayi ya Jézabel, “baniawu” ya makangu, ba ke bokilaka yawu, mu banza ya kele. Beno me mona? Mu banza ti ba ke bokilaka yawu baniawu. Beno me mona? “Beno tala niawu yina ke na kukwenda kuna,” ba ke tuba, to kima ya mutindu yina, beno zaba.

<sup>135</sup> Yandi butukaka, to kwelanaka, vukanaka na bakala ya yandi ya ntete, Adam ya ntete, na nzila ya kento ya kindumba, Ève, kento ya ntete ya Adam. Beno ke tuba, “Kento ya kindumba?” Kieleka yandi vwandaka. Kasi, oh, yandi ke tuba ti Adam yayi, Adam yayi ya ntete, kele ya kufwa. “Oh, kieleka, yandi kufwaka kubanda ntama. Mu me butuka dyaka,” yandi tubaka, “mpe ya kieleka mu me kwelana na Adam ya Zole, Klisto, Ndinga.”

<sup>136</sup> Wapi mutindu? Beno tala yina yandi ke zolaka. Beno tala mbote nzolakani ya yandi, beno zola kumona na nani yandi kele na zola. Ndinga me tuba *Yayi*, kasi yandi ke tuba, “Dibuundu ya munu me tuba *yayi*.” Na yina na nani yandi kele na zola? Nani kele bakala ya yandi? Bambuma ya yandi mosi ke lakisa yina yandi kele. Kieleka kaka, ya ke lakisa yina yandi kele. Beno tala. Yandi butukaka, ntete, na Adam, samu ti ya kele mbutukulu ya yandi ya kimuntu. Beno me mona? Mpe yandi bikaka yawu ata fioti ve. Ya kele nzolakani ya yinza. Yandi ke tuba ti yandi me butuka mbala zole, na Klisto. Kasi zola ya yandi, beno tala, kele Adam, kasi, samu ti yandi ke zolaka yinza.

<sup>137</sup> Mpe kima yankaka—kima yankaka, beno tala mutindu ya bana yandi ke na kubutaka. Yina ke tuba yina tata ya bawu kele, kana ya kele Adam ya ntete to Adam ya Zole. Kana Dibuundu buta mwana ya Adam ya Zole, yandi ke sala mutindu Adam ya Zole ke salaka, mutindu bawu salaka na Kilumbu ya Pentecote. Yina kele kieleka bana ya Zole ya Adam. Beno me mona? Kieleka. Nkadulu ya bawu kele mutindu yandi mpe mutindu kento. Yinga, tata. Bana ya yandi ya bakento, na kizizi ya kupakula, na bansuki ya kuzenga, yina me lwata bilele ya babakala, bapantalon. Biblia me tuba samu na yandi “na kusala yawu ve.” Yandi ke zenga bansuki ya yandi. “Ya kele nsoni samu na yandi.”

Beno ke tuba, “Kanga yinwa, samu na yawu.”

<sup>138</sup> Yawu yina Ndinga ke tuba. Mu ke talisa kaka nkadulu. Yawu yina yandi ke salaka.

<sup>139</sup> Bana ya yandi ya babakala, bana ya yandi ya babakala me butuka na nzila ya yandi, me kangama na zulu ya ndongosolo, malongi ya lukolo, na mwa lukolo mosi ya Biblia, mutindu ba ke bokilaka yawu, na zulu ya mwa lukolo mosi ya lukumu ya bambuta na yina ba ke tubaka kubanda ntama, yina ke na kupasula maki, na kati ya mwa kibumbulu mosi. Bisosa-

sosa ya dénomination, misambidi na mutindu ya Caïn, kaka ya makangu na Ndinga mutindu Caïn vwandaka; kieleka, kaka ya makangu mutindu Caïn vwandaka, kieleka, bisosa-sosa ya ba-dénomination. Beno me mona yinki ya kele?

<sup>140</sup> Nzambi salaka ata mbala mosi ve organisation na denomination. Yandi ke telemínaka yawu ntangu nyonso. Ndinga ya Yandi ke telemínaka yawu.

<sup>141</sup> Kasi ba ke kangama na yawu, na yina beno ke mona yina ba ke basisa. Yina ke talisa nani kele papa ya bawu mpe mama ya bawu. Kieleka. Kieleka. Kaka makangu mutindu Caïn vwandaka. Yina kele mutindu ya mwana yina yandi butaka na Eve. Bawu me kwenda ntama na Ndinga, na yina beno tala yina yandi butaka. Ya kele kaka kieleka yina dibuundi me buta, kima mutindu mosi.

<sup>142</sup> Mu lenda lakisa yawu na beno, na nzila ya Ndinga, ya kele kisika malongi mpe civilisation me kwiza, na nzila ya Caïn. Ya kele kaka kieleka. Samu ti bawu ke tubaka... Kasi bawu—bawu ke tubaka ti bawu kele bana ya Nzambi, kasi ba me butuka na nzila ya denomination, ba me longusa bawu na malongi ya denomination, bima nionso yankaka. Ya kele kaka kieleka. Mayele ya yimbi, mayele mingi! Oh, la la! Mutindu mosi vwandaka nioka, tata ya bawu. Ya kieleka. Kaka na mayele ya yimbi mpe milongi ya science mutindu Caïn vwandaka. Beno me mona? Ya kele kieleka kima mutindu mosi.

Beno ke tuba, “Mpangi Branham, ya kele kieleka?”

<sup>143</sup> Beno baka Genèse 4:16 mpe beno tala. Beno vutuka awa na Genèse 4:16, kaka na minuti, beno ke mona mutindu ya salamaka.

*Mpe Caïn kwendaka... na mwandulu ya MFUMU, mpe zingaka na ntoto ya Nod, na zulu ya esete ya Eden.*

*Mpe Caïn zabaka kento ya yandi; mpe yandi kuzwaka kivumu, mpe butaka Enoch: mpe yandi tungaka mbanza mosi, mpe bokilaka nkumbu ya mbanza yango, na manima... mwana ya yandi ya bakala, Enoch.*

<sup>144</sup> Ya landilaka mutindu yina tii na Tubal, landilaka, kuna na kisika bawu bandaka, bawu bandaka na kusala bisadilu, miziki, mpe nionso yina. Civilisation kwisaka na Caïn, kieleka, kutunga bambanza, bisadilu. Bantu ya mayele kwizaka na nzila ya Caïn, nkuna ya nyoka. Ntangu yayi beno tala nzila ya 25:

*Mpe Adam zabaka kento ya yandi diaka;*

<sup>145</sup> Ntangu yayi, yandi zabaka yandi mbala mosi mpe yandi vwandaka na bana zole. Beno longuka Masonuku. Yandi kuzwaka Caïn mpe Abel. Kisalu mosi, mpe bana zole. Beno ke tuba...

<sup>146</sup> Ba tubaka na munu, ntama mingi ve, ya lendaka salama ve, kusalama. Beto kele na diambu mosi na Hollywood. Hollywood?

Beto kele na diambu mosi na Tucson na ntangu yayi, kuna na tribunal. Kento mosi butaka mwana ya ndombe mpe mwana ya mundele, na mbala mosi. Bawu ke tuba ti yandi lenda ve kusala yawu. Yandi lenda kuzwa bankuna zole ya lubutu, mpe. Bawu kele na yawu kaka na yinzo ya lusambusu ntangu yayi. Mu zaba ti bayimbwa ke sala yawu. Bibulu ke sala yawu. Mpe yandi kele kuna, bakala ya mundele tubaka, “Mu ke simbisa mwana ya munu mosi, kasi yandi ve.”

<sup>147</sup> Mpe kento yango salaka funguna. Yandi zingaka na bakala ya yandi na suka yina, mpe bakala ya ndombe na manima ya midi yina. “Kana ya me salama,” dokotolo me tuba, “na kati-kati ya bangunga makumi zole na yiya, ya ke salama kana ya kele na nkuna yankaka ya lubutu kuna.” Mpe yandi salaka yawu kuna.

<sup>148</sup> Mpe ya kele kieleka yina salamaka awa. Caïn yina... Satana, na suka yina, na kati ya nyoka; mpe Adam, na manima ya midi yina. Ntangu yandi... Mpe yandi kuzwaka bana zole.

Ntangu yayi, *Adam zabaka kento ya yandi diaka* (mbala ya zole); *mpe yandi butaka mwana ya bakala*,...

<sup>149</sup> Beno bambuka moyo, ya kele na kisika mosi ve na kati ya Biblia yina me tuba ti Caïn vwandaka mwana ya Adam. Ya me tuba, “Yandi vwandaka mwana ya dyabulu,” Adam ve, “dyabulu.”

*...zabaka kento ya yandi* (mbala ya zole), mpe zabaka... mpe kuzwaka mwana ya bakala, mpe bokilaka yandi na nkumbu ya Seth: *Samu ti Nzambi, yandi tubaka, me pesa...* (Yina vwandaka ve Nkuna ya kieleka)... mpe pesa munu nkuna yankaka na kisika ya Adam, yina Cain kufwaka. Na yawu...

*Mpe na Seth, na yandi diaka mwana ya bakala butukaka; mpe yandi bokilaka yandi Enosch: mpe na manima bantu bandaka na kubokila nkumbu ya MFUMU.*

<sup>150</sup> Ve na nzila ya Cain, ti nsungi ya dikanda, kasi na nzila ya dikanda Seth.

Na yawu, “Caïn kele ya muntu ya yimbi.” Kuna me katuka nyoka.

<sup>151</sup> Ntangu yayi beno tala. Biblia ke tuba pwelele awa, ti, “Bakala ya yandi ya ntete fwana vwanda ya kufwa,” ba ke bengana yandi kaka ve. Yandi fwana vwanda ya kufwa.

<sup>152</sup> Mu me longa kaka na zulu ya *Makwela Mpe Kufwa Makwela*, mpe beno nyonso zaba yawu. Mu ke na kuzonzila ve ntangu yayi, na mutindu nyonso, dibuundu yayi awa, kasi bisika nyonso na yinsi. Mbote mingi. Ntangu yayi beno me mona yina salamaka kuna, na *Makwela Mpe Kufwa Makwela*. Ntangu ya...?... Bidimbu Sambwadi zibukaka, yina basisaka Kieleka na kati ya yawu.

<sup>153</sup> Na yawu, samu na kukwelana na Adam ya Zole, Klisto, Ndinga, beno fwana kukabwana beno mosi na nzila ya lufwa, na bakala ya beno ya ntete ya denomination, samu ti ya kele ve na mosi ya bawu yina lenda baka Ndinga nyonso ya Nzambi. Beno lakisa kaka munu kisika muntu yina kele. “Oh,” beno ke tuba, “ya munu.” Muntu yankaka ke tuba ya yandi, mpe. Beno tula bawu kintwadi, mpe beno ke tala ti beno kele na foti, ntangu beno ke sala denomination. Beno tanga Apocalypse 17. Na yawu, beno me mona, beno fwana kufwa na kima yina.

<sup>154</sup> Ntangu yayi, mu ke na kuzonzila ve na assemblée yayi ya fioti awa. Mu ke na kuzonzila bisika nyonso na yinsi. Beno fwana kufwa na bakala ya beno ya ntete. Kana beno me vukana na Klisto mpe beno me kwelana dyaka na denomination mosi, beno kele muntu ya kindumba. Beno kele Laodicée.

<sup>155</sup> Dibuundu na yinsi ya muvimba, beto ke landa Yesu Klisto, Ndinga. Samu na kuvwanda na kati ya Kento ya makwela, beno fwana kukwelana na Ndinga ya Nzambi, yina kele Klisto. “Na mbandukulu vwandaka Ndinga; Ndinga vwandaka na Nzambi, mpe Ndinga vwandaka Nzambi. Mpe Ndinga kumaka nsuni mpe zingaka na kati-kati ya beto.”

<sup>156</sup> Ntangu nyonso yina beno ke kangama na kinkulu ya ba-dénomination ya muntu, ba ke bokila beno, na Ndinga ya Nzambi, “muntu ya kindumba.” Ntangu nyonso yina beno kele kisosa-sosa ya credo ya denomination, yina kele ya dibuundu ya denomination yina ke manga Ndinga, beno kele “muntu ya kindumba,” mutindu yina Biblia me tuba.

<sup>157</sup> Yesu tubaka, “Beno lenda ve kusadila banzambi zole na mbala mosi. To beno ke sadila Nzambi to mammon.” *Mammon* kele “yinza.” “Yandi yina ke zolaka yinza, to bima ya yinza, zola ya Nzambi kele ve na kati ya yandi.” Nkuna ya Nzambi lenda vwanda ve na kati ya yandi na ntangu mosi (zola ya Nzambi) zola ya yinza kele na kati kuna. Ntangu Nkuna ya Nzambi ke sala na nzila ya beno, yina kele Ndinga ya Nzambi. Zola ya yinza lenda vwanda ve na kati kuna na ntangu mosi. Ntangu yayi wapi kisika kele bansuki ya nkufi, mpe bakupe, mpe bizizi yina ba me pakula? Ntangu yayi wapi kisika ya kele?

<sup>158</sup> Beno lendaka ve kuvwanda bangolo samu na Klisto, Ndinga ya Nzambi, mpe kusadila denomination yina me salama na muntu na ntangu mosi. Ya kele ya kuswaswana na Ndinga. Paul tubaka awa. “Wapi kisika?” Romains 7.

<sup>159</sup> To beno lenda ve kubuta bana ya babakala ya Nzambi, ya Ndinga ya Yandi, na kimvuka yayi ya makangu ya ba-denomination. Beno lenda ve kusala yawu. Na kati ya kibumbulu ya beno, beno lenda ve kubuta mwana ya Nzambi ya Ndinga. Mu ke tuba na dibuundu. Kasi beno ke tubaka kaka ti beno kele musambidi ya kieleka. Mutindu mosi vwandaka Caïn, mwana ya kento ya kindumba ya Ève, musambidi ya kieleka, tungaka

ba-autel mpe pesaka munkayulu, mpe futaka mosi ya kumi ya yandi mpe salaka nyonso yina kusambidi yankaka zolaka sala. Kasi yandi kondwaka na kuzitisa Ndinga yina. Yandi kondwaka na kuzwa luzayikisu.

<sup>160</sup> Mpe luzayikisu kele kaka kima mosi, luzayikisu ya Ndinga. Yinki kele... Yinki kele luzayikisu? Yesu tubaka, “Na zulu ya ditadi yayi Mu ke tunga Dibuundu ya Munu, mpe mielo ya difelo lenda nunga Yawu ve.” Lukwikilu kele luzayikisu; samu ti Lukwikilu me monisama na beno.

<sup>161</sup> “Abel, na lukwikilu, pesaka na nzila ya luzayikisu (lukwikilu), pesaka na Nzambi munkayulu ya kulutila kitoko na yina ya Caïn.”

<sup>162</sup> Caïn banzaka ti bawu kudyaka ba-pomme. Bawu kele dyaka na dibanza yina, kasi ya vwandaka ve mutindu yina. Ya vwandaka pité, nkuna ya nyoka. Mpe kuna ntangu Bidimbu Sambwadi zibukaka, ya me tuba yawu mpe me talisa yawu. Buku ya munu kele kaka na zulu ya yawu. Mu banza ti beto kele na mafunda awa ntangu yayi. Beno me mona? Beno tala. Ya kele landila Masonuku, kubanda Genèse tii Apocalypse.

<sup>163</sup> Na ntangu ya nsuka, bayinti zole ke na kukuma na nkuna mpe ke na kukitalisa bawu mosi. Beto bawu yayi, kaka bubu yayi, Laodicéé mpe Kento ya makwela, kaka pwelele mpe kitoko mutindu ya lendaka vwanda na katì ya Masonuku, mpe kaka na ntwala ya bizizi ya beno. “Beno lenda ve kusadila Nzambi mpe mammon.” Beno lenda vwanda ve Muklisto yina ke kwikilaka Biblia mpe kuvukana beno mosi na dyambu ya denomination. Beno lenda kaka ve kusala yawu na ntangu mosi. Mosi fwana vwanda ya kufwa, mpe ya ke bika yankaka yina kuzinga.

<sup>164</sup> To dyaka beno lenda buta ve mwana ya Ndinga ya Nzambi. To dyaka dibuundu lenda buta ve. Bawu zola ve mosi ya bawu, bana yina ke bokaka, kuboka mpe kuzonza na bandinga, mpe bima nyonso yina. Bawu, beno lenda ve kusala yawu na dibuundu ya denomination. Bawu ke pesa beno muswa ve. Bawu ke buta bawu ve mutindu yina. Bawu ke telemisa bawu mpe ke pesa bawu mbote mpe ke tuba, “Kana beno me kwikila, beno kele na Yawu. Ntangu nyonso yina beno ke tula nkumbu ya beno na buku, ya kele nyonso yina beno fwana sala.” Beno me mona? Ya kele—ya kele bana ya makangu na Ndinga, ba ke tubaka dyaka ti bawu kele misambidi.

<sup>165</sup> Na yina, dibuundu me kuma na kivumu ya ndwenga ya Satana mpe luzabu! Ba ke tinda bantu ya bawu na lukolo, samu na kulonguka wapi mutindu kutuba “amen” ya kieleka. Bawu ke longusa bawu wapi mutindu kutuba nyonso yayi, mpe kuvwanda kieleka ya mayela. Yinki ya kele? Ya kele kivumu ya diabulu. Satana tulaka Eve kivumu na yinki? Na kukondwa kukwikila na Ndinga, samu na mayele, na mayele, mpe ya me bebisa luvangulu nyonso. Ya kele kieleka yina yandi me sala na

kati ya Ndinga bubu yayi, dibuundu. Yandi kele na kivumu yandi mosi na balukolo ya Biblia mpe balukolo ya bambuta, mpe bima ya mutindu yina, na kutangaka, na kusonika, arithmétique, mpe bawu zaba mingi ve na yina me tala Nzambi kulutila Hottentot ke zaba mpimpa ya ba-Egyptien. Bawu zaba ba-credo ya bawu nyonso, babuku ya bawu ya bisambu, mpe nyonso yankaka, kasi zaba kima ve na yina me tala Nzambi.

<sup>166</sup> Bawu zaba ntangu Ndinga me siamisama, ntangu Nzambi zonzaka kuna mpe kabulaka Ndinga ya Yandi na konso nsungi mutindu bawu vwandaka kwiza. Awa kwisaka Noé, mpe yandi longaka nsungi yina.

<sup>167</sup> Ntangu yayi, yinki zolaka salama kana Moise zolaka kwisa kuna, yandi tubaka, “Beto tunga nzaza”? Yandi zolaka vwanda nyonso na ngaanda ya kifikulu. Kasi yandi vwandaka profete. Yandi vwandaka na luzayikisu ya Nzambi.

<sup>168</sup> Nzambi siamisaka ti ya kele Kieleka. Yandi butaka bana, Israel kuna, mpe talisaka Dikunzi ya Tiya na ntwala ya bawu, mpe siamisaka profete; mpe tubaka kaka kieleka yina Yandi zolaka sala, mpe Yandi salaka yawu.

<sup>169</sup> Bawu tubaka, “Ti Nzambi kuzonza ve. Ti Moïse kuzonza, kana ve beto ke kufwa.”

<sup>170</sup> Yandi tubaka, “Mu ke zonza dyaka ve na bawu mutindu yina, kasi Mu ke telemisa samu na bawu baprofete, mpe bawu ke zonza.”

<sup>171</sup> Kuna telamaka Ésaïe telamaka kuna, tubaka, “Mwense ke kuzwa kivumu.” Muntu mutindu yandi na kilumbu yina . . . Wapi mutindu mwense ke kuma na kivumu? “Samu na beto Mwana me butuka: Mwana me butuka, Mwana me pesama. Ba ke bokila Yandi, ‘Konseye, Ntinu ya Ngemba, Nzambi ya Ngolo nionso, Tata ya Kukonda nsuka.’ Na zulu ya kiti ya kimfumu ya tata ya Yandi, David, Yandi ke yala. Ya ke vwanda ve na nsuka na Kimfumu ya Yandi.” Wapi mutindu ya ke vwanda? Yandi zabaka ve. Yandi zonzaka kaka yina Nzambi tubaka. Ya kele na zulu ya mabanza nyonso, ya mayela. Ya kele na zulu ya kusosa-sosa ya science. Ya kele Ndinga ya Nzambi.

<sup>172</sup> Ntangu yayi beto ke longusaka balongoki ya ba-seminere ya beto na théologie ya mutindu na mutindu ya Biblia mpe bima ya mutindu yina, théologie yina bantu me sala, ya kele na kikunku ya dibuundu kaka ya Laodicée, mutindu Nzambi tubaka ti ya ke vwanda. Oh, la la! Ntangu mu ke tala yawu, mpe ya ke sala ti mu tekita. Yandi kele na kivumu ya mabanza ya kimuntu! Beno fwana vwanda diplome ya lukolo ya nene ntete beno kota. Beno fwana kuzwa . . . beno fwana telama na ntwala ya psychiatriste na ntwala ba ke bieka beno.

<sup>173</sup> Beno ke banza ti Pierre, Jacques, mpe Jean kwendaka na ntwala ya psychiatriste? Beno bambuka moyo ti nkama mosi na makumi zole na zulu kuna, lendaka ve kusonika nkumbu ya

bawu? Beno telama na ntwala ya psychiatriste, beno tala kana bawu...kana bawu nyonso...kana ntalulu ya bawu vwandaka kaka ya kusungama, mpe nyonso yina? Bawu vwandaka na ntalulu, kasi ya vwandaka ve dibanza ya kimuntu to kusosa-sosa ya science. Ya vwandaka na nzila ya Ngolo ya Nzambi. Ntangu Yawu bulaka bawu, bawu zabaka kima mosi ve ya kusala kasi kusala yina Mpeve-Santu tubaka na kusala. Bawu salaka ve keba na muntu mosi ya mayele, yina dibuundu tubaka, mpe yina banganga-Nzambi tubaka, yina *yayi* tubaka, *yina* tubaka. Bawu vwandaka tambula na Kimpeve; bantu ya kukondwa boma.

<sup>174</sup> Jean ya Ntete 2:15, Yandi tubaka, “Kana beno zola yinza, to bima ya yinza, zola ya Nzambi kele ve na kati ya beno.” Beno me mona? Na yina wapi mutindu beno lenda kuzwa kivumu na Ndinga ya Nzambi yina ke fundisa yinza, ke fundisa Hollywood, ke fundisa mutindu ya yawu nionso, ke fundisa bafeti yayi nionso mpe kisunza yina nionso, mpe nionso yina ba ke salaka na nkumbu ya nsambulu? Ya ke fundisa yawu. Wapi mutindu Ndinga lenda pesa kivumu na muntu: wapi mutindu kento yina me zenga bansuki, yina me pakula na kizizi, yina me lwata bakupe?

<sup>175</sup> Wapi mutindu mulongi, ke kwenda kuna na seminere, mpe te tala na Actes 2:38 mpe ke mona ti ya kele ve na muntu na kati ya Biblia yina me kuzwaka ntete mbotika na bisalu yayi, mpe kutuba dyaka ti yandi kele na kivumu ya Ndinga ya Nzambi? Yandi ke na kutuba na beno luvunu! Yandi me tekisa bamuswa ya bukuluntu ya yandi. Yandi me sala pité na zulu ya Kima ya kieleka yina yandi tubaka. Ba me bengana yandi, na kufwa makwela.

Nzambi ke kuzwa Dibuundu ya kuvedila, ya kieleka, Kento ya makwela.

<sup>176</sup> Biblia ke tuba, “Ndinga kele ve na kati ya beno.” Na yawu wapi mutindu ya bana beno ke na kubutaka? Na kivumu ya denomination. Ya vwandaka ve na lufwa samu na kukabula beno na nzolakani ya beno ya ntete.

<sup>177</sup> “Yinki ba-Jones ke banza kana mu ke dila mpe ke zonza na bandinga? Yinki bawu ke banza kana mu kele ya kubotama dyaka?” Wapi buzoba! Beno kele ya kukwelana na Jones? To, beno kele ya kukwelana na dibuundu? To, beno kele ya kukwelana na Klisto, Ndinga?

<sup>178</sup> Ntangu yayi, ya kele samu na yina yandi ke na kubutaka dyaka bana ya yandi. Wapi mutindu ya bana yandi ke kuzwa? Yayi kele bankumbu yina ba ke bokilaka bawu bubu yayi: baniawu, beatles, ba-Ricky, ba-Ricky, ba-Ricketta. Baniawu, beatles, yina kele bamambele ya dibuundu. Ya kieleka. Bawu nyonso kele bana ya yandi ya babakala, bana ya Caïn, yina kele bana ya kibulu ya mayela ya yimbi, kaka ya kufuluka na mafuta ya niosi mutindu bawu lendaka vwanda.

<sup>179</sup> Ntangu yayi beno fiongonina mbote mwa ntangu fyoti, na meso ya beno ya kimpeve, na moyo ya beno. Beno tala pene-pene ya beno. Mu ke na kuzonzaka na yinsi ya muvimba ntangu yayi. Beno tala kaka baminuti fyoti, beno kuna na Branham Tabernacle, beno na ba-tabernacle kuna na Côte Ouest, mpe na Arizona, mpe bisika nyonso beno kele. Beno fiongonina beno mosi baminuti fyoti. Beno ke tuba, “Nsangu yina nge ke na kulongaka, Mpangi Branham, kele na kifu.” Beno fiongonina beno mosi mwa ntangu fyoti. Bika Mpeve-Santu kutala mabanza ya beno na Ndinga, beno ke wisana na Nsangu. Bika ti Klisto, Ndinga ya kupakula, kutala na konsiansi ya beno. Bika Yandi kota na kati ya beno, beno tala kana Yina kele kieleka to ve. Mpe ya kele kaka kima mosi to bima zole yina mu ke na kutubaka, ntangu ya kele na bankama ya yawu.

<sup>180</sup> Biblia ke wisana na kento yina ke zengisa bansuki na yandi? [Dibuundu me tuba, “Ve.”—Mu.] Biblia ke kwikila, ke wisana na tatu, mbotika na nkumbu ya “Tata, Mwana, Mpeve-Santu”? [“Ve.”] Kima ya mutindu yina ve. Biblia ke wisana na kento yina me Iwata bilele ya bakala? [“Ve.”] Mbote, beno baka bawu tatu kuna, ntangu ya kele na bankama ya kulutila. Beno longuka yawu na Nsemo ya Ndinga ya Nzambi.

<sup>181</sup> Beno ke tuba, “Mu kele mambele ya dibuundu.” Mutindu mosi vwandaka Caïn. Mutindu mosi vwandaka Eve. Biblia ke samuna na ntwala, na bilumbu ya nsuka, ti Laodicée ke vanda mutindu mosi.

<sup>182</sup> Bika ti Mpeve-Santu kutala mbote konsiansi ya beno, mpe beno ke wisana na Daniel 5:12, ntangu ntinu-kento kwisaka na ntwala ya Beltsashar, mpe yandi tubaka ti ya vwandaka profete, Daniel, yina vwandaka na kati-kati ya bawu, mpe yandi katulaka bantembe nionso. Beno bika Mpeve-Santu, Yandi kele Profete ya kilumbu yayi, beno bika ti Yandi kwiza na kati ya ntima ya beno malu-malu yayi mpe kufyongonina bima na Ndinga ya Nzambi, mpe bantembe na zulu ya Nsangu ke zimbana. Yandi ke zimbisa bantembe nionso. Beno ke mona ti, ya kele kieleka na Ndinga ya kilumbu yayi.

<sup>183</sup> Beno lenda longa ve nsangu ya Luther bubu yayi. Ya ke kota na kati ya Yawu, kasi ya kele makulu. Uh-huh. Uh-huh. Ba lenda longa Wesley ve. Ba lenda longa Pentecote ve. Beto me luta na zulu ya yawu. Ba me kuma denomination mpe me kufwa. Ba kele mwinka.

<sup>184</sup> Mwinga me basika na dititi, ya kele mutindu ya ntete ya dibuundu. Ntangu yayi, ti ya ke talana ve mutindu mbuma ya ntete yina kwendaka na ntoto, blé.

<sup>185</sup> Ya zole ke basika kele pollen. Yina ke monana kaka ve mutindu mbuma. Ya ke monana mingi mutindu yina. Ya ke na kwiza mingi na kifwani ya mbuma ya kieleka. Kasi matiti ke talana ve mutindu mbuma yina kotaka na ntoto. Ya kele

munati ya luzingu yina vwandaka na kati ya mbuma. Kasi yinki yawu salaka? Yawu salaka dénomination, kaka mutindu nkadulu nyonso yankaka ya yinza ke fwanana na yawu. Yawu kufwaka.

<sup>186</sup> Na manima yinki? Luzingu me basika mbala mosi na kati ya felele. Ya kele na mwa—mwa ba-boule na zulu ya yawu, ya ke monana mutindu mwa—mwa bambuma na kati ya yawu. Beno tala ya ke monana mutindu ya kele mbuma ya kieleka, kasi ya kele ve.

<sup>187</sup> Na yina ya ke kulumuka na mpusu. Mpe yinki ya ke basisa? Mpusu.

<sup>188</sup> Ntangu yayi, beno baka mbuma ya blé, ntangu blé ke basika ntete. Mpe Yesu tubaka, “Mbuma ya blé . . .” Mpe beno baka blé yango mpe beno zibula yawu. Beno ke basisa na yawu mwinga. Beno tala yawu. Beno ke tuba, “Beto kele na mbuma ya blé.” Beno sala keba. Ya kele kaka kieleka mutindu mbuma, kasi ya kele ve na mbuma na kati ya yawu. Ya kele mpusu.

<sup>189</sup> Ya kele na ba-Pentecotide, “Ya kele mingi,” mutindu Matthieu 24:24 me tuba, “ke vuna bantu ya kieleka ya Kusolama na bilumbu ya nsuka, kana ya lendaka salama.” Kasi beno ke benda dikasa na manima ya dikasa, beno ke kuzwa ve mbuma mosi. Mbuma kele kaka kuna na manima ya yawu. Beno me mona?

<sup>190</sup> Mpe kuna Luzingu ke basika na denomination yina, ke kota na mbuma. Na manima yinki ke salama? Ntangu mbuma ke banda na kukula, mpe ke kuma nene mingi samu Yawu lenda fika kima mosi, denomination ke kwenda ntama na Yawu. Samu na yinki beto kele ve na denomination na kati ya Yayi? Ata mbala mosi ve ti yawu ke vwanda. Ya kele mbuma. Ya lenda kwenda ntama mingi ve. Beto me kuma na ntangu ya nsuka. Na yawu yinki Yawu fwana sala ntangu yayi? Kuvwanda na Mvwandulu ya Mwana, samu na kuyela, ya kele kieleka, Ndinga samu na kuyela na kati ya ntima ya beno, samu na kubuta mpe kuzinga yina beto ke na kuzonzila. Yinga, tata.

<sup>191</sup> Na yina beno ke vwanda diaka ve na bantembe, kana beno bika Mpeve-Santu kumonisa Yawu na beno, mutindu ntinkento tubaka samu na Daniel.

<sup>192</sup> Beno lenda tuba, “Yinki yayi fwana sala na kuvutula matondo? Yinki nge ke na kutuba, Mpangi Branham? Yawu yayi, ya kele minutu kumi na tanu samu na kukuma na ngunga ya yivwa. Beno me tuba ve kima samu na kuvutula matondo.” Wapi Nsangu ya bweso, samu na munu! Yinga, kieleka.

<sup>193</sup> Batata ya bizyeti vwandaka vutula matondo mingi samu na mutindu ya luzingu ya malu-malu yina bawu kuzwaka. Na kuvwandaka ya kukabwana na ba-dénomination ya ntama ya Kinglesi mpe credo, bawu lendaka kwelana na Ndinga ya

kupakula samu na nsungi ya bawu; ya kele kieleka, Ndinga ya malu-malu ya nsungi ya bawu, samu na kilumbu ya bawu.

<sup>194</sup> Na yawu beto lenda vutula matondo, mutindu bizyeti, mutindu Abraham, samu beto me kabwana beto mosi na bima ya yinza, bankundi ya beto nyonso ya kisalu. Abraham vwandaka kizyeti. Nzambi me kabula beto na bansambulu nyonso ya kufwa. Mu ke na kuzonza na yinsi ya muvimba ntangu yayi, ba-credo nyonso ya kufwa. Mpe na yinki? Me kabula beto, mpe me zibula na beto yinsi ya malu-malu, Nsangu ya malu-malu samu na kilumbu yayi.

<sup>195</sup> Pentecote yumaka mpe kufwaka, mutindu Luther, Wesley, mpe bayankaka nionso. Ya kele ve kima yankaka kasi nkonga ya mabuundu yina me vukana kintwadi. Bantu ya mbote kele na kati kuna, kasi, bawu fwana basika.

<sup>196</sup> Yinki Yandi salaka? Yandi zibulaka Bidimbu Sambwadi ya Nsangu ya nsuka. Beno me mona yawu? Bidimbu Sambwadi, yina, mansweki nyonso ya bansungi sambwadi ya dibuundu vwandaka ya kukanga na Bidimbu Sambwadi. Basungiki vwandaka ve na ntangu ya kusala yawu na bilumbu ya bawu. Ba vwandaka zinga mingi ve. Kasi luzayikisu yayi ya kusakumuka ya Bidimbu Sambwadi, ya me zibuka na beto na bilumbu yayi ya nsuka, na profesi yina basikaka na Arizona.

<sup>197</sup> Mutindu mu yufulaka Nzambi, kilumbu yina, “Yinki Nge ke na kusalaka na munu awa na kati ya ntoto ya kuyuma yayi?”

<sup>198</sup> Beno zaba ti Moïse sonikaka Ngwisani ya Malu-malu... to Ngwisani ya Ntama? Kieleka yandi salaka yawu. Babuku yiya ya ntete ke pesaka misiku ya bima nyonso: Genèse, Exode, Lévitique, mpe Deutéronome. Yandi sonikaka Ngwisani ya Ntama. Samu na kusala yinki, yandi zolaka bika bankundi ya yandi nionso ya kisalu mpe bankundi ya yandi ya ntima, mpe kukwenda na ntoto ya kuyuma.

<sup>199</sup> Paul sonikaka Ngwisani ya Malu-malu. Ya kele kieleka. Yandi sonikaka ba-Romain, mpe ba-Romain mpe bayankaka nionso kuna, ba-Hebreux na Timothée, mpe nionso yina. Mpe na kusala yawu, yandi zolaka kabwana yandi mosi, mpe kukwenda na Arabie, na ntoto ya kuyuma, bamvula tatu, samu na kuzwa luzayikisu ya Nzambi.

<sup>200</sup> “Oh,” beno ke tuba, “wapi mutindu samu na Matthieu, Marc, Luc, mpe Jean?” Ba vwandaka misoniki yina sonikaka kaka yina Yesu salaka.

<sup>201</sup> Paul kabwanaka mpe vukisaka Ndinga kintwadi. Ya kele kieleka. Mbote, na yina, beno tala, kana ya lombaka yina, mpe ya zolaka kwenda na ntoto ya kuyuma, ntama ya bankundi ya bawu ya ntima...

<sup>202</sup> Beno bambuka moyo na yina, *Wapi Ntangu Yayi, Tata?* Bantu yikwa me kuwaka yawu? Beno tuba, “Amen.” [Dibuundu me

tuba, "Amen."—Mu.] Ya vwandaka kaka kieleka? ["Amen."] Na yina beto kele na luzayikisu na bilumbu yayi ya nsuka, samu na Nsangu ya Mfumu Nzambi samu na kuvukisa Kento ya Yandi ya makwela kintwadi. Ata nsungi yankaka ve ba silaka yawu. Ba silaka yawu na nsungi yayi: Malachie 4, Luc 17:30, Santu Jean 14:12, Joël 2:38. Bansilulu yayi kele kaka kieleka mutindu Jean Mubotiki kukitalisaka yandi mosi na kati ya Masonuku.

<sup>203</sup> Yesu kukitalisaka Yandi mosi. Yinki bawu tubaka? "Ntama na muntu ya mutindu yayi!" "Jean kele muntu ya mfinda." Dibuundu vwandaka ve na lenda ya kuyamba yawu. Ya kele kifwani. To dyaka dibuundu ke yamba yawu ve bubu yayi.

<sup>204</sup> Kasi, samu na Musolami, Nzambi ke na kubokila Musolami. Ba me zaba yawu: ba ke bokila Kento ya makwela, Ndinga, Dibuundu ya kilumbu ya nsuka, Mama yina me soolama ya Mfumu ya beto Yesu Klisto, Ndinga. Kana... Yesu kele Ndinga. Bantu yikwa ke kwikila yawu? [Dibuundu me tuba, "Amen."—Mu.] Mbote mingi. Na yina, Kento ya makwela ke vwandaka ntangu nionso kitini ya Bakala ya makwela, na yina Kento ya makwela ke vwanda denomination ve. Ya fwana vwanda Ndinga, yina me monisama, samu na kuvwanda Kento ya makwela ya Klisto. Yandi silaka na kusala yawu. Yandi tubaka mutindu Yandi salaka. Ata mbala mosi ve ti Yandi ke sadilaka... ke zimbisaka kifwani ya Yandi. Yandi ke salaka yawu ntangu nionso na kifwani. Yandi ke salaka yawu, konso ntangu, na kifwani. Yandi ke salaka yawu diaka, yandi ke bokila Kento ya Yandi ya makwela ya kuvedila na kilumbu ya nsuka, Rébecca ya luzolo ke na kuvungila Isaac ya Yandi. Wapi ntangu ya kitoko!

<sup>205</sup> Yayi ke temuna babuku nionso yayi, yina ke vwanda ya mansweki samu na beno ntangu beno ke tanga buku ya *Bansungi Sambwadi Ya Dibuundu*. Babuku zole: Buku ya Luzingu, tubaka, mosi ke tuba ti beno lenda tula nkumbu ya beno na zulu ya yawu, na yina ba ke katula beno kuna ata fioti ve; yankaka ke tuba ti beno lendaka katula nkumbu ya yandi na Buku ya Luzingu. Yayi ke talisa yawu pwelele, kaka awa. Mu ke sukisa na mwa minuti fioti, mu banza, samu na mwa banoti awa, mpe mu ke simba yayi na ntwala beto sukisa.

<sup>206</sup> Luzingu kele kima ya santu, na ntawala ya Nzambi, mpe ba me siamisa yawu na kati ya buku. Nzambi kele Yinto ya luzingu. Beno ke kwikila yawu?

<sup>207</sup> Luzingu ya beto ya kimuntu awa, beto kele na yawu, kele kaka kubeba. Ya kieleka ya zolaka vwanda luzingu ya kulunga, na kubanda, kasi ya me beba na mbutukulu ya kimuntu. Luzingu ya ntete, to kuvukana ya beno ya ntete, beno kotaka na mbutukulu, na nzila ya yinza, kisalu ya yinza. Muntu ya yinza ya kuvukana, bakala mpe kento kintwadi, me vukana kintwadi na dyambu ya kuvukisa banzatu, yina nataka luzingu ya beno

ya ntete awa, mpe yina kele ya kuvukana na disumu mpe lufwa. Wapi mutindu beno lenda kondwa kumona nkuna ya nyoka?

<sup>208</sup> Ntangu beno ke mona kento, kinama ya fioti; kibulu ya kento yankaka ve mutindu yandi; yina me salama mutindu yina, na kuzabaka ti yandi lendaka vunama. Nzambi zabaka. Kana Yandi zabaka ve nsuka kubanda na mbandukulu, na yina Yandi vwandaka ve Nzambi. Kana Yandi kele ve ya seko, kana Yandi kele ve, kana . . . Yandi lenda vwanda ve ya seko kukondwa kuzaba mambu nionso, kuvwanda bisika nionso, na kuzabaka bima nionso, ya Kukonda nsuka. Na yawu Yandi zabaka bima nyonso, mpe Yandi zolaka sala kento yina.

<sup>209</sup> Bakala yango vwandaka ve na kento. Kento ya makwela mpe bakala vwandaka kima mosi. Yandi vwandaka na mpeve ya bukento mpe mpeve ya bakala na kati ya yandi.

<sup>210</sup> Yandi zolaka kabwana, kubaka kinama ya fioti, na manima luvangulu nyonso me salama. Ata kibulu ya kento mosi ve vangamaka na Nzambi, na luvangulu ya ntete, lenda sala kima mutindu yina. Ba salaka yandi mutindu yina, samu na kusala yawu. Yandi zabaka ti yandi ke sala yawu. Kana Yandi salaka yawu ve, Yandi vwandaka ve Nzambi.

<sup>211</sup> Kasi, beno me mona, binama yina kele na kati ya Nzambi zolaka talisama. Yandi—Yandi zolaka vwanda Mvulusi. Mpe samu na kusala nyonso kuvwanda ya kulunga, mutindu Yandi kuzwaka yawu, kuna ya zolaka vwanda ve na kima ya kuzimbana. Oh, beno vwanda ve bana. Beno vwanda babakala mpe bakento. Beto me kuma na nsuka ya nzila. Beno tala.

<sup>212</sup> Ntangu yayi, ya vwandaka yinza, ya kuvukana na lufwa. Bakala ya beno ya ntete, yina vwandaka yala na zulu ya beno, vwandaka nkadulu ya beno na nzila ya mbutukulu ya yinza. Yinza, beno zola yinza samu ti beno kele yinza, mpe kitini ya yinza. Ya kieleka? Bansatu ya beno vwandaka, na nzila ya yinza, samu na kuzola yinza yina beno kele kitini ya yawu. Beno kele kitini ya yinza. Beno ke kwikila yawu? Mpe ya kele kima ya beno ya yinza.

<sup>213</sup> Ya kele samu na yina beno fwana butuka dyaka. Beno fwana kabwana; beno fwana kufwa na bakala ya ntete yina. Beno lenda zinga ve na yawu. Beno lenda kaka kutuba ve, “Mbote, mu ke kufwa makwela na yandi, mpe mu ke bika yandi tii mu ke kuzwa bweso.” Ve, tata. Ata mukanda ya kufwa makwela ve! Yandi ke kufwa. Nkadulu ya yinza fwana kufwa. Konso kitini ya yandi fwana kufwa. Beno fwana kuvukana, dyaka, na Nkadulu yankaka.

<sup>214</sup> Nkumbu ya beno ya nkadulu ya beno ya ntete, butukaka, mpe ba tulaka yawu na kati ya buku ya luzingu. Mpe bisalu ya beno nyonso sonamaka na kati ya yawu, mpe. Nyonso yina beno salaka na yisi ya nkadulu yina tulamaka na kati ya buku, yina ba bokilaka buku ya luzingu.

<sup>215</sup> Beno tala, na Daniel, ntangu yandi kumaka na “Kuluntu ya Bilumbu, Bansuki ya mpembe vwandaka mutindu mika ya dimeme. Kumi ya mafunda na kumi ya mafunda kwizaka na Yandi, samu na kusadila Yandi; Kento ya makwela. Mpe kuna babuku zibukaka.” “Mpe Buku yankaka zibukaka, yina vwandaka Buku ya Luzingu.” Beno me mona? Ya kele na basantu yimeni kuna, Dibuundu, Kento ya makwela. “Buku yankaka zibukaka, yina vwandaka Buku ya Luzingu.”

<sup>216</sup> Ntangu yayi, beno, kasi ntangu ba kabulaka beno na kuvukana yina, na nzila ya lufwa ya kimpeve: Nsatu ya beno ya kimuntu kele kuzenga bansuki ya beno. Nsatu ya beno ya kimuntu kele kulwata bakupe, kupakula kizizi ya beno. Nsatu ya beno ya kimuntu kele kuvwanda muntu ya kulonguka, muntu ya mayele, kuzaba kima ya kulutila yina yankaka. Ya kele yina Eve zolaka. Ya kele kima kaka yina yandi zolaka.

<sup>217</sup> “Mbote, beno tuba! Nge kele longi ya kulutila yimbi, ya mpamba-mpamba, nge ke telama kuna mpe ke tuba na munu? Mu kele na Doctorat ya Philosophie, na Droit” Yina ke nata kaka beno ntama na Nzambi, ntangu nyonso beno ke bwela kima mosi. Beno me mona? Beno me mona? Ya kele kieleka. Ya kele kieleka. Beno me mona?

<sup>218</sup> Ya kele yina Eve bakaka. Yandi kuzwaka kivumu na mutindu yina ya kivumu. Ya kele yina dibuundu kele bubu yayi, na nzila ya balukolo ya Biblia mpe bantu ya mayela. Mpe, beno tala, muntu nyonso ke wisana ve na yankaka, mvindu ya nene kaka kieleka yina Biblia ke tuba, “Babylone.”

<sup>219</sup> Kento ya makwela zaba kisika Yandi me telama. Yandi kele kaka nkonga ya bantu fyoti. Ya ke vwanda ve na bantu mingi yina ke kuzwa mpulusu; ya kieleka, kieleka, kieleka bantu fyoti. Beno ke tuba, “Mbote, kuna, nge tubaka, ‘mafunda.’” Yinga. Kasi bawu me basika na bamvula mafunda zole, mpe, na konso nsungi kisika Yawu me basika. Ata . . .

<sup>220</sup> Nsungi ya Luther mpe kimvuka yina; mpe na manima bawu kufwaka, mpe bawu kwendaka, salaka denomination; na manima Wesley; mpe na manima kwisaka ba-pentecotiste, mpe nionso yina. Mpe mwa bintala nyonso ya ba-Baptiste, ba-Presbytérien, ba-Méthodiste, ba-Nazaréen, ba-Pèlerin de la Saintté, mpe nyonso yankaka yina, beno me mona, bintala nionso yayi kabwanaka kuna mutindu dititi.

<sup>221</sup> Kasi, beno bambuka moyo, ntangu yawu kulumukaka, mpe mbuma bandaka na kuyela, ti beno ke mona, ntete ti mbuma yango kuyela, nyonso na kati ya mwinka fwana kufwa. Alleluia! Beno lenda mona ve kisika beto me telama? Luzingu kele na kati ya mbuma dyaka. Yinki ya kele? Kaka kieleka mutindu mbuma mosi yina kotaka na ntoto, Yesu mosi yina na mutindu ya Kento ya makwela, ngolo mosi, Dibuundu mosi, kima mosi, Ndinga mosi. Ndinga mosi kotaka na kati ya yayi mpe basikaka awa,

mpe kwisaka na yintu awa. Mpe Luzingu yina nionso me luta awa, me baka bantu ya yandi. Ntangu yayi ya ke na kusalama na yintu, samu na Enlevement. Mu ke zonzila yawu mbasi na nkokila, to na nkokila yina ke landa, mosi, kana Mfumu zola.

<sup>222</sup> Mbote, beno me kabwana na kimvuka ya beno ya ntete, na nzila ya lufwa ya kimpeve. Ntangu yayi beno me butuka mbala zole, to me kwela dyaka, na kuvukana ya malu-malu ya kimpeve; ya luzingu ya beno ya yinza ve ya bima ya yinza, kasi ya Luzingu ya Kukonda nsuka. Nkuna yango yina vwandaka na kati ya beno na mbandukulu, me kuzwa beno.

<sup>223</sup> Ntangu yayi, buku ya beno ya ntama me kwenda, na kuvukana ya beno ya ntama. Ntangu yayi, nkumbu ya beno ya ntama, na yina beno... ba me nata yawu kisika yankaka. Ntangu yayi, beno ke tuba, “Nge zola kutuba na munu ti buku ya munu ya ntama...” Nzambi me tula yawu na Mubu ya Kuzimbana ya Yandi. Beno me telama ya kulunga na ntwala ya Nzambi.

<sup>224</sup> Ntangu yayi, nkumbu ya beno kele ntangu yayi na Buku ya malu-malu; buku ya luzingu ve, kasi Buku ya Luzingu ya Mwana-dimeme, yina Mwana-dimeme vulusaka. Ve buku ya ntama ya kuvukana ya beno ya yinza, kasi buku ya beno ya malu-malu, Kento ya makwela. Alleluia! Luzingu ya beno ya malu-malu kele na kati ya Buku ya Luzingu ya Mwana-dimeme, mukanda ya makwela ya beno, alleluia, kisika nkuna ya beno ya kieleka ya Kukonda nsuka, na mbandukulu, ke kangama. Ntangu yayi ba me lemvokila beno kaka ve, kasi ba me nungisa beno. Nkembo! “Ya kunungisama,” Romains 5:1 me tuba. Yinga. Romains 5:1 me tuba, “Na yawu na kuvwandaka ya kunungisama na nzila ya lukwikilu.”

<sup>225</sup> Beno tala ndinga. Ndinga zola kutuba ve “ya kulemvuka.” Mpova zola kutuba “ya kunungisama.” Ya zola kutuba ve ti beno me kuzwa mulemvo.

<sup>226</sup> Mumbandu, beno kuwaka ti mu me kola malafu mpe—mpe salaka mwa bima ya yimbi, mpe nyonso yina. Na manima beno ke kwiza, beno ke tuba na munu. Beno me mona ti mu salaka yawu ve, na manima beno ke kwiza pene-pene, beno ke tuba, “Mpangi Branham, mu me lemvokila nge.” Nge me lemvokila munu? Mu salaka yawu ve, na kubanda. Beno me mona?

<sup>227</sup> Ntangu yayi, kana mu salaka yawu, mu kele ya kubwa. Kasi beno lenda lemvokila munu, mpe ti mu ke vwanda ve ya kubwa. Kasi dyaka mu kele ya kunungisama ve, samu ti kieleka mu me sala yawu.

<sup>228</sup> Kasi mpova, *ya kunungisama*, kele ti beno me salaka yawu ata fioti ve. Amen. Ba ke talaka yawu ve, ata fioti ve. Wapi mutindu ya me salama? Na Buku ya Nzambi ya Mubu ya Kuzimbana, buku ya beno ya ntama mpe makwela me kufwa makwela mpe me kufwa, mpe ya kele mpe ve na kati ya mabanza ya Nzambi. Amen. Beno kele ya kunungisama. “Na yawu na

kuvwandaka ya kunungisama.” Ba fundaka beno. Ba fundisaka beno. Ba salaka yawu ata fioti ve, na kubanda. Kuvukana ya ntama kele na Muba ya Kuzimbana ya Nzambi. Ba kwelanaka ve na yawu, na kubanda. Yandi, Bakala ya makwela, me lwata nsoni ya beno, Yandi mosi, samu na beno, na kisika ya beno. Yandi bakaka kisika ya beno, samu ti ba soolaka beno na ntwala samu na Yandi, samu na kuvwanda na kati ya Kento ya Yandi ya makwela, na ntwala ya mbandukulu ya yinza. Biblia me tuba mutindu yina. Beno kele Nkuna yina ba soolaka na ntwala.

<sup>229</sup> Wapi mutindu beno kwizaka na kusala yayi? Ba vunaka beno na yawu na nzila ya makwela ya beno ya ntete, na bibuti ya beno ya kindumba, Ève. Ya kele ve foti ya beno mosi. Na nzila ya mbutukulu ya beno ya nsuni, beno me kwiza na manima ya Ève, yina me sala pité. Ya kele samu na yina beno butukaka muntu ya pité. Beno kele musumuki, na kubanda. Ya kele kieleka. Ba vunaka beno na yawu. Beno kuzwaka ve . . . Ve, beno, ya kele ve foti ya beno.

<sup>230</sup> Beno me salaka yawu ata fioti ve. Samu, mwa nkuna yina vwandaka na kati ya beno, zolaka vwanda beno, na ntwala ya mbandukulu ya yinza. Nzambi tulaka nkumbu ya beno na Buku ya Luzingu ya Mwana-dimeme.

<sup>231</sup> Mutindu mwa disolo ya munu ya ngononi, beno nyonso kuwaka yawu. Nsusu ya kento . . . Kiboba mosi ya kisadi-bilanga fikaka nsusu mosi ya kento, kilumbu mosi. Na yawu yandi vwandaka ve na mingi ya bansusu ya bakento kuna . . . maki mingi samu na kutula na yisi ya nsusu ya kento. Na yina yandi kuzwaka diki ya ngononi, mpe bawu tulaka yawu na nsi ya yandi. Ntangu ngononi butukaka, ya vwandaka nsusu mosi ya kulutila kitoko yina bansusu me monaka ve, mwa ngononi ya fioti vwandaka landa. Mpe nsusu ya kento vwandaka kwenda, “Kla, kla, kla, kla.”

<sup>232</sup> Ngononi ya fyozi tubaka, “Mu zaba ve yinki kima yina ke wakana mutindu yina, kasi mu ke na kulanda yandi, na mutindu nyonso.”

<sup>233</sup> Mpe bawu basikaka kuna na kati ya lupangu mpe bandaka na kusanda na kati ya kinkuku ya mvindu. Mpe yandi vwandaka sala, “Kla, kla, kla. Yayi kele mbote. Yayi kele mbote. Beno me kota na kimvuka ya beto. Mpe yayi kele yina . . .”

<sup>234</sup> Mwa ngononi yayi ya ntama, yandi zolaka kudya ve kima yina. Beno me mona? Yandi—yandi kwendaka kaka na nsusu samu yandi vwandaka zaba ve. Yandi zabaka ve yinki kusala. Mpe na manima yandi kwendaka kuna, mpe yandi zolaka kuzwa *yayi to yina*. Mpe mwa ngononi yina kaka . . . yandi zolaka kaka kumina yawu, kasi yandi—yandi zabaka ve mutindu ya kusala yawu. Kasi yandi monaka bana nyonso ya bansusu kusala yawu, kasi ya kele na kima ya kuswaswana. Yandi zolaka yawu ve.

<sup>235</sup> Na yawu, kilumbu mosi, mama zabaka ti yandi tulaka maki zole. Na yawu yandi bandaka na kusosa yina yankaka, yina vwandaka pumbuka bisika nyonso, yandi vwandaka sosa, mutindu Mpeve-Santu ya nene. Kilumbu mosi yandi mataka na zulu ya lupangu ya bansusu, denomination yina. Yandi talaka na yisi kuna, mpe yandi monaka bébé ya yandi. Yandi bokaka. Ya vwandaka Ndinga ya kima yina vwandaka wakana na kati ya yandi. [Kisika ya mpamba na bande—Mu.] Oh, Ya ke wakana kieleka! Oh! Ti nkuna ya kieleka yina ba soolaka na ntwala, yina ba soolaka na ntwala na Nzambi, kuwa Ndinga ya Nzambi, Ya kele miziki samu na yandi. Yandi zaba ti Ya kele Kieleka.

<sup>236</sup> Yandi me lemba na bima yina ya denomination, na mutindu nionso, “Kota na kimvuka ya beto. Kwisa, kwenda na beto. Beto kele na feti ya kimvuka. Beto kele na *yayi*. Beto kele . . .” Ya ke wakana mbote ve, samu na mwa kivangu yina.

<sup>237</sup> Yandi tubaka, “Mwana, nge kele ve ya kimvuka yina, na mutindu nionso. Nge kele samu na munu. Nge kele ya munu.”

<sup>238</sup> Yandi tubaka, “Mama, yina ke wakana ya kieleka. Wapi mutindu mu ke basika?”

<sup>239</sup> “Dumuka kaka. Mu ke simba nge.” Uh-huh. Ya kele kaka yina beno fwana sala.

<sup>240</sup> Ndinga ya Nzambi yina me pakulama me siamisama na ntwala ya mutu nionso yina me butuka samu na kuvwanda mwana ya Nzambi, na nkuna yina ba soolaka na ntwala na kati ya yandi samu na ngunga yayi, yandi ke mona Nsangu ya Nzambi kieleka mutindu ya kele na Nzambi na Mazulu. Martin Luther monaka Yawu samu na ngunga ya yandi. Wesley monaka Yawu samu na ngunga ya yandi. Pentecotiste monaka Yawu samu na ngunga ya yandi. Ntangu yayi wapi mutindu samu na beno? Uh-huh. Bawu kotaka na denomination. Awa Ndinga ke fundisa yawu; na kutubaka na beno yina beto fwana kuzwa bubu yayi, mpe kaka kieleka mutindu Malachie 4 mpe bansilulu nyonso yankaka yayi ya ngunga. Yinki beno ke mona? Yinki beno ke na kutala? Amen. Beto bawu yayi. Bangononi ya kieleka, ya kisina ke kuwa. “Mameme ya Munu zaba Ndinga ya Munu. Bawu ke landa ve nzenza.”

<sup>241</sup> Samu na yinki? Ba tulaka yawu na kati kuna na nzila ya nsodolo ya ntete. Ba kubikaka beno na ntwala samu na mwana ya Nzambi. Beno vwandaka na kati ya Nzambi na ntwala ya mbandukulu ya yinza. Beno me monisama kaka na kilumbu yayi samu na lukumu ya Yandi mpe nkembo ya Yandi. Wapi mutindu beno lenda sala yawu kukondwa kuzitisa Ndinga ya Yandi, mpe kutelama na konso Ndinga ya Nzambi? Yinga, tata. Na yina, beno kele kitini ya Ndinga yina, na nzila ya nsodolo ya ntete. Samu ti, beno tala, Nzambi kele Ndinga. Beno ke kwikila yawu? [Dibuundu me tuba, “Amen.”—Mu.] Mbote, na yina, kana . . . Yandi vwandaka ntangu nyonso Ndinga. “Na

mbandukulu vwandaka Ndinga.” Mpe kana Ndinga vwandaka Nzambi, na yina beno vwandaka na kati ya Nzambi. Ndinga, kitini yina beno fwana vwanda, vwandaka na kati ya Nzambi na ntawala ya mbandukulu ya yinza. Yandi monaka beno. Yandi zabaka beno. Yandi soolaka beno na mantwala samu na yawu.

<sup>242</sup> Mu ke tuba na beno, kaka mutindu ngononi yina zabaka ndinga yina, mutindu mosi Muklisto ya kieleka, yina me butuka mbala zole ke zaba Ndinga ya Nzambi ke tuba na nzila ya Ndinga, ntangu bawu ke mona Yawu me pakulama mpe me siamisama. Beno tala. Yandi talaka na zulu *Kuna*. Yandi monaka ve kiboba ya nsusu yayi ya kento yina vwandaka sala kla-kla pene-pene *awa*, “Vukana na beto mpe kwenda *awa*,” mpe, “kwenda na *yayi*,” mpe, “kwenda na *yayi* mpe *yina*.” Yandi monaka kivangu yina vwandaka mutindu yina yandi vwandaka zola kuvwanda, yina vwandaka tambula na mupepe, na kimpwanza, na zulu ya bangoy-ngoy nyonso mpe bima ya ntoto. Alleluia! Yandi zolaka kuvwanda mutindu yina samu ti ya vwandaka na kati ya yandi na kuvwanda mutindu yina.

<sup>243</sup> Mpe muntu yina me butuka na Nzambi, mwana ya Nzambi, fwana kuzwa nkadulu ya Nzambi. Yandi fwana vwanda mutindu Nzambi. Yandi ke zitisaka Nzambi. Yandi kele kitini ya Ndinga ya Nzambi. Mpe na bilumbu yayi ya nsuka, ya Kento ya makwela yayi yina vwandaka baka nzutu, kaka kieleka ngolo mosi yina Yandi vwandaka na mbandukulu, me luta na ba-organisation yayi, mpe nyonso yina, mpe me basika samu na Kento ya makwela. Yandi lenda vwanda kima yankaka ve kasi yina.

<sup>244</sup> Ba zolaka mona Yawu, ba-Juif yayi na bilumbu ya bawu, ntangu bawu monaka Yawu monisamaka kuna na ntawala ya bawu, mutindu profete tubaka ti Yandi vwandaka. Yandi tubaka, “Beno tala Masonuku; na Yawu beno ke banza ti beno kele na Luzingu ya Kukonda nsuka. Ya kele Yawu yina ke pesaka kimbangi ya Munu. Kana Mu ke sala ve bisalu ya Tata ya Munu, beno kwikila Munu ve. Kasi ata ti beno lenda kwikila Munu ve, beno sala... beno kwikila bisalu yina Mu me sala.”

<sup>245</sup> Bawu tubaka, “Batata ya beto dyaka mana na ntoto ya kuyuma bamvula makumi yiya. Beto zaba kisika beto kele.”

<sup>246</sup> Yandi tubaka, “Mpe bawu nyonso kele ya kufwa,” ya zola kutuba, kabwanaka Kukonda nsuka. Bawu nyonso kufwaka. Ya vwandaka kaka na tatu, zole basikaka na kati ya difuku, mafuku zole. Ya kele mosi na kati ya difuku.

<sup>247</sup> Na yina, kukotisa, nkuna ya bakala mpe ya kento, ya kele ntangu nionso na diki mosi ke butaka mbuma. Ya kele na diki mosi, nkuna mosi yina ke butaka mbuma, beno me monaka ntete ve mutindu ba ke vukisaka bibulu. Beno tala. *Awa* kele mafuku ya meki; *awa* kele mafuku ya bankuna; mpe ntangu ba ke—ba ke losa bawu, samu na kuvukana kintwadi na kivumu, na kulutaka na kati ya tube mpe na kati ya kivumu, ba ke kutana

bawu. Na lweka mosi ya kele na maki. Difuku ya meki; difuku ya bankuna. Ya kele kaka na diki mosi na kati kuna yina ke butaka mbuma. Ya kele kaka na nkuna mosi yina ke butaka mbuma. Bawu nyonso kele moyo. Beno lenda mona mwa bana ya bibulu ke ningana kuna na kati, mwa ditona yina ba lendaka tula na tize ya zalumeti.

<sup>248</sup> Mpe Demos mpe bayankaka ke na kuwa na nkokila yayi, mpe yandi ke bambuka moyo ntangu beto bakaka yawu. Yandi nataka munu kuna, lakisaka munu mutindu ya vwandaka sala. Ba-eprouvette, mpe na kati ya yawu ba vwandaka kuzwa yina ba zolaka tula na nsongi ya tize ya zalumeti. Ya vwandaka mafunda ya mwa bangombe mpe bangombe ya babakala na kati kuna, kasi ya kele kaka mosi ya bawu yina lenda zinga. Kaka mosi ya bawu! Mpe awa kele na kinkuku ya nene ya bawu, *awa*. Mpe beno ke tala, mosi ke basika na kati-kati ya yandi yayi *awa*, ke kwenda kaka kuna, nkuna ke kwiza *awa*; mpe diki ke basika na kati-kati ya maki yayi yankaka na lweka *awa*, mpe ba ke vukana kintwadi. Mpe bayankaka ya bawu ke kufwa. Kasi, bawu kele moyo, kasi bawu ke kufwa.

<sup>249</sup> Samu ti, ya kele na Kima mosi, Muntu mosi salaka *yayi* ya lubutu, mpe tumaka *yayi*, mpe. Ya kele nsodolo ya ntete, mpangi ya munu ya bakala. Kieleka. Nzambi fwana baka lukanu kana ya ke vwanda mwana ya bakala to mwana ya kento, yintu ya mbwaki, yintu ya ndombe, to nyonso yina ya kele. Ba me zenga yawu na Nzambi. Dinsweki ya kulutila mbutukulu ya bumwense, samu na munu. Kasi, beno tala, bayankaka ya bawu ke kufwa.

<sup>250</sup> Ya vwandaka na mafuku zole ya bantu yina basikaka, vwandaka yimba, vwandaka boka, vwandaka sala nyonso. Vwandaka zonza na...vwandaka zonza ve na bandinga. Kasi bawu bokaka, mpe—mpe pesaka Nzambi nkembo, mpe binaka na zulu mpe na yisi ya mubu, mpe salaka nyonso yina bayankaka nyonso ya bawu salaka, kasi ya vwandaka kaka na zole yina kotaka na yinsi ya nsilulu. Caleb kotaka, Caleb mpe Josué, kaka zole. Ya kele mosi na kati ya difuku. Ya kele mosi na kati ya difuku na mbutukulu ya kimuntu. Mosi na mosi ya bawu kuzwaka lusakumunu mosi.

Oh, beno ba-Pentecotiste, mu banza ti beno ke vumbuka ve ntangu mingi.

<sup>251</sup> Mosi na kati ya difuku mosi. Beno tala. Ya zolaka vwanda na bankama tanu ya mafuku ya Baklisto na yinza bubu yayi. Kana Yesu ke kwiza, ya ke vwanda kaka na bankama tanu ke kwenda na Yandi, kuna, kana ti lutangu yina ke vwanda kieleka. Mbote, ya kele na mingi kulutila yina ke na kuzimbana konso kilumbu, na yinza ya muvimba. Ba zaba kima ve samu na yawu.

<sup>252</sup> “‘Mu me bakula,’ tubaka misoniki, ‘beno zaba ti...’ Samu na yinki misoniki me tuba ti—ti, ‘Elie fwana kwisa ntete?’” ba

tubaka na Yesu.

<sup>253</sup> Yandi tubaka, "Elie me kwisa dezia mpe beno zabaka yawu ve." Beno me mona? Yandi salaka kaka kieleka yina Masonuku tubaka ke salama na Yandi. Beno me mona? "Na yawu Mwana ya muntu fwana tala mpasi. Na yisi . . ." Bawu zabaka Yandi ve. Kasi, bawu nyonso vwandaka na dibiundu. Bawu nyonso vwandaka tuba ti bawu kele moyo.

<sup>254</sup> Mpe beno bika kaka Muklisto ya kieleka, yina me butuka mbala zole, kisadi ya kieleka ya Nzambi, kuwa Ndinga yina ya Nzambi, yandi ke basika na kati ya denomination nionso, samu na ntoto yina ya kieleka ya lubutu, na nzila ya Ndinga, kivumu. Yandi ke sala kaka yawu. Mu zaba ve mutindu yandi ke salaka yawu. Nzambi tumaka yawu na kusalama.

<sup>255</sup> Ba vunaka beno na mbandukulu, na nzila ya makwela ya beno ya ntete. Ntangu yayi beno zaba yina kele kieleka. Kaka mutindu mu tubaka, mwa ngononi yina ntangu yandi kuwaka Ndinga ya Bakala ya makwela, yandi kwendaka na Yawu, Ndinga ya Nzambi ya kupakula, yina me siamisama samu na kilumbu ya nsuka.

<sup>256</sup> Noé vwandaka Ndinga yina me siamisama samu na kilumbu ya yandi. Beno ke kwikila yawu? [Dibiundu me tuba, "Amen."—Mu.] Mbote, nsangu ya yandi ke simba ve bubu yayi.

<sup>257</sup> Moise vwandaka Ndinga yina me siamisama ya kilumbu ya yandi. Beno ke kwikila yawu? [Dibiundu me tuba, "Amen."—Mu.] Ya ke simba ve ntangu yayi. Yesu vwandaka . . .

<sup>258</sup> Jean vwandaka Ndinga yina me siamisama. Beno ke kwikila yawu? [Dibiundu me tuba, "Amen."—Mu.] Ya ke simba ve na bilumbu ya Yesu. Ya kieleka ve. Ve, tata. "Musiku mpe baprofete vwandaka tii na Jean; katuka kuna, Kimfumu ya Mazulu."

<sup>259</sup> Bantumwa, bayina sonikaka Biblia. Awa me kwiza Luther, na Kusungika, bandinga ya yandi, ti, dibiundu ya yandi, ke simba ve bubu yayi. Ya Wesley ke simba ve. Pentecotiste ke simba ve. Ya salaka na kilumbu ya bawu.

<sup>260</sup> Kasi ya kele kilumbu yankaka. Yayi kele kuzibuka ya Bidimbu Sambwadi. Mu zaba ti Yawu ke wakana ngitukulu samu na beno, kasi Nzambi me siamisa yawu na mutindu ya kulunga. Ya kele ve—ve na kiuvu na kati ya Yawu. Ya kele kaka ya kulunga! Mu ke mwangisa yawu ve na kimvuka yayi awa. Mu ke tuba na bantu yina kele na yinsi ya muvimba. Beno me mona? Beno sala yina beno zola.

<sup>261</sup> Ntangu yayi beno tala Ndinga ya kupakula ya kilumbu ya yandi, ya yina beno kele kitini, na nzila ya nsodolo ya ntete. Beno na mbala mosi, mutindu, zabaka. Ntangu beno kuwaka Yawu, beno zabaka kaka na nswalu ti beno vwandaka ngononi. Beno zaba diaka ti beno vwandaka ve nsusu ya denomination, na kubanda. Beno zabaka ti kima mosi ke tambula mbote ve kuna.

Ya kele na kima mosi ke tambula mbote ve, ya kele kieleka, samu ti beno zaba ti ba me lebika beno mutambu kuna na kat, na mbandukulu.

<sup>262</sup> Yandi, Bakala ya makwela, me katula nsoni ya beno, “Mpe me tula yawu na Muba ya Kuzimbana, na kusukula Masa ya Ndinga mpe Menga ya Luzingu.” Ya kele yina Biblia ke tuba. Bakala ya beno ya ntete yina beno kwelaka, yinza... Bakala ya makwela ya kupakulama, yina soolaka beno, me sukula beno na kusukula ya Masa. Na nzila ya “dibuundu”? [Dibuundu me tuba, “Ve.”—Mu.] Ya ke wakana mbote ve, mutindu yina ve? [“Ve.”] Beno lenda tala yawu na almanach, kasi na Biblia ya Nzambi ve. “Na kusukula ya Masa na nzila ya Ndinga.” Na kat, ya Ndinga! Beno me mona? Na nzila ya...

<sup>263</sup> Beno kele ya kutelama ya kunungisama ya muvimba, mutindu ti beno me salaka yawu ntete ve na mbandukulu. Yayi kele Nsangu ya munu na Dibuundu ntangu yayi. Na yina beno... na yina beto ke manisa na kumwangisa nsangu, kaka na minuti mosi. Beno kele ya kutelama, kana beno kele ya kutelama na zulu ya Ndinga ya Nzambi mpe na Ndinga ya Nzambi, konso amen, konso kisono, konso titre. Wapi kisika beno kele ya kutelama? Mu ke na kumeka na kutuba na beno, na kukwendaka ntama na mpusu yina. Mpe kubasika awa na kat, ya blé, kisika beno lenda kula mingi na ntawala ya Mwana. Mu ke kuwa nkewizulu ya masini ya kuyonzika. Beno me telama ya muvimba, ya kunungisama, mutindu beno me salaka yawu ata fioti ve na kisika ya ntete. Alleluia!

<sup>264</sup> Beno ke zonzila kuvutula matondo! Mu ke kuwa kieleka mbote. Mu ke vutula matondo mingi samu na yawu kulutila nyonso mu zaba.

<sup>265</sup> Beno kele Kento ya makwela ya kuvedila, ya ngolo, Kento ya makwela ya kukondwa disumu ya Mwana ya Nzambi ya moyo. Bakala nyonso mpe kento yina me butuka na Mpeve ya Nzambi, mpe yina ba me sukula na Menga ya Yesu Klisto, mpe ke kwikila konso Ndinga ya Nzambi, ya kele mutindu ti beno me sumukaka ntete ve na kubanda. Beno kele ya kulunga. Menga ya Yesu Klisto! Wapi mutindu beno lenda... Kana muntu...

<sup>266</sup> Kana mu zolaka kufwa na suka, bakala mosi bakaka kisika ya munu, mu lenda kufwa ve samu na disumu yina. Muntu mosi bakaka kisika ya munu.

<sup>267</sup> Mpe Yesu, Ndinga, bakaka kisika ya munu. Yandi kumaka munu, nsumuki, ti mu lendaka kuma Yandi, Ndinga. Amen. Bika mu kangama na Yawu, dibuundu ve. Ndinga! Amen.

<sup>268</sup> Oh, kuvukana ya kimpeve ya Klisto mpe Dibuundu ya Yandi ntangu yayi, ntangu nsuni ke na kukuma Ndinga, mpe Ndinga me kuma nsuni, yina me monisama, yina me siamisama. Kaka yina Biblia me tuba ke salama na kilumbu yayi, ya ke na kusalamaka, kilumbu na manima ya kilumbu. Na yina, ya ke na

kufuluka na nswalu mingi kuna, na bantoto ya kuyuma yina, mpe bima ke na kusalama, ti mu lendaka ve kulandila yawu. Beto me belama na Nkwizulu ya Yesu, samu na kuvukana na Dibuundu ya Yandi, kisika Ndinga ke kuma Ndinga. Lubokilu ya Mpeve-Santu, ke na kuswasikisa bantima!

<sup>269</sup> Beno kele ya kutelama, ya muvimba. Ata mbala mosi ve ti beno me sumukaka na kubanda. Nzambi zaba ve kima mosi. Ya kele na Mubu ya Kuzimbana. Ata mbala mosi ve ti beno me salaka yawu. Ba fundisaka beno na yawu, na nzila ya kufunda. Kasi ya kieleka, kubanda na mbandukulu, ba soolaka beno na ntawala samu na kuvwanda mwana ya bakala mpe mwana ya kento ya Nzambi. Beno kele ya kutelama kuna, ya kusukula. Mpe buku ya beno ya ntama ya kufwa makwela me katuka, mpe ya me kufwa, kieleka ya ke zingaka ve, ata mpe na dibanza ya Nzambi.

<sup>270</sup> Beno kele Kento ya makwela ya Klisto ya kuvedila, yina ba me sukula na Menga ya Klisto. Ya ntalu, ya kuvedila, Mwana ya Nzambi ya kukondwa disumu na, Kento ya Makwelaa-Ndinga ya kuvedila ya kukondwa mvindu yina Yandi sululaka na Maza ya Menga ya Yandi Mosi; yina kumaka nsuni mpe monisamaka, ti Yandi lendaka baka beno yina ba soolaka ntete na ntulu ya Tata, na ntawala ya mbandukulu, mutindu mosi Yandi vwandaka. Yandi vwandaka kinama ya nene ya Nzambi, yina ba bokilaka “zola.”

<sup>271</sup> Nyonso yina beno kele, beno kele bisadi ya Nzambi, nyonso yina Nzambi zola ti beno sala, kisika ya beno kele. “Nzambi tulaka na kati ya Dibuundu, mwa bantumwa, baprofete, milongisi, ba-pasteur . . .” Yandi tulaka yawu na nzila ya ngolo ya nsodolo ya ntete ya Yandi Mosi. Mpe beno vwandaka yina, na kubanda.

<sup>272</sup> Makwela ya beno ya ntete kufwaka. Ya vwandaka. Beno me salaka yawu ata fioti ve, na kubanda. Samu ti, ya kele kaka na kima mosi yina lendaka sala yawu, yina ke vwanda Nzambi ke kulumuka, Yandi mosi, mpe bakaka kisika ya beno na mutindu ya Mwana ya Nzambi, Yesu Klisto, mpe me sukula beno na Masa, ya kusukula ya Masa na nzila ya Ndinga. Ndinga; denomination ve! Ndinga me sukula beno. Kasi kana beno ke telema ve na Masa ya Ndinga, wapi mutindu ba ke sukula beno? Beno kele kaka ya kukangama mutindu Eve vwandaka.

Oh, Mwana-dimeme ya luzolo yina kufwaka,  
Menga ya Nge ya ntalu  
Yandi ke zimbisa ngolo ya yandi ata fioti ve,  
Tii na kilumbu yina Dibuundu ya Nzambi yina  
me sumbama  
Kuzwa mpulusu na disumu dyaka ve.

<sup>273</sup> Yinki kele disumu? *Disumu* kele “kukondwa lukwikilu.” Kukondwa lukwikilu na yinki? Ndinga; kukondwa lukwikilu na Nzambi, yina kele Ndinga.

<sup>274</sup> Ya kuvedila, ya kukondwa mvindu; oh, alleluia; yandi ke kwenda ntama mingi ve na mazulu; amen; ya kutelama ya kukubama. Beno banza. Bilele ya beno, ya kusukula na Masa ya Ndinga ya menga! Ndinga me kuma Menga. Ndinga me kuma menga samu na beno, mpe ba me sukula beno na Ndinga ya menga. Ndinga, yina ke basisa menga! Luzingu ya Nzambi na kati ya Ndinga, mpe Ndinga vwandaka basika menga samu na beno, samu ti ba sukula beno na mvindu ya bakento yayi ya kindumba, mpe ba ke sukula beno mpe ke santisa beno na nzila ya kusukula ya Masa ya Ndinga, mpe ya ke sala ti dibanza ya beno mpe ntima ya beno kangama na Nzambi mpe na zulu ya Ndinga ya Yandi.

<sup>275</sup> Ntangu yayi, wapi mutindu beno ke zaba ti Yawu kele kieleka? Ntangu Nzambi ke kulumuka mpe ke siamisa Yawu mpe ke talisa Yawu.

<sup>276</sup> Beno ke tuba, “Mbote, mu kwikilaka Yawu ve mutindu yina.” Bawu kwikilaka Yawu ve na mutindu ya Yesu, kasi Nzambi siamisaka Yawu. Bawu kwikilaka Yawu ve na mutindu ya Noé. Bawu kwikilaka Yawu ve na mutindu ya Moise. Bawu vwandaka zola kubaka ndinga ya Balaam samu na Yawu, “Beto nyonso kele mutindu mosi, na yawu beto ke vukana kintwadi.”

“Beno kabwana,” Biblia me tuba, “na kukondwa lukwikilu.”

<sup>277</sup> Alleluia! Ntangu yayi beno tala. Beno kele kaka yina ve, kasi beno ke kwenda na Makwela na zulu. Mpe beno ke lwata lupete ya makwela, ya lemvo yina ba soolaka ntete, yina beno me lunga na yawu ve, lupete ya makwela ya lemvo yina beno me lunga na yawu ve. Nzambi salaka yawu, Yandi mosi. Yandi zabaka beno na ntwala ya mbandukulu ya yinza, na yawu Yandi me kotisa lupete ya makwela na zulu ya beno Kuna, me tula nkumbu ya beno na Buku. Wapi kuvutula matondo! Alleluia! Lukumu na Nzambi ya beto!

<sup>278</sup> Ntangu yayi, samu na kumanisa, mu lendaka tuba yayi. Beto nionso zaba ti dibuundi ya bilumbu yayi, ya Pentecote, na mutindu ya yawu bubu yayi... Ba-dénomination nyonso kintwadi, mu ke losa bawu nyonso na kinkuku mosi, samu ti bawu kele mutindu yina. Beno ke bambuka moyo, Yandi ke vukisa matiti ya yimbi, ntete, mpe ke yoka yawu. Ke baka... Yandi ke baka batize nyonso ya blé mpe ke yoka yawu nyonso, ntete; na manima Yandi ke baka, ke kwiza mpe ke baka blé ya Yandi mpe ke nata yawu na yinzo. Ba ke vukisa yawu nionso na binkuku, kinkuku ya ba-Methodiste, ba-Baptiste, ba-Pentecotiste, nionso ke kwenda na Conseil Oeucuménique. Kaka yina. Yawu nyonso ke yokama na tiya. Beno me mona?

<sup>279</sup> Beto nionso zaba ti dibuundi ya bilumbu yayi, na mutindu ya yawu ya bubu yayi mpe na ntela ya yawu ya ntangu yayi, kele ve na mfunu samu na kumanisa lutumu ya nene yina Nzambi pesaka Dibuundi samu na kilumbu yayi. Bantu yikwa

ya Pantekote lenda tuba “amen” na yawu? [Dibuundu me tuba, “Amen.”—Mu.] Kieleka. Beno me mona? Ya kele na . . .

<sup>280</sup> Beto kele ba-Unitaire, ba-Binitaire, ba-Trinitaire, *yayi, yina, yankaka*, kuswana, kunwana. Mosi kele *yayi*, mpe mosi kele *yina*, mpe *yankaka*. Mpe mosi na mosi ya bawu, vwandaka na boma ya kukutana na Ndinga, mpe kuluta na kumekama. Beno me mona? Bawu zaba. Beno ke tuba na bawu samu na Yawu, mpe bawu ke tuba, “Mu—mu lenda ve kundima yawu. Mu lenda ve kukwikila Yawu. Mu ke kipe ve yina yandi ke sala. Mu . . .” Beno me mona? Beno me mona? Beno me mona? Ya ke lakisa yina kele mama mpe papa ya beno. “Beno lendaka vwanda surveillant général kilumbu mosi. Beno lendaka vwanda *yayi, yina, to yankaka*.” Beno ke sala mbote na kuvwanda mwana ya Nzambi.

<sup>281</sup> Ntangu yayi, beto zaba ti dibuundu lendaka ve, dibuundu ya ba-Pentecotiste, ata fioti ve, ata fioti ve, lendaka nata Nsangu ya kilumbu ya nsuka, na mutindu ya yawu bubu yayi. Mutindu yina? [Dibuundu me tuba, “Ve.”—Mu.] Na yina, ya lenda wisana ve na Bandinga mosi to zole na kati ya Biblia. Wapi mutindu beno ke sala yawu? Ya lenda ve kussala yawu. Na yawu, beno me mona, denomination kele na ngaanda. Ya kele kieleka.

Ya ke vwanda bantu yina soolamaka yina ba soolama samu na yawu. Beno me mona?

<sup>282</sup> Ntangu yayi, beno zaba, mpe mutindu mosi na mosi ya beto kuzaba, ti kimvuka ya muvimba ya ba-denomination, ba-Pentecotiste mpe nionso yina, kele ya kufwa, ya kele, samu na Muklisto yina me butuka mbala zole na Nsangu. Uh-huh. Bakala ya beno ya ntete kele ya kufwa. Beno zaba ti yandi kele ya kufwa. Nzambi bikaka yandi kufwa. Ya me suka. Mitindu ya yawu nionso ya science, ya mayele, ya ndongosolo, ya science ya balukolo ya yawu yina ba me bokila ya Biblia mpe bima yina me kufwa. Yinki ya me sala? Ya me kabwana, ba-unitaire *awa*, mpe bantu ya butatu *awa*, mpe ba-binitaire *awa*, mpe *awa*, mpe na yisi *awa*, mpe poto-poto ya mutindu yayi, mpe ba ke bokila bawu ba-Pentecotiste.

<sup>283</sup> Na yina, mu kwendaka mona ntwenya ya bakala mosi, kilumbu yina; yandi ke na kuwaka, na ntangu yayi. Mpe ntwenya mosi ya kento, yandi vwandaka ya dibuundu mosi. Yandi tubaka . . . Mu tubaka . . . Bawu kabwanaka. Mu tubaka, “Yinki kele dyambu?”

Yandi tubaka, “Beto kele ve na lukwikilu ya mutindu mosi.”

Mu tubaka, “Oh, lemvokila munu. Nge kele muntu ya Katolika?”

<sup>284</sup> Yandi tubaka, “Ve.” Yandi tubaka na munu dibuundu ya denomination yina yandi vwandaka, muntu ya Pentecote.

<sup>285</sup> Mu tubaka, “Nani *nge* kele?” Yandi kele Pentecotiste, mpe, kasi denomination yankaka. Oh!

<sup>286</sup> Beno zaba ti, dibuundu ya Katolika ya Rome na mbandukulu, vwandaka Pentecotiste? Bantu yikwa zaba ti ya kele kieleka? [Dibuundu me tuba, "Amen."—Mu.] Ya me baka yandi bamvula mafunda zole samu na kukuma kisika ya kele bubu yayi, yandi ke baka kaka kima mosi ve ya Masonuku. Kima ve. Na yina, ba-Pentecotiste, na manima ya bamvula makumi zole, ke vwanda yimbi mingi kulutila bawu kele ntangu yayi, ya ke landila na kukwenda mutindu ya kele ntangu yayi. Mbote, kieleka. Beno me mona? Yinki ya kele? Yinki ya kele? Beno tala nani kele papa ya bawu mpe mama ya bawu. Ba ke bika bakento ya bawu kuzenga bansuki ya bawu. Bawu lenda sala nyonso yina bawu zola. "Ntangu nyonso yina bawu kele ya dibuundu yayi, yawu yina kaka kele mfunu."

<sup>287</sup> Oh, kuyituka ve, kuyituka ve ti kitumbu ya Nzambi me mata! Nzambi tulaka Yawu kaka na ntwala ya meso ya beno mpe beno me kanga meso ya beno mpe beno me kondwa na kutala Yawu. Yinga. Beno ke kanga ntima ya beno, ntangu beno ke mona Ndinga ya Nzambi ya kieleka mpe Bidimbu Sambwadi yayi me siamisama mpe me talisa ti ya ke mutindu yina. Mpe ya me talisama na mazulu, na bayinsi nyonso mpe bisika nyonso yankaka, na nzila ya bidimbu ya nene mpe mambu ya ngitukulu yina Yandi silaka ti Yandi ke sala, na yina beno ke kangama na yawu, beno ke tuba, "Mu—mu zaba ve. Mu—mu lenda ve kuvibila yawu. Mu . . ." Beno me mona? Oh, la la! Ba kele ya kufwa, mpe bawu zaba yawu ve. Na masumu mpe bayimbi! Beno kele ya kufwa. Oh, la la!

<sup>288</sup> Beto nyonso zaba ti dibuundu na mutindu yina lendaka manisa ve kilumbu yayi ya nsuka. Wapi mutindu ya lendaka nata Malachie 4 na kisalu? Wapi mutindu ya lendaka sala yawu? Bawu ke kwikilaka ve na kima ya mutindu yina. Wapi mutindu ya lendaka kwikila, kukotisa Luc 17:30? Wapi mutindu ya lendaka nata Masonuku nyonso yayi yankaka yina ba silaka samu na kilumbu yayi ya nsuka? Ya lendaka ve kusala yawu, samu ti ya ke manga Yawu. "Mutindu ya vwandaka na bilumbu ya Lot, mutindu mosi ya ke vwanda na nkzwizulu ya Mwana ya muntu."

<sup>289</sup> Beno tala mutindu, Lot, Sodome vwandaka kuna, na kilumbu yina. Beno tala, mutindu ya dibuundu na kilumbu yina. Beno tala yina salamaka na Abraham, Musolami.

<sup>290</sup> Beno tala yina salamaka na Lot mpe bayankaka kuna na Sodome. Beno tala Billy Graham mpe Oral Roberts, bawu kele kuna na kati ya ba-denomination yayi. Beno tala Dibuundu ya Abraham yina soolamaka, yina basikaka.

<sup>291</sup> Beno tala mutindu ya kidimbu, yina Yesu Yandi mosi, Nzambi yina me telema kuna na kati ya nzutu ya nsuni. Beno ke tuba, "Yina vwandaka Wanzio." Biblia ke tuba ti Yawu vwandaka Nzambi.

<sup>292</sup> Mfumu Nzambi, Elohim, yina me telema kuna na nzutu ya muntu, samu na kutalisa ti Yandi ke pakula Dibuundu ya Yandi na bilumbu ya nsuka, ya ke vwanda dyaka Nzambi yina ke na kusalaka na nsuni ya muntu. “Mutindu ya vwandaka na bilumbu ya Sodome, mutindu mosi ya ke vwanda na nkwizulu ya Mwana ya muntu.” Mutindu mosi ya kima. Bawu ke mona kaka yawu kuna na kati ya Masonuku. Beno tanga . . . “Beno longuka Masonuku, samu na kati ya Yawu beno ke banza ti beno ke kuzwa Luzingu ya Kukonda nsuka.” Mpe Yawu kele Yawu yina ke pesa kimbangi ya Yayi. Beno me mona? Beno me mona?

<sup>293</sup> Na yawu beto zaba ti bawu kele ya kufwa. Nzambi bikaka yawu kufwa na munimi ya yawu, landila manaka ya science, manaka ya ndongosolo.

<sup>294</sup> Ba-Pentecotiste nionso vwandaka sala, beno zolaka tuba samu—samu na kufidisa mwana ya beno na lukolo ya Biblia, na ntangu yina Mpangi-bakala ya kiboba Loyate mpe bayankaka vwandaka awa, ba zolaka basisa beno na nganda ya dibuundu. “Kasi, oh, ntangu yayi ya kele kima ya kulutila nene. Mwana ya munu ya bakala kele ntama kuna na lukolo ya Biblia.” Yandi ke na kutimuna ntoni ya yandi. Na yawu, ntangu yayi, beno banza ti bawu zolaka baka Yawu, bubu yayi?

<sup>295</sup> Beno ke banza ti mu ke meka na kusimbisa kukondwa kuzaba? Mu ke sala yawu ve. Mu ke tuba na beno ti ya kele na luswaswanu na kati-kati ya nsungi yayi ya mayela yina beto ke na kuzingila, kisika dibuundu me kuzwa kivumu na science mpe nyonso yayi yina ba ke bokilaka “bifwani” mpe nyonso. Beno ke fwanikisa ve Nzambi.

<sup>296</sup> Mbote, banganga-Nzambi ya bawu—bawu fwanikisaka Nzambi na mutindu ya kulunga mingi, bawu zabaka mutindu Mesiya zolaka kwiza, kasi Yandi kwizaka na mutindu yankaka na yina bawu banzaka. Ya vwandaka ve science. “Wapi mutindu Muntu yayi, na kuvwandaka Mwana ya makangu? Wapi lukolo Yandi kwendaka? Wapi kisika ndongosolo ya Yandi katukaka? Wapi kisika Yandi kuzwaka malongi yayi?”

<sup>297</sup> “Samu na yinki, Nge ke meka na kulonga beto? Nge me butuka na kindumba.” Beno me mona? Oh, kyadi!

<sup>298</sup> Beno me mona kima mutindu mosi ke salama dyaka? [Dibuundu me tuba, “Amen.”—Mu.] Beno me mona yawu kusalama dyaka? Bawu nyonso kele na kati ya luzabu ya bawu ya misambidi, science landila yina lukolo ya Biblia ya bawu ke tuba, ya kele mutindu bawu zola Yawu. “Ya kele mutindu Yawu fwana vwanda, to Yawu kele ve mutindu yina.”

<sup>299</sup> Nzambi ke nungaka bawu kaka, ntangu nionso. Ya ke kwisaka ntangu nionso na mutindu ya kuswaswana. Ya salamaka mutindu yina na ntangu ya Noé; ya salamaka mutindu yina na ntangu ya Moise; ya salamaka mutindu yina na ntangu ya Klisto; ya salamaka mutindu yina na ntangu ya Jean; ya

salamaka mutindu yina na ntangu ya bilandi; ya salamaka mutindu yina na ntangu ya Wesley; ya salamaka mutindu yina na ntangu ya Luther; ya salamaka mutindu yina na ntangu ya Pentecote; mpe mutindu mosi ya me salama diaka. Ya ke sobaka ve mutindu ya Yawu. Ya ke kwisaka ntangu nionso mutindu mosi. Basungiki kaka na nzila ya bansungi sambwadi... bansungi sambanu, tii na yina ya sambwadi. Mpe Apocalypse 10 tubaka, na ngunga yayi ya ke soba. Mpe ya salaka yawu.

<sup>300</sup> Ntangu yayi beto ke sukisa, na kutubaka yayi. Samu na kumanisa lutumu ya nene, wapi mutindu bawu lendaka sala yawu? Beto zaba ti bawu kele ya kufwa. Nzambi bikaka yawu kufwa na nsungi yayi ya science, nyonso ya yawu, na yawu—na yawu Yandi lendaka (kusala yinki?) kuzibula dinsweki ya Kidimbu ya Sambwadi na Kento ya makwela yina ke yambaka bantu nyonso. Wapi mutindu denomination lenda ndima Bidimbu Sambwadi yina, ntangu Ya kele kieleka ya kuswaswana, nkuna ya nyoka mpe bima nyonso yankaka yina? Mansweki nyonso, ya kufuluka na sambwadi kele ya kuswaswana na yina ba vwandaka longa, samu ti bawu bakaka lukolo ya ntama ya lukolo ya Biblia ya bawu.

<sup>301</sup> Mpe Bidimbu Sambwadi ya Nzambi, ntangu Yawu zibukaka kuna na zulu ya mongo: ti Nzambi, ve, ti mu kufwa kaka ntangu yayi na chaire yayi kana Ya kele ve Kieleka. Mpe mu zabisaka beno na ntwala, mvula mosi mpe bangonda sambanu na ntwala yawu salama, yina Yandi tubaka na munu, "Kwenda na Arizona," mpe yina ke salama kuna na ntoto ya kuyuma. Mpe ya kele na bantu ya kuvwanda kaka awa, na nkokila yayi, yina vwandaka ya kutelama kaka kuna mpe yina vwandaka kuna ntangu Bawanzio sambwadi kulumukaka. Mpe ata mpe mag-... Magazine, magazine *Life*, mwangisaka zulunale ya Yawu. Ya kele kaka kuna na laboratoire, mpe nyonso. Ntangu yayi bawu zaba ve yinki Yawu kele.

<sup>302</sup> Mpe bima nionso me tubama, oh, tii na kubeba ya Californie, ntangu yayi, mpe bima nyonso yankaka yayi. Mpe mutindu mu tubaka na bawu bilumbu yikwa ya ke vwanda, wapi mutindu ya ke vwanda kuna kuningana ya ntoto yayi ya nene salamaka na Alaska, mpe yina ke vwanda mbandukulu ya kidimbu ya ntangu, mpe yinki ke salama. Mpe kaka mpova na mpova, yina Yawu tubaka, Yawu me kubwaka ata mbala mosi ve. Beno me monaka Yawu ata fioti ve. Mpe Yawu lenda kubwa ve, samu ti Yawu kele Bandinga ya Nzambi. "Mpe Mazulu mpe ntoto ke luta, kasi Yawu lenda kubwa ve." Ya kele kieleka.

<sup>303</sup> Nzambi zolaka zibula Bidimbu Sambwadi yina, na denomination ve. Mu ke teleminaka yawu ntangu nionso. Kasi, na kati denomination, Yandi fwana baka Kento ya makwela, kento ya makwela ya denomination ve. Yandi lendaka ve kusala yawu. Ya ke telemrina Ndinga ya Yandi Mosi. Yandi zibulaka

mansweki sambwadi yina na kati kuna. Yina ke lakisa, ke basisa bima yango yina ba bumbaka kubanda mbandukulu ya yinza, yina lendaka monisama na bilumbu ya nsuka, na bana ya Nzambi. Bawu nataka Yawu ntangu yayi na ntwala ya bantu, ti bawu mona Yawu, kuna, beno ntangu yayi, na Kento ya makwela yayi yina kele ve denomination. Oh, la la!

<sup>304</sup> Ya kele na babuku zole ya beno. Mosi ya yawu kele Buku ya Luzingu ya Mwana-dimeme. Nkumbu ya beno na zulu Kuna kele yina ba soolaka na mantwala na kuvwanda Kuna. Ya lenda zimbana ve, samu ti beno lenda katula yawu dyaka ve ata fioti ve, beno me mona, samu ti ba kubikaka yawu na ntwala samu na kuvwanda Kuna. Kasi buku ya luzingu ya mumesanu, ba lenda katula yawu na konso ntangu yina. Beno me mona? Kana beno balula ntima ve, ba ke katula yawu, na mutindu nionso, samu beno ke telama na Lusambusu. Kento ya makwela ke luta ve na Lufundusu; Yandi ke kwenda na Enlevement. Kaka mutindu . . .

<sup>305</sup> Mu ke tuba yayi, samu na kumanisa. Ntangu me luta, na yina . . . ya me kuma pene ya ngunga yivwa na ndambu. Mpe beto ke basika awa na ngunga ya yivwa na ndambu, kana Mfumu zola. Beno vwanda kaka kieleka na luzitu ntangu yayi, beno kuwa. Na ntangu mosi . . .

<sup>306</sup> Mu ke tuba yayi ntangu yayi, yayi ke kwenda bisika nyonso na yinsi. Na New York, ntangu yayi ya kele ngunga makumi zole na tatu na baminuti makumi zole na tanu. Kuna na Philadelphie mpe bisika nyonso kuna, basantu yina ya luzolo yina kele ya kuvwanda kuna ke na kuwa, kaka na ntangu yayi, na mabuundu bisika nyonso. Ntama kuna, na sude pene-pene ya Mexique, kuna pene-pene ya Canada mpe bisika nyonso, na yinsi. Bankama tatu ya bakilometele, bisika nyonso na kati ya continent na Node ya Amerika, na kutala, ya kele na bantu kuna, yina ke na kuwaka na ntangu yayi. Bamatunda na bamafunda, ke na kuwaka.

<sup>307</sup> Mpe yina kele Nsangu ya munu samu na beno, Dibuundu, beno yina kele ya kuvukana, kuvukana ya kimpeve na nzila ya Ndinga, ti beno me kufwa na babakala yayi ya ntama. Beno me butuka ya malu-malu. Beno meka ve na kutimuna yandi. Yandi me kufwa. Kana beno kele Muklisto yina me butuka mbala zole, mwa nkuna yina ba soolaka na ntwala samu na beno, ya kele Ndinga na zulu ya Ndinga, na zulu ya Ndinga, na zulu ya Ndinga, na zulu ya Ndinga, tii ya ke kuma na ntela ya kulunga ya Klisto, ya kele kieleka, na yawu Yandi lenda kwiza kubaka Kento ya Yandi ya makwela. Ntangu yayi beto me kubama samu na kima mosi, ya kele Nkwizulu ya Mfumu.

<sup>308</sup> Beno tala nkumbu ya beno na Buku ya Luzingu. Buku ya Luzingu kele Ndinga ya Nzambi, samu ti Ndinga kele Nzambi, mpe Nzambi kele mosi kaka yina kele Luzingu. Na yawu nkumbu ya beno talisamaka na kati ya Biblia na ntwala Biblia kukuma Ndinga. Mpe kana beno kele awa samu na kusala yawu,

Yawu ke siamisa Ndinga yina ve? Dibuundu ke kukisiamisa Yawu mosi ve? Malachie 4, mpe bima nyonso yankaka yayi, na mutindu ya kulunga, me kukisiamisa Yawu mosi mpe me talisa ti Yawu yina Yawu kele?

<sup>309</sup> Ntangu Yesu kwisaka, Yandi tubaka, “Kana Mu ke sala ve bisalu yina ba silaka Munu na kusala, beno kwikila Munu ve.” Wapi kimvuka yina Yandi kotaka? Yandi tubaka, “Bawu nyonso... Beno kele ya tata ya beno, dyabulu, mpe bisalu ya yandi beno ke salaka.” Beno me mona? Beno me mona?

<sup>310</sup> Beto kele na bilumbu ya nsuka, Dibuundu. Yayi kele Nsangu ya munu ya kuvutula matondo samu na beno.

<sup>311</sup> Ntangu yayi, na ntwala ya kusukisa. Kilumbu mosi mu kwendaka kuna na Parc National Glacier. Beto kuwaka, kilumbu ya muvimba, ti bawu vwandaka—bawu vwandaka na kubwa ya masa... tiya ya ngolo yina zolaka kubwa na nkokila yina. Na yawu bantu vwandaka na bisalu mingi, kilumbu ya muvimba, samu na kukubika kima yina, samu ti bawu zolaka mwangisa tiya yina, na nkokila yina. Bawu ke tula tiya yina ke kulumuka mutindu masa, mutindu kubwa ya nene ya maza. Kasi ya kele... Ya vwandaka talana mutindu mukyama, na kutala, ntangu ya ke basika, na tiya yina ke na kukulumuka na kubwa yayi. Beto balukaka bisika nionso na kati ya parc, kento ya munu na munu, mpe bana, beto tambulaka makulu mwasi kilumbu ya muvimba. Beto zolaka bikana kuna, samu na kumona tiya yina mutindu ya ke basika. Na yawu ya—ya—ya silamaka na beto ti beto ke mona yawu, mpe beto ke mona dyaka yawu. Bawu tubaka ti bawu ke kuzwaka yawu na nsungi ya été mpe nyonso yina. Mu tubaka, “Mbote, beto lenda kumona yawu?”

<sup>312</sup> Bawu tubaka, “Beto silaka yawu na nkokila yayi. Ba silaka beto yawu.” Bawu tubaka, “Bawu kele kuna na zulu samu na kukubika yawu ntangu yayi.”

<sup>313</sup> Na manima nyonso kubamaka samu na dyambu yango! Ya kele yina ke na kusalamaka na ntangu yayi. Nyonso ke na kukubamaka samu na dyambu yango, Dibuundu ke na kubasika samu na Nkumbu ya Yandi, Yandi ke na kubasisa Kento ya Yandi ya makwela na kati-kati ya yinza, na kati ya ba-dénomination yayi mpe yinza nyonso, mpe na kati ya mvindu mpe bima ya yinza.

<sup>314</sup> Bantu nyonso; dyambu me kubama. Bantu nyonso vwandaka ya kutelama kuna na ngaanda. Bawu tubaka, “Ntangu yayi beno tala mbote, kaka kuna na zulu ya mongo.”

<sup>315</sup> Ya kele mutindu yina Yawu ke kwizaka ntangu nyonso. Ya kele mutindu yina Yawu fwana kwiza ntangu yayi. Ya kele mutindu yina Yawu ke kwizaka ntangu nyonso. Ve na nzila ya dénomination! Ata mbala mosi ve ti Nzambi me sadilaka dénomination, ata mbala mosi ve!

<sup>316</sup> Musungiki ke kwisa, yandi ke baka Ndinga ya Mfumu. Mpe na manima ntangu yandi ke kufwa, ba ke tunga denomination kuna. Ya kele yina bantu ya Pantekote mpe bawu nyonso salaka. Ntangu mambu ya malu-malu mpe nyonso, ya kele kaka mutindu yina, ya kele mutindu yina kima yango basikaka. Ndinga ya malu-malu yina ba me bwela, na manima ba me tunga dibuundi na yawu, me sala dénomination, ba me kabwana bawu mosi. Ya zolaka vwanda mutindu yina.

<sup>317</sup> Ntangu yayi, beno lenda ve kusala—beno lenda ve kusala kulutila yinza. Yinza ke landaka nzila ya mutindu mosi, ntangu nyonso: mwinga, dikasa, felele, nyonso yina, mpusu, na manima blé.

<sup>318</sup> Ntangu yayi beno tala. Nyonso ya kukubama. Nyonso vwandaka ya kupelisa mpe ya kukubama. Mpe mutu nyonso vwandaka ya kutelama na ngaanda. Mu telemisaka yintu ya munu, diboko ya munu lutaka na zulu ya kento ya munu. Beto vwandaka tala. Mpe bana vwandaka ya kutelama kuna, beto nyonso vwandaka tala na zulu, mutindu *yayi*. Oh! Ya vwandaka kima mosi, samu ti beto vwandaka vingila yawu. Ba silaka beto yawu.

<sup>319</sup> Amen! Ndinga silaka Yayi. “Ya ke salama, na ntwala kilumbu ya nene mpe ya mpasi ya Mfumu ke kwisa, beno tala, Mu ke tinda beno Elie profete. Yandi ke vutula bantima ya bana na batata, mpe bantima ya . . .” “Ya ke salama ti na bilumbu ya nsuka, Mu ke mwangisa Mpeve ya Munu na Zulu.” “Mvula ya ntete mpe ya nsuka ke kwisa kintwadi na kilumbu ya nsuka.” Bansilulu nyonso yayi, na nzila ya Masonuku, pesamaka. Beto ke na kutala na zulu. Beto ke tala Kento ya makwela ya kieleka bisika nyonso na yinsi ya muvimba na ngunga yayi, ke na kutalaka na zulu. Dibuundi, Yandi ke na kwiza, mosi ya bilumbu yayi. Kaka kieleka mutindu Yandi kwizaka mbala ya ntete, Yandi ke na kwiza dyaka. Beno yidika nyonso. Beno kabwana beno mosi na mpusu. Beno vwanda na ntwala ya Mwana. Beno landila na kutala. Beno vwanda na kati ya kuvingila.

<sup>320</sup> Na mbala mosi, beto kuwaka kima mosi na zulu ya mongo, ndinga mosi wakanaka na nzila ya kinzonzolo, tubaka, “Nyonso me kubama.”

<sup>321</sup> Na yina bakala yayi, vwandaka ya kutelama kuna na lweka ya munu, tubaka, “Bika ti tiya kubwa.” Yawu yina, ya bandaka na kupanzana na zulu ya mongo yina, kubwa ya tiya mpe binzenzi, ya vwandaka yitukisa na kutala.

<sup>322</sup> Mpangi-bakala, beto kukubika bima nionso, samu mosi ya bilumbu yayi Tiya ke kubwa. Beto ke mata. Ntangu yayi beto kubama samu na ntangu yina Tiya ke kubwa. Beto kele na bilumbu ya nsuka, beto nyonso zaba yawu, mpe beto me kubama samu na Nkwizulu ya Mfumu. Kima ya kusala kele kukabwana

beno mosi na disumu nyonso. Beno kabwana na kima nyonso yina kele ya yinza. “Beno zola ve yinza to bima ya yinza.”

<sup>323</sup> “Beno bika muntu mosi ve, na nzila ya credo ya yandi, kuvuna beno.” Beno vwanda kaka ya kusungama na nsilulu ya Nzambi, Ndinga ya Nzambi. Mpe Ndinga yina, kana Yawu kele Ndinga samu na kilumbu yayi, Nzambi ke siamisa Yawu mutindu yina. Kana Yandi sala yawu ve, ya kele ve Ndinga samu na kilumbu yayi.

<sup>324</sup> Ndinga yina kubwaka na Kilumbu ya Pentecote ke simba ve kilumbu yayi. Ve, tata. Ya vwandaka samu na Pentecote. Yayi kele samu na Kento ya makwela, yina ke na kwenda na Yinzo ya Kento ya makwela. Beto kele na kima ya kuswaswana. Ba-Pentecotiste me talisa yawu, dyaka. Beto kele na nsungi ya Kento ya makwela. Dyaka ve Ndinga ya Noé ke sala na bilumbu ya Moise; dyaka ve musiku ya Moise zolaka sala na ntangu ya Paul awa. Yandimekaka na kutuba na bawu, “Beno kele ya kufwa na yawu, mpe beno lenda ve kuzwa yawu.”

<sup>325</sup> Dibuundu, beno yina mu ke na kuzonzila, na nkokila yayi, bisika nyonso na yinsi, kana—kana beno me kabwana na denomination mpe mvindu nyonso mpe bima ya yinza yayi, mpe bima yina nionso ke kanga beno na ba credo yina me salama na bantu mpe bantumunu mpe bima ya mutindu yina, beno me kabwana beno mosi: Beno tala na zulu. Beno yilama. Tiya ke kubwa, mosi ya bilumbu yayi. Nzambi ke bika Yawu kwiza, mpe ya ke yitukisa na kutala. Beno ke vwanda ya kukubama ntangu Yandi ke kwisa? Beno ke kubama na kukwenda na Yandi ntangu Yandi ke kwisa? Enlevement ya kinsweki ya Kento ya makwela ya mazulu, “Yandi ke luta na lu... katuka na yina ke kufwaka na yina ke kufwaka ve; Yandi ke soba, na mwa ntangu fioti, na mbwetolo ya disu. Beto yina kele moyo mpe ke bikana ke tekila ve bayina kele ya kulala.”

<sup>326</sup> Kilumbu yina, ya vwandaka Kilumbu ya Armistice, mu vwandaka kuna na Tucson. Mwana ya munu ya bakala ya ntwenya zolaka mona défilé. Mu vwandaka longuka, mpe mu vwandaka ve na ntangu ya kusala yawu. Mpe mu vwandaka na bambokolo mingi ya bambevo mpe nyonso. Na yina yandi tubaka, “Papa, ba ke nata munu ve.” Yandi tubaka, “Nata munu.”

<sup>327</sup> Mu tubaka, “Mbote mingi.” Mpangi Simpson, mu banza ti yandi kele awa; mpe mwana ya yandi ya bakala ya ntwenya zolaka kwenda. Na yina mu kotisaka bawu na kati ya ditoma mpe mu kwendaka na mbangu nionso.

<sup>328</sup> Mu telemaka kuna na nsongi mpe mu vwandaka tala. Mpe na manima ya mwa ntangu fioti, mu kuwaka, ntama kuna, muningu mosi ya pima vwandaka kwisa, “bum, bum,” bangoma, vwandaka bula. Mu telemaka kuna. Mu banzaka, “Mbote, bana yayi ya fioti, ba me tangaka babuku yayi nionso samu na makesa.

Ba ke zolaka yawu kieleka.” Mu talaka, kima ya ntete mu monaka vwandaka tank ya ntama, ya Mvita ya ntete ya Yinza ya muvimba. Yawu lutaka, ya vwandaka mwa masini ya fioti mutindu yina. Yina landaka, na manima ya yina; vwandaka yina landaka na manima ya yina vwandaka tank ya nene ya malu-malu ya Mvita ya Zole ya Yinza ya muvimba, tank ya nene ya Sherman na yinwa ya yawu ya tiya. Na manima kwizaka yina vwandaka landa, mpe yina landaka, mpe na manima ya mwa ntangu fyoti kwizaka Gold Star Mothers.

<sup>329</sup> Mpe na manima, na manima ya mwa ntangu fyoti, kwizaka ba-vétéran kumi na zole yina me bikana, na kizunga ya muvimba ya Arizona, na Mvita ya Ntete ya Yinza ya muvimba; ba-veteran kumi na zole. Na manima ya yina, char mosi kwisaka, soda yina me zabana ve, na mwa kulunsi ya mpembe. Ya vwandaka na marin, marin yina ke bulaka munduki, mpe soda mosi, yina vwandaka sala lukengolo; ba yidikaka mwa kivinga mosi na zulu ya char. Na lweka yankaka yina vwandaka mama mosi ya kiboba ya bansuki ya mpembe, ya kuvwanda na mbwetete ya wolo yina ba me kotisa na lele ya yandi, mwa kento mosi ya kitoko ya makwela vwandaka dila, bakala ya yandi kufwaka; mwa mwana mosi ya bakala na bilambu, yandi vwandaka baluka yintu ya yandi. Ba kufwaka papa ya yandi. Mpe kuna na manima ya yina me kwiza mingi mpe mingi mpe mingi, mpe na manima na basoda ya malu-malu. Mu telamaka kuna. Wapi mutindu ya vwandaka yitukisa na kutala, kasi mutindu ya vwandaka mawa!

<sup>330</sup> Mu banzaka, “O Nzambi, mosi ya bilumbu yayi mu ke tala kima yankaka.”

<sup>331</sup> Ya ke vwanda na kilumbu ya mvumbukulu, na yina, “Bantu ya ntete ke vwanda ya nsuka; bantu ya nsuka ke vwanda ya ntete.” Baprofete ya ntama ke basika, ntete, mpe bawu ke mona ndonga yina ke landila, ke mata na zulu. “Mpe beto yina kele ya moyo mpe ke bikana ke tekila ve bayina kele ya kulala. Samu mpungi ya Nzambi ke wakana, bayina kufwaka na Klisto ke vumbuka ntete.” Beto ke kubama kaka na manima ya bawu samu na kukotaka, alleluia, bawu nyonso ya nsungi ya Luther, ya Wesley, ya ba-Methodiste, ya ba-Presbytérien, tii na nsungi ya nsuka, yina yambaka Ndinga na nsungi ya bawu.

Nzambi sakumuna beno. Beno yidika bima nyonso, mpe Tiya ke kubwa.

<sup>332</sup> Beto kulumusa bayintu ya beto na mwa ntangu fioti. Mu ke kukiyufula, na kati ya bantu yayi ke monana na nkokila yayi, na yina mu me kanga beno awa samu . . . tii na ngunga ya yivwa na ndambu. Ya kele na mosi awa, ya kele na kumi na zole awa, bantu yikwa awa, mpe ke tuba, “Mpangi Branham, mu ke na nsoni ya munu mosi, mutindu mu me zinga. Mu me tumama mingi na denomination mpe na bantu. Mu zaba ti mu me telema ve na Ndinga ya Nzambi. Mu ke lomba na nge na kusambilila

samu na munu, Mpangi Branham”? Beno telemisa diboko ya beno. Nzambi sakumuna beno. Nzambi sakumuna beno. Beno tala kaka, kuna na zulu ya balcon, na bisika nionso. Nzambi sakumuna beno. “Mu zaba . . .” Ntangu yayi beno vwanda ve na nsoni. Ntangu yayi, beno vwanda ve na nsoni.

<sup>333</sup> Mpe kuna, bisika nyonso na yinsi, katuka New York tii na Californie, katuka Canada tii na Mexique: beno bantu yina me vukana na mabuundu yina (kisika mwa bimvuka yina ya fioti ya kukwikama ke kwikilaka Nsangu yayi na bantima ya bawu ya muvimba; bawu me basika, me basika na balukwamusu ya nene, me basika na kati ya ba-denomination yayi; bawu kele nkuna ya Luzingu) beno kele na nsatu ya nene, na nkokila yayi, mutindu mwa ngononi ya fioti, ti beno ke kuwa Kima yina kele fioti ya kuswaswana na yina beno me kuwaka, kasi, ntete, na kati ya ntima ya beno beno zaba ti ya kele Kieleka? Beno, na kati kuna, ya kele na pasteur ya kutelama kuna kisika mosi. Nge me telemisa diboko ya nge. Mu ke sambila samu na nge.

<sup>334</sup> Bima yayi me salama ve nakinsweki, bankundi. Beno bambuka moyo, “Mwelo kele ya fioti mpe nzila kele ya fioti mingi, mpe kasi bantu fioti kaka ke landa yawu.” Beno kwenda ve na nkonga ya bantu yina ke na kwenda kuna, bankundi, Nsungi yina ya Dibuundu ya Laodicée. Ya lendaka dumuka mpe kukulumuka, kubina na yisi ya muziki, yandi kele tiya ve madidi ve. Ya me tuba ve ti ya vwandaka galasi madidi, ntangu yayi, ya me tuba ti ya vwandaka madidi ve tiya ve, ya kele Pantekote, mpe zaba ve ti ya kele na kyadi, na mawa, mpofo. Mpofo na yinki? Na Ndinga, na kumonisama ya Ndinga; samu ti Yawu kwisaka ata mbala mosi ve na nzila ya ba-organisation ya bawu, bawu lenda ve kuyamba Yawu.

<sup>335</sup> Mpe beno balongi kuna na Tucson, na nkokila yayi, mu ke pesa beno kizitu ya yawu ve. Nzambi ke sala yawu. Mu vwandaka kuna bamvula tatu. Mu tubaka na beno ti mu ke banda dibuundu ve. Mu salaka yawu ve. Mpangi Pearry Green bandaka yawu. Mu vwandaka kuna bamvula tatu, mpe ata mbala mosi ve ti beno bokilaka munu na chaire ya beno. Mu vwandaka na Tucson pene ya bamvula tatu. Nzambi ke katula munu na ntoto ya kuyuma mosi ya bilumbu yayi. Nsangu yayi fwana zinga. Mu mekaka na mutindu nionso na kundimama na kati ya beno. Mu—mu zaba kikuma beno salaka yawu. Beno me kuwa? Ya kele kaka samu na yayi beno salaka yawu, denomination ya beno ke losa beno na ngaanda. Mpe beno zaba, mingi na kati ya beno mu me zonza na beno, kuna na Restaurant ya Furr, mpe beno zaba ti ya kele kieleka. Nsoni na beno.

<sup>336</sup> Beno basika na yawu. Beno basika kuna, mpangi. Kana ya kele na Luzingu mosi na kati ya beno, beno ke vwanda mutindu ngononi yina ya fyoti yina mu zonzilaka, beno ke kuwa Ndinga ya Nzambi. Beno bambuka moyo, beno ke kuwa Yayi samu na

mbala ya nsuka, mosi ya bilumbu yayi. Beto me kuma kieleka na bukebi ntangu yayi. Beno zola kwisa ve, na nkokila yayi?

<sup>337</sup> Nzambi ya luzolo, beto me vwanda swi ntangu yayi, na kilumbu ya kuvutula matondo kieleka ya kele mutindu yina, Mfumu. Mu ke vutula matondo, Mfumu, samu na kuzinga na kilumbu yayi. Yayi kele kilumbu ya kulutila nene. Paul ntumwa zolaka mona kilumbu yayi. Bantu ya nene ya ntama vwandaka vingila na kumona yawu. Baprofete vwandaka vingila na kumona yawu. Bawu vwandaka sosa kilumbu yayi. Abraham vingilaka kilumbu yayi, samu yandi sosaka Mbanza yina Mutungi mpe Musadi vwandaka Nzambi; yawu kele kaka na zulu ya beto, na nkokila yayi. Jean monaka Mpeve ya Nzambi ke kulumuka na Mazulu, yandi pesaka kimbangi, yandi zabaka ti yina vwandaka Mwana ya Nzambi. Mpe, beno banza ntangu yayi, Yandi ke na kusolaka Kento ya Yandi ya makwela.

<sup>338</sup> Nzambi ya luzolo, bisika nyonso na yinsi bisika nyonso, tuba na ntima ya bawu. Nge kele Yandi yina kaka lenda soba ntima ya bawu. Kana ya vwandaka ve Nkuna ya kutula na kati kuna na mbandukulu, ba ke mona Yawu ata fioti ve, Mfumu. Ba kele kaka . . . “Kana mpofo ke twadisa mpofo. Bawu ke kubwa na dibulu,” ya kieleka mutindu mosi fwokula na mosi ke pesa yiya, samu ti Ndinga ya Nge me tuba ti bawu ke sala yawu.

<sup>339</sup> Ntangu yayi, Tata, na kuvwandaka yina beto ke mona bisika nyonso na yinsi, na yinza ya muvimba, na Afrika, bamakumi zole, bamakumi zole na kati ya Afrique du Sud, na Mozambique, bisika nionso na yinsi ya muvimba, mwa ba-assemblée ya fioti ke na kubakaka ba-bande. Mpe mutindu mosi bande yayi ke kwenda na bayinsi makumi zole, ya kuswaswana. Bawu ke banda na kumona Yawu mpe ba ke na kukabwana, bankama mpe bankama na kati ya bawu. ya ke vwanda ve bantu mingi, Mfumu. Na yina ntangu ba ke yamba mambele ya nsuka na kati ya Nzutu, Klisto ke kwiza.

<sup>340</sup> Mfumu Nzambi, mu ke lomba Kento ya makwela, na nkokila yayi, bayina mu ke kuwa me kabwana mpe ke vingila, ti bawu kabwana na bima nyonso ya yinza. Bawu fwana vwanda na Mvwandulu ya tiya ya Nsemo ya Mwana ya Nzambi, na kusukulaka na Ndinga ya Yandi, na zola ya Yandi. Pesa yawu, Nzambi ya luzolo.

<sup>341</sup> Bika ti bantu yayi awa, yina me monana na nzutu, bayina me telemisa diboko ya bawu na nkokila yayi, kumi na zole ya bawu na tabernacle yayi ya nene, Mu ke sambila, Nzambi, Luzingu yina ya malu-malu ke kwisa na kati ya bawu; mu ke sambila yawu, samu na yinsi ya muvimba mpe bisika nionso na yinza ya muvimba, kisika bande ke bula, ti bawu mpe ke kuzwa Nsangu yayi ya Kuvutula matondo mpe kuzaba, na nzila ya ba-bar mpe bima yina ba me losa, yina ba fwana sala. Mu ke sambila yawu, Tata. Pesa yawu. Sakumuna bawu. Ba kele ya Nge.

<sup>342</sup> Mu zaba ti ya kele kikalulu ntangu yayi, Tata, ti beto ke lomba bantu na autel. Mpe mu ke sambila, Nzambi ya luzolo, ti na mission nyonso, bisika nyonso, mpe na yinza ya muvimba, ti bawu ke kwiza na autel: ndombe, mpembe, jaune, mbwaki, bisika nyonso bawu kele; bamvwama, bampatu, bantu yina ke kipaka diambu ve, milombi, nionso yina bawu kele.

<sup>343</sup> Ba-denomination, bayina vwandaka na nkadulu ya yandi mosi mpe ya zulu-zulu, O Nzambi, “Kinkonga, bampasi, mawa, mpofo, mpe nge zaba yawu ve.” Nge tubaka ti ya ke vwanda mutindu yina, mpe ya ke mutindu yina.

<sup>344</sup> Na yawu mu ke sambila, Tata, ti Nge ke bokila konso Nkuna, na nkokila yayi. Mpe bisika nyonso na yinza ti Yayı lendaka kubwa, ti Yawu kusimba mwa ngononi yango yina zaba Ndinga ya Mfumu ya yandi. Pesa yawu, Mfumu. Mu me pesa bawu na Nge, na Nkumbu ya Yesu. Amen.

<sup>345</sup> Ntangu yayi na bayintu ya beno ya kukulumusa, awa na kati ya kivinga yina ke monana pwelele. Bayankaka awa, yina me kuzwa mpulusu ve, yina me pesama ve na ntima ya beno na Nzambi, beno banza ve ti beno fwana vutula matondo samu na yina Yesu salaka samu na beno? Na kubanza, ti beno kele musumuki, ti beno kele nzenza na Nzambi, mpe dyaka Kima na ntima ya beno, ke na kukonkota. [Mpangi Branham me konkota na chaire—Mu.] Wapi mutindu beno ke zaba kasi yina beno kele mosi ya mwa bangononi yango! Beno kele muntu ya mawa, mpe ke vwanda muntu ya mawa, tii beno ke bika Yawu. Samu na yinki kusala ve yayi ya kulutila nene na kuvutula matondo yina beno me kuzwaka ntete ve, ntangu beno kuzwaka Yesu Klisto mutindu Mvulusi ya beno.

<sup>346</sup> Beno zola kwisa awa mpe kutelama na autel? Mu ke sambila na beno kana beno kwiza, musumuki nyonso, bakala to kento, mwana ya bakala to mwana ya kento, mambele ya dibuundu to mambele ya dibuundu ve. Mambele ya Dibuundu ke sala beno ve Muklisto ntangu yayi. Autel kele ya kuzibuka. Beno zola kukwiza, musumuki nyonso yina ke zola kukwiza, kuzwa Mfumu Yesu Klisto. Ke zola kieleka kubika . . .

<sup>347</sup> Bayankaka na kati ya beno bantu ya denomination yina zola kubika kudia madia ya nsusu yina, na kutubaka, “Beno kele ya *yayi* mpe ya kele nyonso ya kulunga,” beno zola kieleka kuzaba yinki mbotika ya kieleka ya Mpeve-Santu kele? Beno kwiza, tala.

<sup>348</sup> Autel kele ya kuzibuka. Beto me kubama. Beno telama kaka, na—na kiti ya beno. Beno kwisa mpe beno fukama awa na autel, mpangi-bakala yayi me kwisa.

<sup>349</sup> “Matondo, O Nzambi, mu ke vutula matondo mingi na Nge. Ti, luzingu ya munu nyonso, mu zaba ti ya vwandaka na kima mosi, Mfumu. Mu me sepelaka ntete ve. Mu memekaka ntete ve. Mu—mu banzaka, ‘Na mvula ke kwisa, mu ke sala yawu. Sabala

ke kwisa, mu ke sala yawu, na ntangu mu ke kuwa lubokilu ya autel. Mu ke sala yawu, kilumbu mosi.<sup>350</sup> Mu bikaka yawu, mpe mu bikaka yawu. Kasi, Mfumu, mu zaba ti ya kele na kima mosi ke tambula mbote ve na munu. Mu ke kwikilaka ntangu nionso ti ya vwandaka na kima ya kuswaswana. Mpe ntangu yayi, Mfumu, na nkokila yayi, mu ke vutula matondo samu na kuyilama yina me salama na Mwana ya Nzambi, ti masumu ya munu, ya kieleka kukondwa lukwikilu ya munu, ba ke sukula yawu na munu. Mu ke kwisa, na nkokila yayi, mpe mu ke fukama samu na kundima lusakumunu ya nene ya kuvutula matondo ti Yesu Klisto salaka samu na munu na ntangu Yandi kufwaka samu na munu na Calvaire.”

<sup>350</sup> Beno zola kukwiza? Ntangu yayi ya kele na bantu yina ke fukama pene-pene ya autel awa. Samu na yinki beno ke telama ve mpe ke kwiza? Beno zolaka kusala yawu. Beno me meka yawu.

<sup>351</sup> Beno banza kaka na Mpangi Lyle Palmer, mpangi ya beto ya bakala ya mbote, ya ntalu. Yandi vwandaka ya kuvwanda na kati ya lupangu, na yawu mu me bakula, yandi vwandaka tala mwa mwana ya yandi ya kento yina vwandaka bula nsaka ya croquet kuna, to kima mosi, mpe yandi kubwaka ngambu mpe yandi kufwaka kuna na kitu ya yandi. Beno zaba ve wapi ntangu beno ke katuka awa. Beno zaba kaka ve yinki ntangu beno ke kwenda. Ya lendaka vwanda dyaka, na nkokila yayi, samu na yinki ve kukwiza mpe kusukisa yawu ntangu yayi?

<sup>352</sup> Beno kwiza, bantu. Beno lenda ve kuwa Kima mosi ke meka na kubenda beno? Mu—mu zaba ti ya kele na mingi ya beno awa yina fwana vwanda kaka awa na autel, mpe kaka bantu sambanu yayi to sambwadi awa kele ve yina kele ya kuvwanda awa. Ntangu yayi, kana beno ke kwikila munu mpe beno tala mbote awa na estrade, bima ke na kusalama, beno ke kwikila munu ntangu yayi. Kilumbu mosi ndinga ya munu ke vwanda kaka swi. Beno ke kuwa dyaka yawu ve. Beno lenda zola ti beno kwiza.

<sup>353</sup> Beno ke tuba, “Kasi, Mpangi Branham, mu vwandaka mambele ya dibuundu.” Yina ke sala ata luswaswanu ve na yina beno vwandaka. Na yawu—mutindu mosi Nicodeme vwandaka mambele ya dibuundu. Na yawu Jean, Pierre, Jacques, Paul, bawu nyonso yankaka vwandaka bamambele ya dibuundu.

<sup>354</sup> Paul vwandaka mambele ya dibuundu tii kima mosi kusalamaka mpimpa mosi, to kilumbu mosi ya vwandaka, mpe yandi kwizaka. Yandi vwandaka mambele ya dibuundu yina me soba, na mwana ya Nzambi. Beno zola kwisa ve? Oh, ba longisaka yandi. Yandi vwandaka muntu ya mayele. Yandi zabaka ti ba longisaka yandi, mosi ya balukolo yina ba longokaka mingi yina vwandaka, Gamaliel, mosi ya milongi ya kulutila mbote yina

vwandaka na yinsi. Kasi yandi zabaka ti yandi vwandaka na nsatu ya kima mosi.

<sup>355</sup> Beno zola kwisa ve? Mbala mosi diaka mu ke yufula beno. Na kisika... Awa to bisika nyonso na yinsi, mu ke yufula beno, kisika nyonso beno kele, na wapi kimvuka beno kele, na ngunga yayi ya kuvutula matondo. Beno bambuka moyo, ba ke na kubakaka munu na bande awa; kaka awa ve, kasi na Mazulu.

<sup>356</sup> Beno zaba, ya me talisa na luzabu ya yinza ti konso kuningana yina beno ke sala kele kubaka na bande. Ba ke siamisa yawu. Beno bambuka moyo, television me siamisa yawu. Television ke—ke salaka ve foto. Beno kele foto. Ya ke basisaka kaka yawu, yina beno ke na kusalaka, na nzila. Beno kele kuna, na mutindu nyonso. Beno me mona? Ntangu beno ke katula musapi ya beno, yina ke tambula bisika nyonso na yinza. Konso ntangu yina beno ke lwata robe mosi, kutala ke kwenda bisika nyonso na yinza. Ya kele na bande. Konso dibanza yina ke luta na dibanza ya beno kele na bande. Kilumbu mosi kukanga ndinga na bande ke suka, ba ke tula yawu na album.

<sup>357</sup> Mpe kuna na Lufundusu ya ke vutuka. Kuna beno ke telama na bansuki ya kuzenga, samu beno kele Muklisto. Kuna beno ke telama na mabanza na dibanza ya beno na zulu ya Ndinga, mpe ya kele kaka na kati ya mabanza ya beno. Beno lenda ve kubumba yawu. Beno bambuka moyo, television, science mpe zaba ti ya kele kieleka. Beno ke telama kaka ntangu yayi, na kuzabaka ti beno fwana vwanda awa, beno bambuka moyo, ntangu ba ke baka yawu na bande, na Kilumbu ya Lufundusu, dibanza mosi yina ti beno ke na kuzwa ke vutuka dyaka na nzila ya mabanza ya beno. Ya ke vwanda kaka na bande. Yinza ya muvimba ke mona yawu kubula. Samu na yinki yinza ve... Na kutalaka beno, na Kilumbu ya Lufundusu, Bawanzio nyonso kuna.

<sup>358</sup> “Kana beno kele na nsoni ya Munu awa, ntangu foto ya beno me salama ntangu yayi, na Kilumbu ya Lufundusu mu ke vwanda na nsoni ya beno. Samu ti, mu me pakula Ndinga ya Munu, me fidisa Yawu na beno. Beno ke kwikila Yawu ve. Beno me bumbama na manima ya kima mosi.”

<sup>359</sup> “Oh,” beno ke tuba, “Mu kele mbote mingi. Mu me sala yayi. Mu binaka na Kimpeve. Mu zonzaka na bandinga.” Mutindu mosi salaka mimpani. “Mu bokaka.” Mutindu mosi salaka mumpani. Wapi mutindu beno lenda vutuka na Ndinga na ntangu yina?

... samu na yinki ve,  
 Samu na yinki Yandi kwisaka ve ntangu yayi?  
 Samu na yinki ve, samu na yinki ve,  
 Samu na yinki Yandi kwisaka ve ntangu yayi?  
 Samu na yinki beno ke vingila, mpangi ya  
 bakala ya luzolo,

O samu na yinki nge me wumela ntangu ya  
yinda?

Yesu ke na kuvungila na kuvulusa beno  
Kisika na Yinzo ya Yandi ya kusantisama.

Beno tula mosi ya bamambele ya Nzutu ya Yandi!

Samu na yinki . . . ?

Oh, ngononi ya fyoti, kwiza ntangu yayi.

Oh, samu na yinki ve . . . ?

<sup>360</sup> Mfumu, mu ke vutula matondo. Mu ke vutula matondo mingi. Matondo na Nge, Mfumu; samu na madia ya yinza, kasi yina. Kasi, Mfumu, ntangu ya nsuka kele awa. Mu ke vutula matondo samu na Madia yayi ya kimpeve, Mfumu, Madia ya kimpeve ya Bidimbu Sambwadi ba silaka ti ba ke zibula yawu.

Beno ke tuba, “Yina ke vwanda kima ya kuswaswana.” Ve, ve.

<sup>361</sup> Beno lenda bwela ndinga mosi ve. Mpe kubaka . . . Ya kele yimeni na kati Kuna, ya kubumbama kaka. Ya kele ya kukanga. Bantu yikwa ke bakula yawu? Beno tuba, “Amen.” [Dibuundu me tuba, “Amen.”—Mu.] Beno me mona?

Beno ke tuba, “Mbote, yina kele mansweki ke kwisa.” Oh, ve.

<sup>362</sup> Ya kele yimeni ya Misoniki. Beno lenda bwela mpova mosi na Yawu, to kukatula mosi na Yawu. Beno me mona? Ya kele yimeni na kati Kuna. Ya fwana kaka kumonisama na kilumbu ya nsuka.

<sup>363</sup> Beno zola kwisa ve? Beno kwisa ntangu yayi, nkundi ya munu. Kana beno lenda bakula ve, beno kwisa. Beno fukama, beno tuba na Yandi samu na Yawu. Kana mu lenda ve kukumisa Yawu pwelele na beno, Yandi ke sala yawu, samu ti Yandi kele Kufwa ya bantembe nionso.

. . . na kati ya nkonga ya Yandi ya kusantisama.

Oh, samu na yinki . . .

Beno zola kwisa ve?

. . . samu na yinki ve,

Samu na yinki Yandi kwisaka ve ntangu yayi?

<sup>364</sup> Beno bambuka moyo, ya kele na bande yina ke na kusalaka yayi, kaka ve na bande yayi, kasi bande ya nene ya Nzambi. Mosi na mosi ya beno, kuningana nyonso, ntangu beno ke kulumusa yintu ya beno, beno kulumusa ntima ya beno, yina banzaka ke luta na mabanza ya beno, beno bambuka moyo, ba ke na kubaka yawu na bande ntangu yayi na Nkembo, mpe ba ke bula yawu na Kilumbu ya Lufundusu. Wapi kisika kele lukanu ya beno? Oh, wapi mutindu beno ke zola ti ya soba, na Kilumbu yina.

<sup>365</sup> Mu ke vingila kaka, samu ti ya kele na mingi, mingi, penepene ya autel ntangu yayi. Beno me mona? Ya lendaka vwanda ti mosi ya bawu, kana mu vwandaka kaka mwa ntangu mingi

dyaka, ya lendaka vwanda na mosi yankaka kuna, ya lendaka vwanda kisika mosi na New York, ya lendaka vwanda kisika mosi na Philadelphie, kuna na Californie, na Arizona. Kisika mosi kuna, ya lendaka vwanda na muntu yankaka ke kwisa. Pasteur, kisika nionso beno kele, beno pesa ve lubokilu na autel ntangu yayi.

<sup>366</sup> Beto lenda mona ata mbala mosi ve Kuvutula Matondo yankaka. Yayi lendaka vwanda yina ya nsuka, mpe ba ke kanga yandi, na nkokila yayi, samu na ntangu ya nsuka. Ba ke basisa bande, mosi ya bilumbu yayi. Ba ke yidika bande mpe ba ke vwanda na album ya Nzambi. Na yina ya ke bula na manima, yinki mabanza ya beno kele ntangu yayi. Beno tuba ve ti beno zabaka luswaswanu ve. Beno zaba. “Kasi muntu ve lenda kwiza na Munu, kana ti Tata ya Munu kubenda yandi. Mpe nyonso yina Tata me pesa Munu, bawu ke kwiza.”

...kwiza na Yandi...?

<sup>367</sup> Mpangi-bakala, mu ke kwikila, kana mu vwandaka ya kuvwanda kuna kisika mosi, mpe mu vwandaka me banza fioti, Kieleka mu ke baka awa na ngolo nyonso. Hmm.

Oh, samu na yinki ve,  
Samu na yinki...?

<sup>368</sup> Beno me suka? Ya kieleka beno ke na kuniongisa ve Mpeve ya Yandi ntangu yayi? Beto kulumusa bayintu ya beto. Kieleka beno me nyonga ve Mpeve ya Yandi? Kieleka beno me sala kaka kieleka yina Yandi tubaka na beno na kusala? Beno ke ndima ntangu yayi? Beno bambuka moyo, beno—beno ke kuzwa siansi yankaka ve. Bande lendaka suka, na nkokila yayi. Yayi lendaka vwanda nyonso ya yawu. Yayi lendaka vwanda bande ya nsuka samu na beno. Nge ke kwikila ti nge me kubama ntangu yayi? Kana na yawu, mu ke bika yawu na maboko ya nge, na Nkumbu ya Mfumu Yesu.

<sup>369</sup> Ntangu yayi na yina chorale ke na kuyimba na malembe, mu ke sambila samu na bayayi yina kele awa. Mu ke kaka Muklisto ya mutindu ya ngitukulu. Mu ke kwikila ti Nzambi fwana sala mpulusu. Mu ke kwikila ti Nzambi fwana kukuna Ndinga. “Munu Mfumu,” me tuba Biblia, Ésaïe, “Munu Mfumu kunaka Yawu. Mu ke mwangisa Yawu masa, na mwini mpe na mpimpa, mbayi-mbayi ba botula Yawu na diboko ya Munu.” Ntete mu lomba na muntu nyonso na kukwiza na autel na bantu yayi, mu zola kusambilila samu na bawu, munu mosi.

Beto kulumusa bayintu ya beto ntangu yayi.

<sup>370</sup> Yesu ya luzolo, mu me tanga kaka Ndinga ya Nge, ti profete ya Nge tubaka, mpe mu zaba ti bandinga ya baprofete kele kieleka. Mpe Nge tubaka, “Munu Mfumu me kuna Yawu.” Mbote, kieleka, Beno ke tula Yawu na Buku ya Luzingu ya Mwana-dimeme, na ntwala ya mbandukulu ya yinza. “Munu Mfumu me kuna Yawu, mpe Mu ke mwangisa Yawu masa, na

mwini mpe na mpimpa, kana muntu mosi ve kubotula Yawu na diboko ya Munu.” Bayayi, mu banza, Mfumu, me kuwa lubokilu ya autel mingi. Kasi Nge ke na kumwangisa masa na Yawu, Mfumu.

<sup>371</sup> Bawu yayi, na nkokila yayi. Ti bawu bika kaka, na nkokila yayi, Tata, na bima nyonso ya yinza, masumu nyonso mpe bampasi yina kele na kati ya ntima ya bawu, mpe kaka na mutindu ya kulunga, na buzitu nyonso, na kati ya ntima ya bawu, beno vutuka na Ndinga ya Nge, kaka ntangu yayi, mpe beno tuba, “Mfumu Yesu, kuna na kati ya ntima ya munu, mu ke kwikilaka ntangu nionso ti ya vwandaka na kima mosi samu na munu, ti mu me kuzwaka ntete ve. Ata ti mu me meka, mutindu nzonzolo me salama na nkokila yayi, samu na kulanda nsusu ya kento, kasi kima mosi monanaka ya ngitukulu samu na munu. Ya vwandaka wakana mbote ve. Na yina, na nkokila yayi, mu ke banza ti mu ke kwisa ntangu yayi pene-pene ya maboko ya Ndinga ya moyo. Mu me kwisa awa na luzitu nionso, na mabanza ya munu ya mbote. Mu me vwanda awa na autel yayi. Mu zola mpulusu, Mfumu, ya ke mpasi mingi. Mu ke na nzala mingi! Mu zola Nge, Mfumu, na kusimba munu na maboko ya Nge, na nkokila yayi. Ve na nzila ya emotion, kasi na nzila ya Mpeve ya zola, kunata munu na maboko ya Nge, Nzambi ya luzolo.”

<sup>372</sup> “Mu kele mwana ya Nge. Mu ke na kuwa ti mu kele ngononi yango yina bawu vwandaka zonzila. Yamba munu, Mfumu. Mu ke na kudumuka. Mu me yumbuka na kiti ya munu, mpe me fukama awa. Baka munu, Mfumu. Mu ke na kudumuka. Nata munu na mapapu ya Nge, Mfumu, na bima yayi ya yinza. Bika mu pumbuka na mvindu ya yinza yayi, na nkadulu ya munu ya yimbi, na kinkulu ya munu nionso ya denomination. Bika mu kwisa kaka na Nge, Nzambi ya luzolo, ti Mpeve-Santu ya Nge lendaka tsyamuna na munu lemvo ya bantembe ya munu nionso. Bika mu, na nkokila yayi, kukuma mwana ya Nge, ya malu-malu, yina me butuka, mpe kivangu ya malu-malu, na nkokila yayi. Beno kanga munu. Beno nata munu ntama, na zulu ya nsunga ya nsusu ya kento. Beno nata munu ntama, tii na diyamba ya Ngononi, kisika yina mu lendaka kudia Ndinga ya Nzambi, tii kuna mu ke zaba kupumbuka.”

<sup>373</sup> Pesa yawu, Nzambi ya luzolo. Baka bawu. Ba kele ya Nge. Yayi kele kisambu ya munu na bukieleka, na kusambilaka na bantu yina ke kufwa. Pesa yawu, Tata. Mu ke pesa kisambu yayi samu na mambote ya bawu. Samu na nkembo ya Nzambi, mu ke lomba yawu.

Ntangu yayi na bayintu ya beto ya kukulumusa.

<sup>374</sup> Mu ke kukiyufula, pene-pene ya autel ntangu yayi, ya kele beno yina me fukama awa. Mingi ya beno me tuba ti ya kele Baklisto, kasi beno me kuwa ti ya kele ntangu nyonso na kima mosi, kisika mosi, ti beno bakaka ve. Beno lendaka sala bisalu

nionso ya misambidi. Beno lendaka boka. Beno lendaka sala bima nionso. Ya lendaka vwanda ti beno binaka na Kimpeve. Beno lendaka vwanda ti beno zonzaka na bandinga. Mpe muntu ve lenda tuba kima ya yimbi na zulu ya yawu. Ya kele kieleka. Ya kele nyonso mbote. Kasi, beno me mona, ya kele *makabu* ya Kimpeve, kukondwa Mpeve. Kana Mpeve vwandaka kuna, nsatu yina zolaka vwanda ve ya kufundisa mutindu yina.

<sup>375</sup> Beno kieleka, ya kusungama, awa na autel, beno kwikila yawu malu-malu yayi, na yina beno kele awa, samu kaka ti beno me kabwana, ve na nzila ya émotion, kasi na lukwikilu ya kieleka, yina ba me vukisa ve, ti Nzambi ke yamba beno mpe ke pesa beno dibebe na Ndinga ya Yandi tii kuna beno ke bangononi, beno mosi, mpe beno lenda pumbuka? Kana beno sala yawu, mpe beno zola Nzambi kusala yawu, beno telemisa diboko ya beno, beno bayina kele pene-pene ya autel awa. Nzambi sakumuna nge. Mosi na mosi me telemisa maboko ya bawu.

<sup>376</sup> Ntangu yayi, na malembe nyonso, mu ke lomba na babakala ya busantu mpe bakento yina kieleka zaba Nzambi.

<sup>377</sup> Mingi ya bawu, ya kele kieleka ngitukulu, ya ke monana mutindu ti ya kele mutindu yina, balubokilu na autel yina mu ke salaka kele mingi bantu nyonso. Beno zaba, na mutindu ya kusala ya mumesanu, ya kele bakento. Kasi ya kele babakala nyonso awa. Mu banza ti ya kele na kento mosi na autel, na nkokila yayi, mu banza zole. Ya kele ntangu nyonso bakento. Kasi, na mutindu nyonso to yankaka, mu banza ti ya ke monana mutindu bakento ke banzaka ti mu ke teleminaka bawu. Ve, mpangi ya kento. Tatu, mu banza, muntu mosi tubaka ti bawu ke mona. Mu lenda mona ve na zulu ya autel awa. Mbote mingi.

<sup>378</sup> Bayankaka na kati ya beno Baklisto ya busantu ke kwisaka awa mpe ke telama na munu na kisambu na mwa ntangu fioti. Na autel, kisika nyonso beno kele, na estrade, muntu yina kieleka zaba Nzambi, beno zaba kaka mutindu ya kutelama awa kaka baminuti fyoti samu na kisambu na bawu, kuna beto ke bika bantu. Muntu nyonso kuvwanda kieleka na buzitu ntangu yayi. Beno kwenda ve. Beno kwiza kaka awa mpe beno telama.

<sup>379</sup> Bayankaka na kati ya beno bantu yina ke kwikilaka ti Yayi kele Kieleka, ti beto ke na kukota na nsungi yankaka, beto ke na kukotaka na Nsungi ya Enlevement, beno zaba dibuundu lenda ve kukota na mutindu ya yawu, mpe ya lenda ve kuzwa ya kulutila mbote. Ya fwana kuma yimbi mingi. Bantu yikwa zaba yawu? Beno tuba, "Amen." [Dibuundu me tuba, "Amen."—Mu.] Ya fwana kuma yimbi mingi. Mpe ya lenda kwenda ve mutindu yayi. Beno me mona? Ya fwana vwanda Kima mosi, mpe Yawu ke na kutambula kaka na ntangu yayi, nkundi. Ya kele—ya kele—ya kele na zulu, kutambula kele samu na Kento ya makwela. Ya kele Kieleka. Ya kele MUTINDU ME TUBA MFUMU.

<sup>380</sup> Beno kwisa ntangu yayi, Baklisto ya kukubama yina zola ti kimbangi ya beno—ya beno kutalisa ti, bantu yayi me kwisa na mutindu ya kieleka, ti beno zola kukwiza mpe kusambila na bawu, mutindu bampangi ya beno ya babakala mpe bampangi ya bakento, beno kwiza na autel. Beno telama awa na mwa ntangu fioti, samu na kisambu. Muntu yankaka zola kwisa? Beno telama awa. Beno fukama kaka pene-pene ya bawu. Beno tambula kaka, kisika beno babakala pene-pene ya babakala yina; beno bakento. Na lembami, beno lomba na kukikulumusa nionso kisambu samu na bawu.

Nzambi ya luzolo, sadisa . . . ? . . .

<sup>381</sup> “Mu ke bika nyonso. Mu ke bika dénomination ya munu. Mu ke bika makwela ya munu ya ntete. Mu ke bika bakala ya munu ya ntete. Mu ke bika nyonso, Mfumu.”

. . . bika nyonso.

Nyonso na Nge, Mvulusi ya munu ya kusakumuna,  
Mu me bika nyonso.

Mu me bika nyonso,  
Mu me bika . . .

<sup>382</sup> Beno ke bika dibanza ya beno mosi? Beno lenda bika mabanza ya beno mosi, na Ndinga ya Nzambi?

Nyonso na Nge, Mvulusi ya munu ya kusakumuka,  
Mu me bika nyonso.

Mu me bika nyonso,  
Mu me bika nyonso,  
Nyonso na Nge, Mvulusi ya munu ya kusakumuka,  
Mu me bika . . .

<sup>383</sup> Bayina nionso ke kwikila ntangu yayi, na kati ya kivinga, beno telema. Beto yimbila yawu kintwadi ntangu yayi.

Mu me bika . . .

Beno nyonso me bika, me kubama na kuyimba yawu ntangu yayi?

Mu . . .

. . . na Nge, Mvulusi ya munu ya kusakumuka,  
Mu me bika . . .

<sup>384</sup> Ntangu yayi, beno bayina kele pene-pene ya autel, kana beno bika kieleka, beno telemisa diboko ya beno na Yandi, beno yimba, “Mu ke bika nyonso. Mu ke bika dénomination. Mu ke bika dénomination. Mu ke bika dibuundu. Mu ke kukipesa munu mosi. Mu me pesa dibanza ya munu. Nyonso na Nge, Mvulusi ya munu ya kusakumuka, mu me bika nyonso.”

. . . na Nge, ya munu . . .

Mu me bika nyonso,  
 Mu me bika nyonso,  
 Nyonso na Nge, Mvulusi ya munu ya  
 kusakumuka,  
 Mu me bika nyonso.

Beno zola kieleka kutuba yawu?

Mu me bika nyonso,

<sup>385</sup> [Kisika ya mpamba na bande—Mu.] Beno awa ntangu yayi na autel. Beno tala bayina kele pene-pene ya autel, bayina ba me sambila. Dibuundi me sambila samu na beno. Beno sambilaka, beno mosi. Ntangu yayi ya kele kaka na mutindu mosi beno lenda kuzwa mpulusu, ya kele, “Na nzila ya lukwikilu beno me kuzwa mpulusu, mpe yina na nzila ya lemvo.” Lemvo ya Nzambi zonzaka na beno, nataka beno na autel. Beno ke na kusosaka balusakumunu ya Nzambi. Nge ke na kusosaka Ndinga ya Yandi. Nge ke na kusosaka Mpeve-Santu. Nge ke na kusosaka lemvo ya Nzambi. Mpe kana beno kele, mpe beno lenda, ya kieleka, na ntima ya beno ya muvimba, beno bika yawu, ntangu yayi, beno sosa ve emotion, beno sosa Kieleka, Kieleka yina me katuka na ntima ya beno, na lukwikilu. “Mfumu, mu ke zola kusala nyonso yina Ndinga ya Nge ke tuma munu na kusala. Mu ke bika munu mosi, na nyonso yina kele na kati ya munu.”

<sup>386</sup> Kana beno ke kwikila yawu na ntima ya beno ya muvimba, mu zola ti beno telema, beno baluka na dibuundi yayi, nkonga ya bantu, mpe beno telemisa maboko ya beno na zulu, mpe beto ke yimba yawu kintwadi na bawu, “Mu ke bika nyonso yina kele na kati ya munu, Nzambi. Mutindu mbote landila luzabu ya munu, nyonso yina mu kele, mu me bika.”

<sup>387</sup> Mata na estrade yayi awa, nge yina kele na autel. Beno kwisa awa na estrade, bampangi-babakala, awa, beno nionso, mpe bampangi-babakala mpe bampangi-bakento.

Tala awa, dibuundi.

<sup>388</sup> [Mpangi-kento mosi me tuba, “Mpangi Branham, mu kele ya dibuundi, kasi na nsukinina mu kele diaka ve—ve na kati ya yawu.”—Mu.] Bika? [“Mfumu zaba kisika mu zola twadisama na Yandi. Mu zola . . . ? . . . na dibuundi. Mpe mu zola Mpeve-Santu, kuvwanda ya kufuluka na Mpeve. Mpe mu ke kufwa ntama mingi ve, kana ya kele yina ya ke lomba.”] Yinga. Ya kele kieleka. Beno bika konso kitini ya Yandi mpe Ndinga ya Yandi?

<sup>389</sup> Mpangi-kento mosi awa, na denomination mosi. Yandi tubaka, “Mu kele ya denomination mosi.” Beto kele ve na nsatu ya kubokila yawu. Yandi kele kisadi na kati kuna. Kasi yandi tubaka, “Mpangi Branham, mu zola basika na Kieleka. Mu zola kima ya mudindu mingi kulutila yawu.” Beno me mona?

<sup>390</sup> Bika mu tanga Ndinga ya Yandi. “Kyesé na bayina kele na nsatu mpe mpwila ya ludedomo, samu ti bawu ke fuluka.”

<sup>391</sup> Ntangu yayi, beno awa na estrade, beno kwisa kaka, kana beno me kubama na kubika bima nionso yina beno kele, nyonso, samu na kutumama na Ndinga ya Nzambi . . . Muntu ve tubaka na beno, sabala yayi, yinki ya kusala. Ntangu yayi, kana beno me kubama na kubika ntangu yayi na Yandi, beno telemisa kaka maboko ya beno, mutindu *yayi*, na dibuundi. Ntangu yayi, beno awa na estrade, beto yimba yawu kintwadi ntangu yayi, *Mu Me Bika Nyonso*. Muntu nyonso, kintwadi. Mbote mingi.

Mu me bika nyonso,

Ntangu yayi, kieleka ya zola kutuba yawu! . . . ? . . . yandi kilumbu mosi, mpe mutindu mu ke vutula matondo. Mu ke bika yandi . . . ? . . .

. . . Mvulusi,

<sup>392</sup> Beno zola kieleka kutuba yawu? Beno tuba, “Amen.” [Dibuundi me tuba, “Amen.”—Mu.] Beno tuba, “Amen,” mbala mosi dyaka. [“Amen.”]

Beno tuba, “Mfumu, tala munu, meka munu, mpe pesa munu ntangu ya mbote. Yayi kele nyonso yina mu lenda sala, na nkokila yayi, me kukipesa munu mosi na Nge. Nge zaba nsatu ya ntima ya munu, Nge zaba nsatu ya munu. Nsilulu ya Nge zolaka fulusa nsatu yina, Ntangu yayi mu ke vingila yawu, mpe mu ke bika na Nge.”

Beto nyonso kintwadi:

Mu me bika nyonso,

Mu me bika nyonso,

Nyonso na Nge, Mvulusi ya munu ya  
kusakumuka,

Mu me bika nyonso.



*KUVUKANA YINA KE MONIKAKA VE YA  
KENTO YA MAKWELA YA KLISTO KNG65-1125*  
(The Invisible Union Of The Bride Of Christ)

Nsangu yayi ya Mpangi William Marrion Branham, kulongamaka na Kingelesi, na Kilumbu ya Kuvutula matondo, na Kilumbu ya yiya na nkokila, na kilumbu ya 25 ya Ngonda ya kumi na mosi, na 1965, na Life Tabernacle na Shreveport, Louisiane, U.S.A., yina bakamaka na bande manietiki mpe basisamaka na muvimbala nionso na buku na Kingelesi. Lubangulu yayi na Kikongo-Kituba basisamaka na buku mpe ba kabulaka yawu na Voice Of God Recordings.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)